

萬 有 文 庫

第 二 集 七 百 種

王 雲 五 主 編

元 文 類  
(二)

商 務 印 書 館 發 行

元 文 類

(二)

蘇天爵編

國學基本叢書

# 元文類卷之四

## 樂府歌行

### 湘夫人詠

木蘭芙蓉滿芳洲。白雲飛來北渚游。千秋萬歲帝鄉遠。雲來雲去空悠悠。秋風秋月沅江渡。波上寒煙引輕素。九疑山高猿夜啼。竹枝無聲墮殘露。

元好問

### 西樓曲

游絲落絮春漫漫。西樓曉晴花作團。樓中少婦弄瑤瑟。一曲未終坐長歎。去年與郎西入關。春風浩蕩隨金鞍。今年正馬妾東還。零落芙蓉秋水寒。并刀不翦東流水。湘竹年年露痕紫。海枯石爛兩鴛鴦。只合雙飛便雙死。重城車馬紅塵起。乾鵲無端爲誰喜。鏡中獨語人不知。欲插花枝淚如洗。

元好問

### 征人怨

瀚海風煙掃易空。玉關歸路幾時東。塞垣可是秋寒早。一夜清霜滿鏡中。

元好問

### 塞上曲

平沙細草散羊牛。一簇征人在戍樓。忽見隴頭新鴈過。一時迴首望南州。

元好問

### 梁園春

元好問

雙鳳簫聲隔綵霞。宮鶯催賞玉谿花。誰憐麗澤門邊柳。瘦倚東風望翠華。

龍德宮有玉谿館。麗澤燕都西門名。

征夫詞

劉祁

頑陰漠漠秋天黑。冷雨瀟瀟和雪滴。途中騎士衣裳單。半夜銜枚赴靈壁。中州近歲雨雪多。只因戎馬窺黃河。將軍錦帳衣千襲。馬上揮鞭傳令急。但令飽煖度朝夕。一死沙場吾不惜。九重日望凱歌歸。安知中路行逶迤。願將舞女纏頭錦。添作征人身上衣。

征婦詞

劉祁

青釭燐燐照空壁。綺窗月上莎雞泣。良人沙塞遠從軍。獨妾深閨長太息。憶初癡小嫁君時。謂君不晚擁旌麾。如何十載尙輿隸。東屯西戍長奔馳。秋風戎馬臨關路。千里持矛關上去。公家事急將令嚴。兒女私恩那得顧。恨妾不爲金鞦韆。在君腰下隨風埃。恨妾不爲龍泉劍。在君手內飛光燄。慕君不得逐君行。翠袖爛斑空血染。君不見重瞳鳳駕遊九疑。蒼梧望斷猶不歸。況今沙場征戰地。千人同去幾人回。君回不回俱未見。妾心如石那可轉。

留春曲

杜瑛

絮飛冷屑龍蟠玉。花隕香摧鳳銜燭。批頰深林叫新綠。倚闌人唱留春曲。春光欲去如死灰。明年暖風吹又來。何如日日長相守。典衣共醉花前榼。殷勤留春春不住。白日西馳水東去。鏡中絲髮奈老何。君當持盃我欲歌。

楊白花

李冶

帝家迷樓春晝長。紫笙吹破百花香。蒲萄凝碧琥珀光。燕語鶯啼空斷腸。枕帷紅淚灑瀟湘。玉鏡臺前添  
午妝。茜羅緩帶雙鴛鴦。胡蝶趁雪上釵梁。千里萬里雲茫茫。

空村謠

楊弘道

淒風羊角轉曠野埃塵腥。膏血夜爲火。望際光青燐。頽垣俯積灰。破屋仰見星。蓬蒿塞前路。瓦礫堆中庭。  
殺戮餘稚老。疲羸行欲倒。問汝居空村。何以供朝昏。氣息僅相屬。致詞難遽言。往時百餘家。今日數人存。  
傾筐長鏡隨日出。樹木有皮草有根。春磨沃飢火。水土仍君恩。但恨誅求盡地底。官吏有時猶到門。

羽林行

楊果

銀鞍白馬鳴玉珂。風花三月臙脂坡。侍中女夫領軍子。萬金買斷青樓歌。少年羽林出名字。隨從武皇偏  
得意。當時事少遊幸多。御馬御衣嘗得賜。年年春水復秋山。風毛雨血金蓮川。歸來宴賀滿宮醉。山呼搖  
動東南天。明昌泰和承平久。北人歲獻蒲萄酒。一聲長嘯四海空。繁華事往空回首。懸瓠月落城上牆。天  
子死不爲降王。羽林零落祇君在。白頭辛苦趨路傍。腰無長劍手無槍。欲語前事涕滿裳。洛陽城下歲華  
暮。秋風秋氣傷金瘡。龍門流出伊河水。北望臨潢八千里。蔡州新起鬪餽臺。只合當年抱君死。君家父兄  
健如虎。一旦倉皇變爲鼠。錦衣新貴見莫嗤。得時失時令人悲。

金谷行

楊兔

洛陽園池天下無。金谷近在西城隅。晉時花草不復見。野人猶解談齊奴。齊奴豪奢誰比數。酒酣愛擊珊瑚  
珠。後堂春風滿桃李。中有一枝名綠珠。千金買步障。百金買氍毹。時時吹笛替郎語。雲牕霧戶長歡娛。

層階欲下須人扶。豈料一日能捐軀。紅飛玉碎頃刻裏。空使行客悲躊躇。樓頭小婦感恩死。君臣大義當何如。

桃源行

劉因

六王掃地阿房起。桃源與秦分一水。小國寡民君所憐。賦役多慙負天子。天家正朔不得知。手種桃枝辨四時。遺風百世尙不泯。俗無君長人熙熙。漁舟載入人間世。卻悔桃花露蹤跡。曾聞父老說秦強。不信而今解亡國。畫圖曾識武陵溪。飛鴻滅沒天之西。但恨於今又千載。不聞再有漁人迷。

明妃曲

劉因

初聞丹青寫明眸。明妃私喜六宮羞。再聞北使選絕色。六宮無慮明妃愁。妾身只有愁可必。萬里今從漢宮出。悔不別君未識時。免使君心憐玉質。君心有憂在遠方。但恨妾身是女郎。飛鴻不解琵琶語。祇帶離愁歸故鄉。故鄉休嗟妾薄命。此身雖死君恩重。來時無數後宮花。明日飄零成底用。宮花無用妾如何。傳去哀弦幽思多。君王要聽新聲譜。爲譜高皇猛士歌。

塞翁行

劉因

塞翁少小壘上鋤。塞翁老來能捕魚。宋家昔日塞翁行。屯田校尉功不如。西山瀛海接千里。長城又見開長渠。要將一水限南北。笑殺當年劉六符。天教陂澤養鴈鶩。留與金人賦子虛。我來鄉國覽風土。髻髻搗鼓笛鳴鳴。胸中雲夢忽已失。酒酣懷古皆平蕪。昔年阻水羣盜居。塞翁子孫殺欲無。至今遺老向人泣。前宋監邊無遠圖。

武當野老歌

劉因

南陽武當天下稀。峯巒巧避山自迷。青天飛鳥不可度。但見萬壑空煙霏。山不知人從太古。白雲飛來天作主。旌旗明滅漢陽津。幾閱東西互夷虜。老人住此今百年。自言三世絕人煙。往事不聞宣政後。初心欲返義皇前。脯鹿爲糧豹爲席。竹樹蒼蒼歲寒國。天分地拆保無憂。怪見北風山鬼泣。一聲白鴈已成擒。回望丹梯淚滿襟。傳語桃源休避世。武陵不似武當深。

燕歌行

劉因

薊門來悲風。易水生寒波。雲物何改色。游子唱燕歌。燕歌在何處。盤鬱西山阿。武陽燕下都。歲晚獨經過。青丘遙相連。風雨隳巖峩。七十齊郡邑。百二秦山河。學術有管樂。道義無丘軻。蚩蚩魚肉民。誰與休干戈。往事已如此。後來復如何。割地更石郎。曲終哀思多。

白鴈行

劉因

北風初起易水寒。北風再起吹江干。北風三吹白鴈來。寒氣直薄朱崖山。乾坤噓氣三百年。一風掃地無留錢。萬里江湖想瀟灑。佇看春水鴈來還。

義俠行

王惲

予爲王著作劍歌行。繼更曰義俠。或詢其所以。因爲之解曰。彼惡貫盈。禍及天下。大臣當言。天吏得以顯戮。而著處心積慮。一旦以計殺之。快則快矣。終非正理。夫以匹夫之微。竊殺生之柄。豈非暴豪邪。不謂之俠可乎。然大姦大惡。凡民罔不怒。又以春秋法論。亂臣賊子。人人得而誅之。不以義與之可乎。又且以游

俠言古今若是者不數人。如讓之止報己私。軻之劇軀無成。較以此舉于尋常萬萬也。凡人臨小利害。尚且顧父母。念妻子。慮一發不當。且致後患。著之心。孰謂不及此哉。然所以略不顧藉者。正以義激於衷。而奮捐一身爲輕。爲天下除害爲重。足見天之降衷。仁人義士。有不得自私而已者。此著之心也。何以明之。事既露。著不去。自縛詣司敗。以至臨命。氣不少挫。而視死如歸。誠殺身成名。季路仇牧。死而不悔者也。故以劍歌易而爲義俠云。著字子明。益都人。少沉毅。有膽氣。輕財重義。不屑小節。嘗爲吏。不樂去。而從軍。後與妖僧高比行。假千夫長。歸有此舉。死年二十九。時至元十九年壬午歲三月十七日丑夜也。

君不見悲風蕭蕭易水寒。荆軻西去不復還。狂圖祇與蝥蛛靡。至今恨骨埋秦關。又不見豫讓義所激。漆身吞炭人不識。劇軀止酬一己恩。三刺襄衣竟何益。超今冠古無與儔。堂堂義烈王青州。午年辰月丁丑夜。漢允策祕通神謀。春坊代作魯兩觀。叩魄已褫曾夷猶。袖中金錐斬馬劍。談笑馘取姦臣頭。九重天子爲動色。萬命拔出顛崖幽。陂陀燕血濟時雨。一洗六合妖氛收。丈夫百年等一死。死得其所鴻毛輜。我知精誠耿不滅。白虹貫日霜橫秋。潮頭不作子胥怒。地下當與龍逢遊。長歌落筆增慷慨。覺我髮豎寒颼颼。燈前山鬼忽悲歎。鐵面御史君其羞。是月授南臺侍御史故云。

田家謠

魏初

五月軍回未有期。不禁煙瘴入枯脾。馬頭一骨還家日。只有弓刀似舊時。

懸瓠城歌

李材

我經懸瓠城。試作懸瓠歌。殘灰五百載。懸瓠不復我。有唐中葉失馭將。退辱進危多詆謗。淮西孽雛手指



天百萬官兵不敢傍。長安市上晝殺人。司隸走藏魂膽喪。晉公一語破紛紜。意斷心謀神莫抗。諫書不到雙闕下。詔檢初成九天上。煌煌日月煥斧節。慘慘風雲動鞬鞞。殿前虓虎神策軍。愬武通顏分玉帳。夜深雪花大於璧。懸瓠城頭血埋仗。寒威方勁弓百鈞。淨影不搖旗十丈。已囚瘵榆山更沸。再戮鯨鯢海無浪。蔡人不識緋衣兒。劍氣磨天大丞相。方城大將拜道左。犀甲金戈光炫晃。兇豸狡衆五十秋。白日青天破昏障。兒童不遣避介冑。婦女爭來沽綠釀。入朝論功功有差。晉公之功無與讓。英雄事往名器虛。栗斯嚙呪竟相向。外藩跋扈驕將侮。中禁深嚴嬖臣誑。山東何啻百少陽。秦苑洛陽隨板蕩。我歌懸瓠辭。歌聲頗悲壯。嗚呼唐之覆車將誰尤。後人弔古徒哀愴。懸瓠城下汝水流。懸瓠城邊牧笛唱。懸瓠歌。歌已終。君不見豐碑野火化爲土。悵望文公及晉公。

水荒子歌

鮮于樞

水荒子。日日悲歌向城市。辭危調苦不忍聞。妻孥散盡餘一身。城中米貴丐者衆。崎嶇一飽經千門。城中昔食城外米。城外人今食城裏。耕者漸少田漸荒。政恐明年不如此。水荒子。行歌乞食良不惡。猶勝弄兵獄中死。

水荒子聽我語。忍死休離去鄉土。江中風浪大如山。蛟鱷垂涎寧貫汝。路傍暴客掠人賣。性命由他還更苦。北風吹霜水返壑。稍稍人煙動墟落。賑濟欲下逋負除。比著當年苦爲樂。水荒子。區區吏弊何時無。聞早還鄉事東作。

湖上曲

鮮于樞

湖邊蕩槳誰家女。綠慘紅愁問無語。低回忍淚並人船。貪得纏頭強歌舞。玉壺美酒不消憂。魚腹熊蹯棄如土。陽臺夢短匆匆去。鴛鴦生寒愁日暮。安得義士擲千金。坐令桑濮歌行露。

烈婦行

趙孟頫

至元七年冬。濱州軍士劉平之。戍棗陽。與其妻胡俱。道宿車下。爲虎所得。起追及之。殺虎。脫其夫。吾聞之。中原賢士大夫如此。乃爲感激慷慨。作烈婦行以歌之。

客車何焯焯。夫挽婦爲推。問君將安去。言往棗陽戍。官事有程宿車下。夜半可憐逢猛虎。夫命懸虎口。婦怒髮指天。十步之內血相濺。夫難再得虎可前。寧與夫死。毋與虎生。呼兒取刃力與爭。虎死夫活心始平。男兒節義有如許。萬歲千秋可以事明主。馮婦卞莊安足數。嗚呼猛虎逢尙可。寧成寧成奈何汝。

沉沉行

虞集

沉沉天宇玄以黝。星河如銀垂近人。牛羊漫散草多露。大帳中野旁無鄰。去年八月羽書急。婦女上馬小兒泣。今年八月天子來。身屬囊韉月中立。

車簇簇行

馬祖常

李陵臺西車簇簇。行人夜向灤河宿。灤河美酒斗十千。下馬飲者不計錢。青旗遙遙出華表。滿堂醉客俱年少。侑盃小女歌竹枝。衣上翠金光陸離。細肋沙羊成體薦。共訝高門食三縣。白髮從官珥筆行。毳袍衝雨桓州城。

竹枝歌

京城南粟侯玩芳亭。仲淵子方同賞牡丹。

馬祖常

城南牡丹一百本。翰林學士走馬來。渡水楊花逐飛燕。翦衣雲影覆春臺。  
粟侯宅中花一園。客來飲酒費金錢。明朝碧樹春城合。恨不江東問酒船。

玉環引送伯庸北上

王士熙

崑山有美璞。昆吾有寶刀。推雪漉寒冰。凝此英瓊瑤。團團月長滿。鼎鼎白雲淺。似環環無窮。寥寥人意遠。  
有美天山人。皎潔同精神。禁垣青春多。大佩垂朝紳。腰無大羽箭。肘有如斗印。結束上京行。驅駒驟長鞞。  
不採珊瑚鉤。海深安可求。不執水蒼璧。漢庭羅公侯。愛此玲瓏質。題詩贈與客。百金一朝傾。三年不可得。  
不得只空行。山泉琴峽鳴。摩挲龍門石。憶憶應留情。天風北極高。歸途踏霜草。不惜玉環分。只願君還早。

早朝行

王士熙

石城啼鳥翻曙光。千門萬戶開未央。丞相珂馬沙堤長。奏章催喚東曹郎。燕山驛騎朝來到。雨澤十分九州報。輦金馱帛分遠行。龍沙士飽無鼓聲。閣中龍牀琢白玉。瑟瑟圍屏海波綠。曲闌五月櫻桃紅。舜琴日  
日彈薰風。

畫馬歌

范梈

錢君畫人勝畫馬。安得名驄妙天下。青雲隱約見龍文。有意軒昂駛華夏。圉官山立頤而髯。朱衣黑帶高帽尖。問渠掌握詎有此。牽控寧知人汝嫌。君不見才士受束縛。往往因之縱寥廓。

蘇小小歌

辛文房

東流水底西飛魚。銜得錢塘紋錦書。幾回錯認青驄馬。著處閑乘油壁車。鸚鵡盃殘春樹暗。蒲萄衾冷夜

臆虛蓮子種成南北岸。苦心相望欲何如。

李宮人琵琶引

揭傒斯

茫茫青冢春風裏。歲歲春風吹不起。傳得琵琶馬上聲。古今只有王與李。李氏昔在至元中。十九辭家來入宮。一見世皇稱藝絕。珠歌翠舞忽如空。君王豈爲紅顏惜。自是他人彈不得。玉觴未舉樂未停。一曲便覺千金直。廣寒殿裏月流輝。太液池頭花發時。舊曲半存猶解語。新聲萬變總相宜。三十六年猶一日。長得君王賜顏色。形容漸改病相尋。獨抱琵琶空歎息。興聖宮中愛更深。承恩始得遂歸心。時時尙被宮中召。強理琵琶弦上音。琵琶轉調聲轉澀。堂上慈親還佇立。回看舊賜滿牀頭。落花飛絮春風急。

船上謠

送伯庸以喬貨  
事奉使閩潮

宋本

江華江月耍才情。多病堪憐馬長卿。莫向都門折楊柳。帝鄉春色不南行。琉球真蠟接閩婆。日本辰韓濊貊倭。番船去時遺碇石。年年到處海無波。朱張死去十年過。海寇凋零海賈多。南風六月到岸酒。花股篙丁奈樂何。湧金門外是西湖。隄上垂楊盡姓蘇。作得吳趨阿誰唱。小卿墳上露蘭枯。舊時家近黑橋街。三十餘年不往來。憑仗使君一問訊。楊梅銀杏幾回開。

予以至元廿六年出杭。故居東廂隅。四條巷旁有橋名黑橋。居有楊梅銀杏二

樹在巨  
舟上園

閩中父老白髭鬚。老子風流記得無。昔日郎君騎竹馬。如今使者駕軺車。伯庸之先  
嘗仕閩中。

素馨華畔十八娘。炎雲瑞露酌天漿。一日供廚三百顆。使君館券莫支羊。

薰陸胡椒膾膈齊。明珠象齒駭雞犀。世間莫作珍奇看。解使英雄價盡低。

東海澄清南海涼。公廚海錯照壺觴。郎君鯨好江瑤脆。水母線明烏賊香。

明年歸路蹋陽和。缺胯輕衫翦越羅。春風通惠河頭路。還與官家得寶歌。



# 元文類卷之五

## 七言古詩

鄧州城樓

元好問

鄧州城下湍水流。鄧州城隅多古丘。隆中布衣不復見。浮雲西北空悠悠。長鯨駕空海波立。老鶴叫月蒼煙愁。自古江山感遊子。金人誰解賦登樓。

弔故宮

杜瑛

月上觚稜椒壁溼。飢烏啄碎琅玕石。劫灰飛盡海揚塵。廢殿荒臺土花碧。洛陽書生汴梁客。一夜春風頭欲白。尊中賴有酒如泉。醉倚寒窗破愁寂。

巨源相過話舊有感

王磐

中統三年春二月。變起青齊帶吳越。鯨鯢轉側海波翻。城郭橫尸野流血。我時辛苦賊中來。兵塵模糊眼不開。妻孥棄捐豺虎口。飛蓬飄轉無根荻。天寒日暮齊河縣。破驛荒涼絕煙爨。騎行驛馬鈍如蛙。官吏散地無處喚。與君此地忽相逢。行臺郎中氣勢雄。憫我白頭遭喪亂。壯我臨難全孤忠。急呼驛吏具鞍馬。使我厄路還亨通。明晨相隨濟南去。出入條侯營壘中。死生契闊不相棄。起居飲食常相同。標山華注日在眼。綿歷春草及秋風。四郊斫木桑柘盡。灤源飲馬波濤空。兇渠腰領膏野草。始見齊魯收煙烽。巨源巨源

君且坐。我欲高歌君可和。往事回頭十五年。猶想離魂招楚些。身逢喪亂百憂纏。生不成名空老大。我依破硯竊恩榮。君佐雄藩收最課。流萍暫聚不多時。且喜相看顏一破。我衰無力訪君難。願君相暇頻相過。

有懷梁仲經父

楊 奐

美人煢煢在何處。海關天低隔煙霧。珊瑚零落芙蓉空。咫尺相望迷去路。翠輦金輿雙鳳凰。風吹環佩聲琅琅。壺觴狼藉事已往。一日萬里愁茫茫。劉郎竟是誰家客。歲晚霜華林葉赤。美人煢煢在何處。鴨綠江頭江月白。

金太子允恭墨竹

劉 因

黑龍江頭氣鬱葱。武元射龍江水中。江聲怒號久不瀉。破墨揮灑餘神功。天人與竹皆真龍。墨竹以來凡馬空。人間只有墨君堂。何曾夢到瓊華宮。瑤光樓前月如練。倒影自有河山雄。金源大定始全盛。時以漢文當世宗。興陵爲父明昌子。樂事孰與東宮同。文采不隨焦土盡。風節直與幽蘭崇。百年圖籍有蕭相。一代英雄誰蔡公。策書紛紛少顏色。空山夜哭遺山翁。我亦飄零感白髮。哀歌對此吟雙蓬。秋聲瀟瀟來晚風。極目海角天無窮。黑龍江見金史。幽蘭軒義宗死所。汴亡。張蔡公以金寶錄歸。遣山嘗就公。贈錄此軸亦公得于汴之中祕者。公之子仲仁持以求予詩。故終篇及之。

金太子允恭唐人馬

劉 因

道人神駿心所憐。天人龍種畫亦然。幽星流光忽當眼。徑欲攬轡秋風前。漢家金粟幾蒼煙。江都筆勢猶翩翩。東丹獵騎自豪貴。風氣惜有遼東偏。天人秀發長白山。畫圖省識開元年。金源馬坊全盛日。四十萬匹如秦川。天教劫火留此幅。玉花浮動青連錢。英靈無復汗石馬。悲鳴真似泣金僊。只今回首望甘泉。汾



州繁華。鴈影邊。奇探竟隨轍跡盡。兀坐宛在驂騑先。人間若有穆天子。我詩當作祁招篇。

陳氏莊

劉因

陳氏園林千戶封。晴樓水閣圍春風。翠華當年此駐蹕。太平天子長楊宮。浮雲南去繁華歇。回首梁園亦灰滅。淵明亂後獨歸來。欲傳龍山想愁絕。今我獨行尋故基。前日家僮白髮垂。相看不用吞聲哭。試賦宗

周黍離離。

陳氏先父之外家也。金章宗每出獵。必宿其家。淵明謂先父龍山指孟嘉事。

渡白溝

劉因

東北天高連海嶼。太行蟠蟠如怒虎。一聲霜鴈界河秋。感慨孤懷幾千古。只知南北限長江。誰割鴻溝來此處。三關南下望風雲。萬里長風見高舉。萊公灑落近雄才。顯德千年亦英主。謀臣史君強解事。枉著渠頭汗吾鼓。十年鐵硯自庸奴。五載兒皇安足數。當時一失榆關路。便覺燕雲非我土。更從晚唐望沙陀。自此橫流穿一縷。誰知江北杜鵑來。正見海東青鳥去。漁陽搗鼓鳴地中。鷓鴣飛滿梁園樹。黃雲白草西樓暮。木華山頭幾風雨。只應漠漠黃龍府。比似愁岡更愁苦。天教遺壘說向人。凍雨頑雲結淒楚。古稱幽燕多義烈。嗚咽泉聲瀉餘怒。仰天大笑東風來。雲放殘陽指歸渡。

宋徽宗賜周準人馬圖

劉因

筆底金鞍有蕭爽。誰云不博降王長。汴梁門外若雲屯。畫本相看應自賞。十載青衣夢故都。經營慘淡欲何如。只除金粟呼風鳥。曾見昭陵鐵馬趨。

宋理宗書宮扇

劉因

杭州宮扇二好事者得之燕市。一畫雪夜泛舟。一畫二色菊。理宗題其背。有興盡爲期。及晚節寒香之句。諸公賦詩。予亦同作。

天津月明啼杜鵑。梁園春色凝寒煙。傷心莫說靖康前。吳山又到繁華年。繁華幾時春已換。千秋萬古合歡扇。銅雀香消見墨痕。秋去秋來幾恩怨。一聲白鴈更西風。冠蓋散爲煙霧空。百錢韞錦天留在。禍胎要鑿驪山宮。當時夢裏金銀闕。百子樓前無六月。瓊枝秀發後庭春。珠簾晴捲天門雪。棹歌一曲白雲秋。不覺金人淚暗流。乾坤幾度青城月。扇影無情也解愁。五雲回首燕山北。燕山雪花大如席。雪花漫漫冰峨峨。大風起兮奈爾何。

登金荆軻山

劉因

兩山巉巖插天色。中有萬斛江聲哀。人言此地荆軻館。尙餘廢壘山之隈。太子西來函關開。誰信生兒爲禍胎。筆頭斷取江山去。已覺全燕如死灰。馬遷尙俠非史才。淵明憤世傷幽懷。春秋盜例久不舉。紫陽老筆生風雷。遺臺古樹空崔嵬。平蕪落日寒煙堆。紛紛此世亦良苦。今古燕秦經幾回。憂來徑欲浮蓬萊。安得魯連同一盃。碣石東頭喚羨門。六鷲載我三山來。

幼安濯足圖

劉因

漢家無復雲臺功。生平不識大耳公。眼中天意鏡中語。此身只有扁舟東。關東諸公亦英雄。百年能辦山陽封。歸來老柏號秋風。世路悠悠七十翁。乾坤故物兩足在。霜海浮雲空復空。無刀可斷華大尉。有死不爲丕太中。丹青白帽凜冰雪。高山目送冥飛鴻。爲問蘇家好兄弟。萬古北海誰真龍。

長公愛文學。次公愛幼。安蓋氣質各以類云。

歸去來圖

劉因

淵明豪氣昔未除。翱翔八表凌天衢。歸來荒徑手自鋤。草中恐生劉寄奴。中年欲與夷皓俱。晚節樂地歸唐虞。平生磊磊一物無。停雲懷人早所圖。有酒今與龐通沽。眼中之人不可呼。哀歌撫卷聲嗚嗚。

淵明歸來圖

盧摯

留侯晚歲游赤松。武侯早歲稱臥龍。亡秦扶漢聲隆隆。淵明初非避俗翁。兩侯大節將無同。陽秋特書晉甲子。辭鋒時露長沙雄。王弘何幸奉吾足。督郵能芥平生胸。門前五柳春濛濛。落絮不與江波東。環堵蕭然吾未窮。北牕儘有羲皇風。畫圖不盡千古意。詩成一笑浮雲空。

淵明歸來圖

尚野

羲皇上人鄉里兒。田園將蕪非所思。楚聲雖託絕怨懟。高情千古歸來辭。歸來忽復河山移。忠憤意切語益微。白雲遙遙望不極。東籬舊菊西山薇。夷齊奚疑怨耶非。況乃貌此遺世資。文行圭璧照方冊。飄然髣髴空同時。子雲擬聖諸儒譏。法言美新吾誰欺。考亭夫子春秋筆。昭然晉室日星垂。

過黃陵廟

李材

黃陵廟前湘水綠。天寒漁郎唱巴曲。沙棠舟上月蒼蒼。翠蛟白蜃江茫茫。似聞清愁五十柱。萬里鴻飛楓葉暮。神鴉翻舞祠門開。珠裳玉袖露莓苔。玄猿晝啼薜蘿影。赤鱗夜去芙蓉冷。北渚淚痕斑竹紋。南風哀思蒼梧雲。山頭古桂秋露碧。山下江流豈終極。荒涼揭車雜杜蘅。靈風自吹煙霧旌。輕帆晚向芳洲泊。聊薦蘋羞奠蘭酌。沉有汜兮湘有沱。洞庭木落生層波。裴回獨詠騷人歌。

金人出塞圖

虞集

海風吹沙如捲濤。高爲陔磧深爲壕。築壘其上嚴周遭。名王專居氣振豪。肉食種飲田爲遨。八月草白雲  
颼颼。馬食草實輕骨毛。加弦試弓復置囊。今日不樂心慙慙。什什伍伍呼其曹。銀黃兔鶻明繡袍。鷓鴣小  
管隨鳴鞞。背孤向虛出北臯。海東之鷺王不驕。錦韉金鏃紅絨條。按習久蓄思一超。是時晶清天翳絕。鴛  
鵝東來雲帖帖。去地萬仞天一瞥。離婁屬望目力竭。微如聞音鷺一掣。束身直上不回折。遂使孤飛一片  
雲。頃刻平蕪灑毛血。爭誇得雋頓足悅。旌旗先歸向城闕。落日悲風起蕭屑。煙塵滿城鼓微咽。大會要王  
具甘獸。王亦欣然沃焦熱。闕支出迎騎小驥。琵琶兩姬紅顴頰。舞歌迭進醉燭滅。穹廬斜轉甃甃月。

董元夏景山口待渡圖

虞集

董元夏山何可得。嘉木千章鐵作畫。層巒總合雨氣潤。百谷正受川光溢。犬牙洲渚善汎洄。滄江散落碣  
石開。山田何處無耕鑿。尋源不得還徘徊。柳下行人將有適。臨流不度心爲惻。我楫孔堅舟孔安。奉子以  
濟諒非難。

送孟修兄南歸

虞集

老兄五月來作客。八年不見頭總白。五人兄弟四人在。每憶中郎淚霑臆。我家蜀西忠孝門。無田無宅惟  
書存。兄雖筦庫實父蔭。弟竊餘澤承君恩。文章不如仲氏好。叔氏最小今亦老。五郎十歲未知學。嗟我胡  
爲長遠道。諸兒讀書俱不多。又不力耕知奈何。憂來唯得二三友。看花把酒臨風歌。蜀山嵯峨歸未得。盤  
盤先隴臨川側。碧梧翠竹手自移。應與青松各千尺。南風吹雪河始冰。兄歸烏帽何裊裊。明年乞身向天

子共讀父書歌太平。

寄鄉友

馬祖常

河邊老父念我出，遠寄京華書一行。謂言白髮今多少，又報南園竹樹荒。門前石田秔秫熟，曠子新生走如鹿。莫戀官家有俸錢，長年作客身如束。

送蘇公赴嶺北行省郎中

王士熙

居庸關頭亂山積，李陵臺西白沙磧。畫省郎官貂帽側，飛雪皚皚馬韉溼。馬蹄雪深遲遲行，冷月悽雲塞垣明。鐵甲無光烽不驚，萬營角聲如水清。明年四月新草生，征人賣劍隴頭耕。思君遙遙隔高城，南風城樓來鴈鳴。

萬竹亭

范梈

誰能買山種萬竹，殘年請老住巴蜀。結亭更在竹中間，四面雲谿寫山麓。風敲最覺夜眠清，雨洗賸延秋望綠。日吟不限三千字，日飲定須過百斛。隴西仙翁持斧客，散馬涼城行新菊。爲言令弟隱滄江，如此風流天下獨。乃家正在蠶茨野，東東琅玕繞茅屋。方知白眼待時人，箕踞科頭自爲俗。是邦子雲劇博雅，閉門草玄食漢祿。多緣未識此君心，往事微瑕傷白玉。使君自是廊廟具，方駕前修詎爲辱。平生抱負勁直節，日暮天寒照空谷。始我瞻望望不及，終我歎嗟嗟不足。乞官倘或從西遊，向子亭邊祝黃鶴。

滋溪書堂

謝端

趙之川溥浸淥易，恆瀧泝浚各異出。惟滋有溪亦是匹，或伏或見乃不容。不能百里溥是從，混混千里俱

朝宗予曩涉河觀湖江。踔雲蕩日怒擊撞。歸視子滋嶺之瀧。是滋名楊子所始。有田有廬水之淡。有堂三楹。庫非侈。中經子史堂。右左高曾遺子。以自課。子迺善繼志。不惰。蒐今撫古。抉怪奇。泓涵演迤。吐爲辭。副墨。往往傳京師。簾金青紫。世所取。滋溪有源子有後。斯堂斯書可世守。

### 雜言

#### 觀雷溪

劉因

飛狐天下脊。老氣盤互回。三江瀉天怒。合爲一水東南來。此勢不殺令人愁。石門喜見西山開。未補青天裂。誰鑿渾沌胎。奇聲猛狀萬萬古。山根幾許猶崔嵬。兩山倒傾瀾。百丈逢顛崖。先聲動毛髮。餘爽開襟懷。初疑萬壑轉奔石。意像髣髴坤軸摧。又疑鼓角鳴地中。百步未到仍徘徊。荒祠下石磴。駭目何雄哉。春風不到太古雪。今日仍得胸中雷。穿石誰能窮窟宅。流沫勢欲浮蓬萊。平生芥蒂今寒灰。兩耳到骨無纖埃。酈元筆頭天下水。石頭之奇猶見推。乃知茲游亦奇絕。快弄素霓噴瓊瑰。東崖一片石。坐拂千年苔。爲招郎山君。共捲長鯨盃。江妃爲搗靈鼓催。赤躡躍出銀山堆。先生醉來泉灑面。狂歌一和滯聲哀。

#### 游郎山

劉因

昨日山東州。馬耳索御凌風嘶。今日軍市中。不覺已落山之西山之面背。一無異。不待風煙變化神已迷。危關度雪嶺。亂石通荒蹊。林間小草不識風。日自太古。我行終日仰羨木杪幽禽啼。但見雨色來。雲物颯以淒。忽然長嘯得石頂。痛快如御駿馬蹄。萬里來長風。五色開晴霓。長劍倚天立。皎潔瑩鷗鷺。平地拔起

不傾側。物外想有神物提。詩家舊品嵩少同。畫圖省見巫山低。誰令九華名。獨與八桂齊。千態萬狀天不知。敢以兩目窮端倪。騫騰誰避若飛隼。側瞰何屈如怒猊。千年落窮邊。煙草寒萋萋。若非酈亭書生此。鄉國物色誰省會分題。酈道元注水經說鄆山形勢最真。今涿郡有酈亭其先世所居也。乾坤至寶會有待。豈有江山如此不著幽人棲。頗聞山中

人。雲間時聞犬與雞。只疑名山別有靈境在。不許塵世窮攀躋。不是先生南游有成約。徑欲共把白雲犁。九疑窺衡湘。禹穴探會稽。玉井爛賞金芙蓉。日觀倒捲青玻璃。風煙回首莫瀟灑。南游準擬相招攜。

### 岳陽樓

張經

巴陵形勝甲天下。郡治西南有樓曰岳陽。盡得巴陵之勝。至元丙戌。余以監察御史。按臨長沙。道出巴陵。凡一往返。不暇一登。甲午夏。備員湖北憲司。分司于辰。始得以酬平昔之志。噫。湖山如此。造物者何其靳邪。因留數語。以識歲月云。

洞庭一水七百里。煙朝月夕皆經過。豈知斜陽萬里更有一佳處。君山十二盤青螺。乾坤有此樓。萬古高嵯峨。憶昨長江咫尺限。南北風霜晝夜一日千磨礱。今朝快一登。恍若驅沉痾。生平所羨鑑湖請。乃今更覺君恩多。湘靈也似知我至。時令白鳥來婆娑。鐵笛紫荊曲。春草黃陵歌。江山一醉謾不省。悲風落日生白波。愛山愛水亦非癖。奈此日月如飛梭。彭蠡銀山堆碧海。青銅磨武昌雲間。歎黃鶴。采石天外愁青娥。詩家割據幾今古。元氣發泄天不訶。扁舟歸來月一蓑。仙槎已候三山阿。吾欲乘興觀銀河。

### 題丁氏松澗圖

鄧文原

天目之峯凌紫煙。下周林壑紆長川。清池斗絕涵倒影。神運直自疏鑿先。彼美幽貞廬。間房曲奧辛夷莖。

蒼官手植經幾年。靈虬天矯今參天。門前朝流暮流水。但聞激石瀉瀨鳴濺濺。山人養真衡茅下。有書可讀琴可弦。意行清澗曲。長嘯松風前。山月出林高。溪花弄春妍。仙人欲來夜將半。天空鶴唳山淒然。飈塵大笑狂馳子。口誦丹訣傳真玄。我欲從之結鄰屋。得疏藥圃謀芝田。

留別金門知己

李 洞

我本山人素志丘壑。獲歸名山。爲願畢矣。爰以四月十一日。離京師。是夜抵潞陽。慨然賦詩。遙慰匡廬隱者。併以寄金門諸公。爲一矇云。

野馬脫羈鞅。條疑天地寬。臨風一長鳴。風吹散入青冥間。頗如魯仲連。蹈海不復還。又如安期生。長留一寫令人看。江南浩蕩忽如海。落日照耀浮雲關。旣不能低眉伏氣。摧心顏。詭遇特達驚冥頑。又不能抱書挾策千萬乘。調笑日月相迴盤。匡廬迢迢接仙山。仙翁泛若秋雲閑。長松之陰引孤鶴。望我不見空長歎。采鉛天池津。飲淥桃花灣。蒼梧倒影三湘寒。赤城霞氣生微瀾。鯨鯢翻空海波赤。曉色欲上扶桑難。人間之樂兮。誠不足恃。何如歸臥棲巖巒。棲巖巒。臥巖穴。夜半天風吹酒醒。猶有西溪萬年月。

先天觀

范 梈

學仙之人與山爲徒。往往在台廬之奧。湖江之區。張公鍊丹作龍虎。丹成御氣游六虛。後來出者絕代無。復有逸人住玄都。玄都之壇角井孤。上摩萬里之黃鵠。下伏千尺之飢飈。陰森檜筠自太古。斬種力與開闢俱。樽桑朝日挂絕壁。坐見觀閣青模糊。擘厓控弦寫哀壑。秋春雲露之田腴。我亦人間山澤臞。偶陪時寵賓。唐虞有時一醉黃公壇。震風三日撼不蘇。華折不得度弱水。揮手始識仙凡殊。玉堂學士危與吳。遺



我茲山之畫圖。尋臆數戶久歎息。無因置我雙擗蒲。獨行幽人不受呼。掃葉青澗聽啼鳥。日暮蘿徑相縈紆。相縈紆。向何處。明朝爲借麻姑鵬。我亦騎之上天去。

### 雜體

#### 入安南絕不作詩清明感事集句

十里宜春下苑花。五年寒食住京華。自憐慣識金蓮燭。奉使虛隨八月槎。回首扶桑銅柱標。芙蓉帳暖度春宵。清明寒食誰家哭。折戟沉沙鐵未消。水流花謝兩無情。獨上高樓望帝京。閑憶金明池上路。人生看得幾清明。江東行客思悠哉。不盡長江滾滾來。寒食清明都過了。鷓鴣飛上越王臺。台州城闕海冥冥。人踏金鼈背上行。獨在異鄉爲異客。無花無酒過清明。慈母年高鶴髮垂。鄉書無鴈到家遲。初過寒食一百六。一日思親十二時。昔藉梨花作寒食。孟光舉案與眉齊。越裳翡翠無消息。夜合花前日又西。寒食家家出古城。滿川風雨看潮生。八千里外飄零客。起向朱櫻樹下行。一百五日寒食雨。風光別我苦吟身。尙書氣與秋天杳。同是天涯淪落人。海上乘槎上紫氛。清明時節雨紛紛。虎牙銅柱皆傾側。水盡天南不見雲。

#### 遠遊聯句

王寅冬與伯長同留  
姑蘇時伯安將赴都

陳孚

袁真

海鵬跨南雲。一去挾浩蕩。宛駒踏北雪。絕足追罔象。宵征車載脂。梅明發燈在幌。行邁念悄悄。離愁懷養。養違吳始按浙。哀過越猶指掌。虹網結長思。羯鼓促新響。觴至不復辭。梅駕逸誰能。彷彿明堂企棟梁。武庫須篠簜。材同瑚璉英。哀學媿蓬麻。長大施朱弦。清小薦金莖。沆雲間鶴孤唳。梅天外鴻橫上。曉舫斫輕冰。午店憩平壤。追攀瞰烟濤。哀涉歷走塵鞅。清淮橋蟬棘。薄霧裘驪駮。風臺牛一鳴。梅日觀雞三唱。團桑沃如蓋。宿草亂若綉。青帘客沽酒。哀素鬣漁收網。心觀洙泗流。眼豁恆岱爽。追程騎侵雲。梅勸耕農植杖。俗厚喜豐登。氣俠存慨慷。伊河既東流。哀維斗復北仰。誰云風土殊。始覺宇宙廣。骨聳終超騰。神清誰懔懔。悅鈞天夢豈真。梅廣寒步空想。銖衣入閭闔。芥粒視圯塊。千官紫府榮。九奏彤庭暢。摛文翦金炬。哀展窠簇天仗。清都踰咫尺。弱水謾方丈。絳旗雲霧開。寶扇日月晃。仁聲被八表。梅德意昭羣。枉泥檢極封崇。芬飴嚴胙饗。瑞氣藹重重。泰階瞻兩兩。駝峯出天廚。哀裏蹶錫中帑。鳴珂接俊彥。正笏遠偏黨。德人笑采芝。逋客棄拾橡。茅拔要有方。梅矢來本無響。湘纍但瓊詞。越相僅金像。遭讒氣徒憤。得計身何往。豈如及承平。相與窮昭朗。君行步飄飄。我滯心悒悒。輕霜著裘帽。哀微雪留草莽。離歌出蒹葭。古製卻盆盎。先登匪一獲。後至激孤獎。城南燈火深。梅塞北音書咤。春風漸披拂。臘水將澗澆。詩成愈加險。酒盡未爲彊。雙眸秋水炯。哀累語春波盪。經行度崎危。交友希僮僕。羈遊棄楚荒。遠客憐齊兪。光陰尺璧重。梅事業千金賞。行還鴈塔題。復覩鴻都榜。時來戒步窘。事至勿技癢。脂韋本凡近。哀鐵石乃忠讜。詞林納疵美。書田計荒穰。列仙會儒壘。羣仕趨吏駟。陸生強啣囁。陶令終翫髒。清心百壬避。正色上帝饗。徒爲捧心施。莫學畫眉斂。功名要無心。造物端有相。行行遂初志。操持記疇曩。梅

# 元文類卷之六

## 五言律詩

春思

張澄

一春常作客。連日苦多風。野樹淒迷綠。簷花暗澹紅。愁隨詩卷積。囊與酒樽空。巢燕如相識。頻來草舍中。

觀物

許衡

萬物備吾身。身貧道未貧。觀時見物理。主敬得天真。心爽星辰夜。情忻草木春。自憐斲喪後。能作太平人。

趙氏南莊

許衡

曉起北窗涼。清談戢羽觴。入簾花氣重。落地燕泥香。夢裏青山好。吟邊白日長。秋風載書籍。相對築茅堂。

晚上易臺

劉因

遺臺連廢壘。落日展遙岑。海嶺天東北。燕遼世古今。每當多感慨。直欲罷登臨。莫更留塵跡。千年不易禁。

登武陽城

劉因

朝遊樊子館。晚上武陽城。潮接滄溟近。山從碣石生。斷虹雲淡白。返照雨疎明。且莫悲吟發。樵歌已愴情。

雜詩

劉因

堯山唐故國。淳朴帶遺蹤。種果收奴力。開田享素封。採收多上藥。景仰近神峯。夢寐驅黃犢。巖居二老農。

其二

聞昔蜚狐口。奇兵入擣虛。人才九州外。天道百年餘。草木皆成騎。衣冠盡化魚。遺民心膽破。諱說戰爭初。

其三

冀北高寒境。英靈海岳全。斯文若程邵。家世亦幽燕。祀典今誰舉。遺經會有傳。吾鄉此盛事。瞻仰在他年。

其四

關嶺通山後。風謠采路傍。地寒人好壽。草淺畜宜羊。用水如奴婢。從川貯米糧。西風如有約。乘興卽吾鄉。

其五

何事招提好。山深馬可驅。松巢低暎帽。竹溜細通廚。霜粟千封戶。雲屏四畫圖。冠巾如用我。白鹿起規模。

其六

巖居訪高道。少日在風塵。回首話前事。低眉厭此身。江山資寇盜。田畝化荆榛。領取天倫重。無君愁殺人。

其七

水繞千山合。雲藏數畝荒。初尋香有陣。漸入翠成行。豚穿依危石。牛蹊帶小塘。團茅罨如畫。可惜是逃亡。

過奉先

劉因

閔遼承宋統。此志亦雄哉。置縣名猶在。因山勢已摧。百年元魏史。千古汝南哀。華表鶴應有。悲風海上來。

齋居雜言

何榮祖

名教無窮樂。真知在暮年。中庸萬事畢。太極一心全。世事頻觀易。人情靜看天。興來時有句。率爾亦飄然。

寄暢純父治中

欲聞真息耗。無使梓潼來。烽火平時報。田疇亂後開。徒歌王粲賦。不直士元才。遙憶牛頭寺。思親日幾迴。

姚燧

輿病高崖道中作

役役乾坤遠。栖栖道路頻。五年三入蜀。十夢九歸秦。瘡鬼偏凌客。山英定笑人。無勞問前渡。祇覺白頭新。

姚燧

舟達黃溪

草木隨寒暑。殊方榮悴同。葦華兼露白。檉葉未霜紅。日月雙飛鳥。江湖一病翁。晚來沙嶼上。愁坐獨書空。

姚燧

發舟青神縣

青神開百丈。江岸轉荒涼。薛荔緣松起。蒹葭並竹長。深披豺虎徑。毒犯虺蛇鄉。何莫非王事。牽夫可惋傷。

姚燧

感事

致位丞疑地。夔龍伯仲間。星當朝北斗。日已薄西山。取謗因讎惡。貪權失丐閑。此行雖鐵甲。未足比慙顏。

姚燧

次韻書事

野性元孤潔。無朋儘自皤。業荒聞道淺。靜久閱人多。靈鳳寧棲枳。冥鴻本避羅。南遊有高興。何處是滄波。

安熙

病中齋居雜詩

多病交游少。相看動浹辰。賦詩聊遣興。觀化足怡神。問字有知己。過門無俗人。伊誰同此樂。願許卜東鄰。

安熙

進詩一首

十年陪顧問。一旦決安危。自合成功去。應慚見事遲。長城何自壞。孤注莫相疑。辟穀求仙者。高明百世師。

李孟

岳陽樓待渡

高思恭

楚水凝千里，湘雲隔萬層。城高秋浦月，星雜夜船燈。旅況天誰管，年光鴈可憑。殷勤澹山色，相送過巴陵。

泊舟湘岸

李材

長沙今在眼，青草舊知名。二月風檣疾，三湘雪浪平。藤深帝子廟，花發定王城。莫艤江南岸，啼鵲處處聲。

遊山寺

李材

行行行復止，行到白雲間。見客意不俗，逢僧心便閑。細泉分別澗，小逕入他山。擬借禪房榻，追遊信宿還。

送蘇子寧赴嶺北行省郎中

袁桷

貂帽護寒沙，冰天閱歲華。斷溪駝聽水，密雪犬行車。雲盡難尋鴈，春深未識花。昔人奇絕處，八月解乘槎。

又

往歲經游地，寒蕪碧燐深。雲開山後陣，水咽隴頭吟。雪白氈房重，天青羽檄沉。重華新雨露，悲喜候車音。

名酒

虞集

名酒不可得，幽華誰送來。秋霜垂鬢髮，夕照在樓臺。盡日山公醉，何年庾信迴。喚人吹玉笛，移席坐蒼苔。

題秋山圖

虞集

峯迴留深隱，天清襲素袍。棲身斷人蹟，游目送鴻毛。樹挂栖厓鷲，藤懸飲子猿。龍眠石澗冷，虎撼樹根牢。木客吟時共，山樵弈處遭。浮雲過水盡，孤月挾霜高。羽使來三島，胎仙舞九皋。左招玉斧飲，右攬赤松遨。空色收寥廓，虛聲起繹騷。彈琴遺古散，載酒棹輕舸。遂向圖中見，誰能世外逃。乘槎幾月至，一泛九秋濤。

送國王朵而只之遼東

虞集

太祖收中夏。元臣有武功。建邦開土宇。爲位冠君公。奕世王章在。諸孫相業隆。春秋周正月。禮樂魯新宮。鹿幣金遺耐。熊侯算失中。河山仍鐵券。寶玉若瑀弓。投筆鄒枚秀。揚旂芮綰雄。寒雲依碣石。凍雨灑遼東。戎器蘂藏盡。賢書奏納同。大夫勞轡御。惇史采民風。

朝回卽事

虞集

宮樹春陰合。霓旌拂曙來。天光臨閣道。雲氣轉蓬萊。晝漏沉沉鼓。晨尊灑灑盃。香霏簾底霧。樂殷殿前雷。祥瑞儀曹奏。珍淳尙食催。舞筵分鷺序。效獻過龍媒。融雪徵生草。輕風不動埃。老人南極至。王母上方回。玉色何多喜。金華得重陪。裁詩賀新雨。西閣待門開。

石田山居

馬祖常

甲子人愁雨。河田麥已丹。歲凶捐瘠衆。天遠禱祠難。賈客還沽酒。王孫自飽餐。更憐鷺面黑。征戍出桑乾。

其二

積雨衣裳溼。愁人是麥田。泥將深沒馬。霧欲墮飛鳶。爨火勞薪盡。家居老屋穿。牆根雜蛙蚓。擬買繫籬船。

其三

光山楓製錦。潢浦荻飛綿。穠熟何論酒。魚來不計錢。卜鄰多野老。求藥有神仙。爲客留羹筍。清晨步石田。

其四

四月淮天雨。清林蔭碧池。筍香鄰蠶酒。禽響客臆基。田鼓春迎社。鄉巫夜賽祠。漸知飄泊久。自覺是農師。

其五

無麥夫何極。吾憂隴畝空。豈能驅盜賊。得忍鬻兒童。茶藜充腸熟。樵蘇救口窮。無端縣小吏。召役到疲癯。

其六

作客何多意。淮南卽是家。自牽蘿屋小。不正葛巾斜。書嬾眠尤熟。詩來酒更賒。春天雲嫵媚。相對坐鷗沙。

其七

竟日無賓主。山房一禿翁。竹光浮晝碧。花藥颺春紅。田父分雞塊。鄰僧與鶴籠。時行親杖屨。未覺坐書空。

其八

淮南窮僻地。先世有林廬。花曙鳴山鳥。芹春躍岸魚。鼓琴仙度曲。種杏客傳書。朋舊如相覓。休噴禮法疎。

郎中蘇公哀挽

馬祖常

墓門翁仲泣。秋草九原深。身世書盈屋。鄉園樹滿林。故人多執紼。令子蚤冠簪。曾作陽關曲。今成薤露吟。

癸酉除夕

劉汶

此夕何多感。明朝過六旬。乾坤又元統。人物少咸淳。酒厭山杯滌。梅傷水國春。燈前曾戲綵。馬首一沾巾。

早春述懷

劉汶

春與年年別。窮隨日日增。眼明貪夜讀。事少忘晨興。倦鳥猶遷木。潛魚已陟冰。栖遲唯故轍。無夢到飛騰。

七言律詩



杏花落後分韻得歸字

元好問

癡髓能醫病頰肥。鸞膠無那片紅飛。殘陽淡淡不肯下。流水溶溶何處歸。煮酒青林寒食過。明妝高燭賞心違。寫生正有徐熙在。漢苑招魂果是非。

長安感懷

楊奐

此心直欲作東周。再到長安已白頭。往事無憑空擊楫。故人何處獨登樓。月搖銀海秦陵夜。露滴金莖漢殿秋。落日酒醒雙淚眼。幾時清渭向西流。

洛陽懷古

楊果

洛陽雲樹鬱崔嵬。落日行人首重回。山勢忽從平野斷。河聲偏到故宮哀。五噫擬逐梁鴻去。六印休驚季子來。惆悵青槐舊時路。年年無數野棠開。

南京遇山樓

劉祁

倚天突兀聳高樓。樓上人家白玉鈎。落日笙歌迷汴水。春風燈火似揚州。仙人已去名空在。豪客同來醉未休。獨倚朱闌望明月。鸞旌依約認重游。

戊辰冬赴試西京

王革

慣擊蒼龍曉漏鐘。受恩曾入大明宮。香浮扇影迎初日。人逐鞭聲靜曉風。轉首俄驚成異世。此身雖在已衰翁。喚回五十年前夢。再著麻衣待至公。

題劉京叔歸潛堂

薛玄

獨構茅堂養道真。滿前俗事罷紛紛。礚溪夜釣波心月。汾曲春耕隴上雲。長笑熊羆勞應夢。肯教猿鶴怨移文。近來傳得安心法。萬壑松風枕上聞。

秋思

杜瑛

壯心忽忽劇懸旌。秋氣能令客子驚。白鴈不聞雲外過。清霜先向鬢邊生。銅駝巷陌周東土。金鳳樓臺鄴北城。千古繁華俱一夢。空餘草木戰風聲。

和家弟誠之詩韻

段克己

欲歸誰不遣君歸。卻恨歸來事事違。烽火未休家信少。山川良是故人稀。黃金入手還能散。白雪盈頭不肯飛。試問春愁都幾許。長江滾滾日暉暉。

雨後漫成

段成己

羈思紛紛不易裁。晚涼扶病獨登臺。翩翩幽鳥避人去。殷殷輕雷送雨來。已拚此身閑裏老。且將笑口酒邊開。安車待聘非吾事。休作孤山隱逸猜。

七月望日思親

許衡

思卻千思與萬思。音容無復見當時。草牕夜靜燈前語。蔬圃春深膝下嬉。將爲百年供色養。豈期一日變生離。太山爲礪終磨盡。此恨綿綿未易衰。

燕城書事

魏瑤

山勢回環西北高。強燕自古出英豪。地連雲朔偏宜馬。人襲衣冠盡帶刀。塵暗玉樓無鳳宿。雲埋金水似

龍輅可憐一片繁華地。空見春風長綠蒿。

送魯齋先生南歸

張易

袞袞諸公入省闈。先生承詔獨南歸。道逢時否貧何病。老得身閑古亦稀。行色一杯燕市酒。春風三月故山薇。到家已及蠶生日。布穀催耕隴麥肥。

聞家大參南歸

林景熙

濱死孤臣雪滿頭。冰氈蠶盡偶生全。衣冠萬里風塵老。名節千年日月懸。清淚秋荒遼海鶴。古魂春冷蜀山鵑。歸來親舊驚相問。禾黍離離夕照邊。

挽文丞相

徐世隆

大元不殺文丞相。君義臣忠兩得之。義似漢皇封齒日。忠於蜀將斫頭時。乾坤日月華夷見。海嶺風霜草木知。只恐史官編不盡。老夫和淚寫新詩。

次范藥莊韻

宋 衛

家近西湖六月涼。蘭舟桂醕菱荷裳。海門潮上波濤壯。天竺風來草木黃。今日悲秋哦楚些。他年著論辯吳亡。君才位置聞人說。宜待詩仙七寶牀。

過鄉縣西方古故居

劉 因

古金大定間人。嘗舉進士不第。遂歸。獨居一室。置琴書其側。不妄與人交。縣令佐公服候門。亦以遜辭謝遣之。有田數十畝。食其所穫。如菽熟。惟食菽。鄉人好事者。欲以米易之。不聽。曰。是天所食者。不可易也。監

察御史。按行郡邑。按其行上之。不報。其爲人蓋亦近於聖學之所謂狷。史家之所謂獨行者歟。先父每舉以律鄉人之貪鄙者。故鄉人至今能道之。古死無後。其丘壠已爲樵牧區。今過其居。亦莽焉荆棘中矣。不覺感歎。夫發潛德而紀先賢。實後生之責也。顧力未能焉。姑題詩以紀先父之訓云。

名姓初聞自過庭。山田力食老窮經。鄉閭月旦歸公論。耆宿風流尙典刑。感事重吟鳧繹集。懷賢誰築聘君亭。還家游子悲千種。念舊思親淚最青。

晚眺

劉因

巖姿濃淡似吾詩。雲點青山學鬢絲。老樹遺臺秋最早。斜陽流水鳥偏遲。無人能解此時意。如我曾來前古誰。本爲登臨解陶寫。豈知搖落更堪悲。

易臺

劉因

望中孤鳥入消沉。雲帶離愁結暮陰。萬國河山有燕趙。百年風氣尙遼金。物華暗與秋光老。杯酒不隨人意深。無限霜松動巖壑。天教搖落助清吟。

望易京

劉因

亂山西下鬱岩巖。還我燕南避世謠。天作高秋何索寞。雲生故壘自飄蕭。誰教神器歸羣盜。只見金人泣本朝。莫怪風雷有餘怒。田疇英烈未全消。

海南鳥

劉因

越鳥羣飛朔漠濱。氣機千古見眞純。紇干風景今如此。故國園林亦暮春。精衛有情銜太華。杜鵑無血到

天津聲聲解墮金銅淚。未信吳兒是木人。

朝回再次楊司業韻

吳澂

風吹仙樂下瑤臺。闔闔中間翠輦來。雲擁紅光千丈遠。日行黃道九天開。百官星拱環金闕。萬壽聲迴進玉盃。共覩太平新氣象。四方犴獄長春苔。

代祀南嶽登祝融峯

趙世延

天風吹我躡雲根。一覽羣山蟻垤紛。瀛海波翻初日上。石壇人語半空聞。炎荒作鎮荆吳遠。元氣流形天地分。何日束書煨芋室。孤峯絕頂看浮雲。

駕畋柳林隨侍

陳益稷

仙仗平明擁翠華。景陽鐘發海東霞。千官捧日臨春殿。萬騎屯雲動曉沙。白鶴翻山霧薄。黃龍旗拂柳風斜。太平氣象民同樂。南北梯航共一家。

題許仲仁詩卷

程鉅夫

殘雪詞林退食時。小牕開卷鬢如絲。音傳正始誰同調。氣逼元和稍自持。文字不隨前輩盡。風流卻許後人知。霜清日冷梅花瘦。獨對爐熏看欲癡。

岳陽樓

梁曾

樓前秋水健帆開。樓上涼風舞袖迴。萬里舟航通鳥道。四時雲雨護龍堆。江山如此不一醉。歲月幾何能再來。欲問老髯求鐵笛。月中吹上紫荆臺。

題麻姑壇

郝天挺

路入雲關仙境佳。瓊田瑤草帶煙霞。貯經洞古無遺檢。養藥爐存失舊砂。青鳥不傳金母信。紫鸞應返玉皇家。巖扉不掩春長在。開盡碧桃千樹花。

都門春日

李材

綺陌香塵逐玉珂。彤樓花暗弄雲和。光風已轉瀛洲草。細雨微生太液波。月榭管絃鳴曙早。水亭簾幕受寒多。少年易感傷春思。喚取青娥對酒歌。

禁城秋夕

李材

絳宮星淡海無波。九陌猶聞動玉珂。閭闔微雲藏夕漏。建章明月挂秋河。此身天地流萍遠。故國關山落木多。欲聽鈞天塵夢隔。紫簫吹盡桂婆娑。

元日賀裴都事朝回

李材

海上瓊樓接五城。人間歌吹近蓬瀛。雲移豹尾旌旗動。日射螭頭劍佩明。拜舞盡隨仙仗入。退歸遙認玉珂鳴。欣欣百草含春意。得傍東君暖處生。

壽杜侍御

李材

黃閣老臣踵夔谷。法冠蒼佩陪霓旄。八龍委蛇捲春雨。一鶚搏控明秋毫。華勳玉冊耀天府。雄章銀筆翻雲濤。舉觴獻壽碧桃晚。南極正與文星高。

和王御史春詩韻

李材

鶯啼燕語花漸稀。天明海碧涵晴暉。洛陽臺榭春色在。山陰衣冠昔人非。夢雲何處譙瑤席。舞雪誰家裁紵衣。獨有倚闌無限思。迢迢煙草暮鴻飛。

送省郎楊耀卿使雲南

李材

飄飄使節出金閨。郭隗臺前暫解攜。天入五溪無鴈到。地經三峽有猿啼。子雲舊里風煙在。太尉家聲日月齊。後夜客槎何處望。秋河迢遞碧雲低。

席上賦老松怪柏圖

李材

仙人解衣盤薄羸。造化慘澹秋毫端。枝柯千仞入層漢。笙籟萬壑鳴驚湍。堂中日月不可老。壁上雷雨何時乾。我來醉臥北窗下。夢跨黃鵠天風寒。

次韻答友見贈

安熙

高山流水趣何深。萬古千秋一素琴。白石清泉成雅志。光風霽月負初心。伏龍應羨雲生谷。獨鶴不驚鴉滿林。無用野夫宜揣分。商家元自有甘霖。

留別都城諸公

李京

蒼龍雙闕鬱岩巖。會侍鸞鸞趁早朝。往事已隨塵滾滾。虛名贏得鬢蕭蕭。長林豐草空相憶。瘴雨蠻煙苦見招。借問都門門外柳。爲誰留著最長條。





# 元文類卷之七

## 七言律詩

聞擣衣

露下碧梧秋滿天。砧聲不斷思綿綿。北來風俗猶存古。南渡衣冠不及前。苜蓿總肥宛驥瘦。枇杷曾泣漢嬋娟。人間俯仰成今昔。何待他年始惘然。

趙孟頫

溪上

溪上東風吹柳花。溪頭春水淨無沙。白鷗自信無機事。玄鳥猶知有歲華。錦纜牙樯非昨夢。鳳笙龍管是誰家。令人苦憶東陵子。擬問田園學種瓜。

趙孟頫

道場山

絕頂清秋凌翠煙。登臨應費酒如川。平生能著幾兩屐。負郭何須二頃田。初日出雲光射地。雙溪入湖波接天。升高望遠我所愛。青壁有路何當緣。

趙孟頫

蛾眉亭

天門日湧大江來。牛渚風生萬壑哀。青眼故人攜酒共。兩眉今日爲君開。蒼崖直下蛟龍吼。白浪橫空鶴鷺迴。南望青山懷李白。沙頭官渡苦相催。

趙孟頫

多景樓

趙孟頫

層巒官閣幾時修。繞檻長江萬古流。白露已零秋草綠。斜陽雖好暮雲稠。平南籌策張華得。治內人才葛亮優。景物未窮登覽興。角聲孤起甕城秋。

雨花臺

因至故人劉叔亮墓

趙孟頫

雨花臺上看晴空。萬里風煙入望中。人物車書南北混。江山襟帶古今同。昆蟲未蟄霜先蠶。鳳鳥不鳴江自東。綠髮劉伶緣醉死。往尋荒冢酹西風。

過岳王墓

趙孟頫

鄂王墳上草離離。秋日荒涼石獸危。南渡君臣輕社稷。中原父老望旌旗。英雄已死何嗟及。天下中分遂不支。莫向西湖歌此曲。水光山色不勝悲。

錢唐懷古

趙孟頫

東南都會帝王州。三月鶯花非舊游。故國金人泣辭漢。當年玉馬去朝周。湖山靡靡今猶在。江水悠悠只自流。千古興亡盡如此。春風麥秀使人愁。

海子卽事

趙孟頫

白水青林引興多。紅裙翠黛奈愁何。底從暮醉兼朝醉。聊復長歌更短歌。輕燕受風迎落絮。老魚吹浪動新荷。餘杭溪上扁舟好。何日歸休理釣蓑。

弁山佑聖宮次孟君復韻

趙孟頫

意行騎馬到林間。晴霧都沉遠近山。瓊樹著花春自早。翠禽雙語意相關。一杯到手先成醉。萬事無心觸處閑。猶欠抱琴來託宿。靜中規寫水潺潺。

城南山堂

趙孟頫

手種青松一萬栽。草堂留在翠屏隈。推窗綠樹排簷入。臨水紅桃對鏡開。山雉雖迎朝日去。暝禽啼傍夕陽來。老妻也有幽棲意。數日遲留不肯迴。

春日言懷

趙孟頫

點點飛花欲送春。萋萋芳草正愁人。黃蜂釀蜜經營急。紫燕銜泥來去頻。才似茂陵非晚遇。美如曲逆不長貧。久知求富都無益。但喜論詩若有神。

紀舊游

趙孟頫

二月江南鶯亂飛。雜花開樹柳依依。落紅無數迷歌扇。嫩綠多情妬舞衣。金鴨焚香川上暝。畫船搥鼓月中歸。如今寂寞東風裏。把酒無言對夕暉。

東陽八景樓

趙孟頫

山城秋色靜朝暉。極目登臨未擬歸。羽士曾聞遼鶴語。征人又見塞鴻飛。西流二水玻璃合。南去千峯紫翠圍。如此山川良不惡。休文何事不勝衣。

贈周景遠田師孟

趙孟頫

與子同客帝王州。一日不見如三秋。風高氣肅鴈聲急。天晴日暖蛛絲游。籬下黃花爲誰好。水邊紅樹令

人愁世間萬事可撥遣。日日痛飲醉卽休。

金陵懷古

趙孟頫

銅雀春深漢苑空。邯鄲月冷照秦宮。煙花樓閣西風裏。錦綉湖山落照中。河水南來非禹迹。冀方北去有唐風。溪城秋色催遲暮。愁對黃雲沒斷鴻。

和周待制朝迴詩韻

袁桷

雉尾高張擁玉皇。彤庭金榜粲明光。舞階飛絮呈滕六。執銳傳臚轉阿香。珠帽簫聲雙窈窕。翠旌雲影互方洋。侍臣誰近前階立。願紀堯年化日長。蛾眉班肅整皇皇。恰匝松陰漏午光。舞翻當軒催進酒。表函登陛促傳香。六龍捧御雲中日。三象輸琛嶺外洋。欲識兩宮清淨理。薰風殿角漏初長。

無題次伯庸韻

袁桷

金縷歌殘月滿江。玉顏曾憶侍油幢。象牀雲重恩專一。鯨錦波翻賜疊雙。春淺正宜氈作幕。夜涼深恨魴爲窗。浣紗可是無靈匹。側足寒溪濺石淙。翠簾匝匝護朱光。千葉宮桃滿院香。闈苑有鸞通尺素。靈橋無鵲寄流黃。上林賦罷歸巴蜀。與慶詞工謫夜郎。不是月中親度曲。世人那解聽霓裳。相期來似石城潮。日望晴虹結綵橋。卻月眉愁歌漸遠。淩波步近意非遙。抽琴有恨迴清角。疊袖無塵轉綠腰。弄玉最憐隨鳳去。秋來誰與伴吹簫。

白髮詞臣兩耳垂。華腴堆笏陋牛豨。宮娥引燭催麻日。院吏傳更寫制時。蠟撚化生秋夕賜。翠標疊勝歲華移。低頭欲說唐朝舊。願侍虛皇進玉卮。

奉題延祐宸翰

鄧文原

欽惟仁宗上承祖武。蒐羅俊彥。求治靡寧。尤尊禮儒臣。務敦風化。由是治書侍御史臣郭貫。擢禮部尚書。凡在選者六人。惟貫進秩有加。親灑宸翰。昭示龍光。忝備臣僚。咸增鼓舞。集賢直學士臣鄧文原。謹拜手稽首而作詩曰。

宵旰需賢表薦紳。秩宗首選贊華勛。官聯天府璇璣象。帝闡河圖琬琰文。曾聽簫韶瞻曉日。仰攀弓劍泣秋雲。小臣作頌稱仁聖。湛露承恩未足云。

題小薛王畫鹿

鄧文原

禮樂河間雅好儒。曾陪校獵奉鑾輿。晝長靈囿觀遊後。政暇嘉賓燕集餘。蛺蝶圖工人去久。騶虞詩好化行初。宗藩翰墨留珍賞。憑仗相如賦子虛。

陪高彥敬游南山

鄧文原

不到南山又二年。離離秋草映寒泉。東林蕭散開蓮社。西晉風流棹酒船。古寺雲煙終日合。長松風雨半空懸。謝公未了登臨興。故向禪房借榻眠。

郎中蘇公哀挽志道

鄧文原

塞垣重鎮雪雲堆。晝諾人稱幕府才。流馬道艱逢歲儉。涸魚民困得春回。陽關猶記歌三疊。杜老俄成賦

八哀夜靜燕臺山月冷。祇疑化鶴一歸來。

司業李公哀挽元禮

賁奎

山立庭紳聳衆觀。名高真不愧儒冠。文章清廟藏琛玉。勳業烏堂鎮羽翰。譽重朝端知有子。貧憐身後似無官。百年耆舊彫零盡。展卷哀辭忍淚看。

內翰哀挽憚

張養浩

東髮耽經晚益勤。平生精力盡斯文。先朝十老今餘幾。當代三王獨數君。李賀屢煩韓愈駕。羊曇空阻謝安墳。玉堂寥索人何在。落日淇川滿白雲。

送袁待制扈從上京

虞集

日色蒼涼映赭袍。時巡無乃聖躬勞。天連閣道晨留輦。星散周廬夜屬櫜。白馬錦韉來窈窕。紫駝銀甕出蒲萄。從官車騎多如雨。獨有揚雄賦最高。

朝迴和周待制韻

虞集

三十六竿吹鳳皇。九重春色絢天光。卿雲微動旌旗煖。湛露初晞草木香。貝葉神師東度嶺。金輿馴象北溟洋。小臣職在歌功德。拜手陳詩對日長。

送朱生南歸

虞集

喜子南歸肝水上。經過爲我問臨川。幾家橘柚霜垂屋。何處蒹葭月滿船。應有交游憐遠道。試從父老說豐年。寒機早晚成春服。一一平安報日邊。

題南野亭

虞集

門外煙塵接帝廡，坐中春色自幽亭。雲橫北極知天近，日轉東華覺地靈。前澗魚游留客釣，上林鶯囀把杯聽。莫誇韋曲花無賴，獨擅終南雨後青。

歸蜀

虞集

我到成都住五日，駟馬橋下春水生。過江相送荷主意，還鄉不留非我情。鷓鴣輕筏下溪足，鸚鵡小窗呼客名。賴得邛笥酒易醉，夜深衝雨漢州城。

自仁壽迴成都

虞集

還鄉思速去鄉遲，王事相縻敢後期。里父留看題壁字，山僧打送捨田碑。胡桃筇竹南方要，盧橘枇杷上國知。此日君親俱在望，徘徊三顧欲何之。

謝周南翁

虞集

使過池陽聞上日，好懷浩蕩爲君開。江干維楫車馬集，亭上持盃風雨來。通夜魚龍聽語竟，明年鴛鴦憶朝迴。九華秋色翠可食，爲問謫仙安在哉。

送李通甫赴湖南行省都事

虞集

黃鶴樓前江水春，江花飛接渡江人。日長青瑣文書簡，雨過滄州杜若新。應共庾公揮扇坐，每尋崔顥賦詩頻。三公舊掾多爲相，行見迴車載繡茵。

御溝詩次宋顯夫韻

虞集

御溝雪融三月初。鳧鷖鴻鴈總來居。蒲萄水綠可爲酒。楊柳條青堪貫魚。逶迤天河起箕尾。滉漾雲海浮青徐。舟前花落傍飛燕。隄上風來溼舞裾。翠輦時留金腰褭。錦波不著玉芙蓉。臨流宋玉偏能賦。莫待東都客問予。

試院書事

馬祖常

棘闈粉署隔重牆。校藝分官屬正郎。五夜風簾燒蠟燭。九天冰樹剌龍香。周旋接武尙書履。供帳留茵御史牀。臚唱閣門春色曙。侍臣應奏慶雲章。

題光山縣孔宰幽風亭

馬祖常

光山近在故山西。樹滿岡頭稻滿畦。鄰屋讀書相教授。社祠醉酒共提攜。水牛礪角嫌畊少。野蠶抽絲喜價低。春雨行田無從吏。獨騎齋馬畏青泥。

送宋顯夫南歸

馬祖常

琵琶溝北識君初。藉甚才華二十餘。欲賦兔園千孝邸。不因狗監進相如。瀟湘路熟逢知己。韋杜天低望故居。攜幼歸來拜丘壟。南游莫戀武昌魚。

駕發

馬祖常

蒼龍對闕夾天關。秋駕凌晨出國門。十萬貔貅騎驪竄。一雙日月繡旗旛。講蒐獵較黃羊圈。錫宴恩沾白獸尊。赫奕漢家人物盛。馬卿有賦在文園。

送袁德平歸越

王士熙



平湖如鏡靜秋波。禹穴西風捲碧蘿。狂客有船都載酒。道人無字不籠鵝。牀頭舊笏青雲近。窗下殘編白雪多。燕市塵深拂衣去。海門何處問漁蓑。

送王在中代祀秦蜀山川

王士熙

太華雲連蜀棧低。柳花三月紫駟嘶。香浮曉露金匱溼。旛拂春煙絳節齊。策牘當年登桂苑。詞林後夜起芝泥。長安遊客應無數。誰共王褒頌碧雞。

題郭忠恕九成宮圖

王士熙

鐵馬歸來定太平。九成宮殿暑風清。龍蟠古洞長藏雨。鳳入層臺自度笙。畫棟塵空巢燕去。蒼崖雲掩路碑橫。秦川忽向丹青見。魂夢依稀識化城。

驪山宮圖

王士熙

翠嶺含煙曉仗催。五家車騎入朝來。千峯雲散歌樓合。十月霜晴浴殿開。烽火空臺留草樹。荔枝長路認塵埃。月中人去青山在。始信昆明有劫灰。

題鮮于伯幾與仇廉訪帖

王士熙

三生文采趙公子。四海聲名仇使君。彈琴不作廣陵散。焚香遙駐博山雲。玉署春來鬢漫語。繡衣人去鴈空聞。龍蛇兩紙光如玉。卽是安西與右軍。  
其帖之語曰。趙公子明日欲過寒舍看書畫。廉訪相公能一來焚香彈琴亦佳。趙公子子昂也。後亦有跋帖。廉訪字彥中。今其子公哲御史。寶藏此帖。

寄上都分省僚友

王士熙

天上風清暑盡消。尙方仙隊按雲韶。白鵝海水生鷹獵。紅藥山岡詐馬朝。涼入賜衣飄細葛。醉題歌扇溼

輕綃。河堤楊柳休傷別。八月星槎到鵲橋。  
畫省薰風松樹陰。合歡花下日沉沉。腐儒無補漫獨坐。故人不來勞寸心。紫極三台光景接。洪鈞萬象歲  
年深。灤江回首九天上。誰傍香爐聽舜琴。

題節婦

王士熙

寒窗機杼泣秋風。鏡影鉛雲不汝同。明月有光生夜白。貞松無夢妬春紅。羅襦舊繡天吳拆。綠綺離弦海  
鶴空。陌上行人指華表。閉門疎雨落梧桐。

上京次伯庸學士韻

王士熙

侍臣催講御階西。雲靜觚稜曉色低。天關神州卑兩漢。地連碣石轉三齊。含香晝永閑青瑣。視草堂幽溼  
紫泥。最憶東山老松樹。秋風應有鶴來栖。

大都雜詩

宋本

拋卻漁竿滄海邊。拂衣來看九重天。畫闌九陌橋如月。綠影千門樹似煙。南國佳人王幼玉。中朝才子杜  
樊川。紫雲樓上如澗酒。孤負春風二十年。

繡錯繁華徧九衢。上林辭賦漢西都。朱門細婢金條脫。紫禁材官玉鹿盧。萬里星辰開上界。四朝冠蓋翊  
皇圖。東鄰白面生紈綺。笑殺揚雄臥一區。

瀟溝曉月墮蒼煙。十二門開日色鮮。海上神山無弱水。人間平地有鈞天。寶幢珠珞瞿曇寺。豪竹哀絲瑋  
瑁筵。春雨如膏三萬里。盡將嵩呼祝堯年。

形勢全燕擁地靈。梯航萬國走王城。狗屠已仕明天子。牛相寧知別太平。玄武鉤陳騰王氣。白麟赤鴈入新聲。近來朝報多如雨。不見河南召賈生。

姑蘇臺

劉致

麋鹿應知易代頻。吳趨誰唱不堪聞。捧心臺暗梨花月。抉目門深薛荔雲。江闕水犀歐冶劍。氣騰金虎闔廬墳。計然已死鷓夷逝。寂寞五湖西日曛。

綿竹縣治

楊靜

通衢砌石薜生鱗。三兩人家屋宇新。嚴子有祠存故里。魏公無第與比鄰。傳訛共說千年樹。問話那逢百歲人。回首向來佳麗地。暮雲斜日紫巖春。

燕中懷古

李源道

荆卿墓上草離離。郭隗臺邊對落暉。戰國山川秋氣壯。中原豪傑曉星稀。乾坤納納無人識。南北年年有鴈飛。說似瀟溝橋畔柳。安排青眼送將歸。

宗陽宮翫月

楊載

老君臺上涼如水。坐看冰輪轉二更。大地山河微有影。九天風露寂無聲。蛟龍並起承金榜。鸞鳳雙飛載玉笙。不信弱流三萬里。此身今夕到蓬瀛。

擬去京師

楊載

囊衣囊載道傍車。人事匆匆歲欲徂。風雨五更雞亂叫。關湖千里鴈相呼。蕪菁散漫根猶美。桑柘蕭條葉

正枯卻上高丘重回首。五雲繚繞帝王都。

貢袁諸公修史

楊載

詔編國史有程期。正是諸郎儼直時。虎士守門宮杳杳。雞人傳箭漏遲遲。窗間夜雨銷銀燭。城上春雲壓綵旗。才大各稱天下士。書成當繼古人爲。

宿李陵臺

周應極

曠野平蕪入壯懷。征鞍小駐李陵臺。關河萬里秋風晚。霜月一天鴻鴈來。持節蘇卿真壯士。開邊漢武亦奇才。千年懷古無窮意。且向郵亭酌酒盃。

睢陽懷古

李鳳

睢陽城郭劫灰餘。風景蕭條市井疎。堤接汴梁分驛路。地連齊魯幾兵車。張巡戰壘沙沉戟。闕伯提封草滿墟。珍重開元遺寺在。石幢猶刻魯公書。

周氏慈雲庵

揭傒斯

韓阿松。柏野煙飛。丞相文章入鳳池。華屋青山春掩冉。浮雲流水暮逶迤。哺烏時拂巖花落。馴鹿長環宰樹悲。唯有慈孫禁垣裏。年年南望不勝思。

# 元文類卷之八

## 五言絕句

錄汴梁宮人語

其一 入深宮裏。經今十五年。長因批帖子。呼到御牀前。

其二

歲歲逢元夜。金蛾鬧簇巾。見人心自怯。終是女兒身。

其三

殿前輪直罷。偷去賭金釵。怕見黃昏月。殷勤上玉階。

其四

翠翹珠掘背。小殿夜藏鉤。幕地羊車至。低頭笑不休。

其五

內府頒金帛。教酬賀節盤。兩宮新有旨。先與問孤寒。

其六

人間多棗栗。不到九重天。長被黃衫吏。花攤月賜錢。

楊  
奐

其七

仁聖生辰節。君王進玉卮。壽棚兼壽表。留待北還時。

其八

邊奏行臺急。東華夜啓封。內人催步輦。不候景陽鍾。

其九

畫燭雙雙引。珠簾一一開。輦前齊下拜。歡飲辟寒盃。

其十

聖躬春閣內。只道下朝遲。扶仗嬌無力。紅綃貼玉肌。

其十一

今日天顏喜。東朝內宴開。外邊農事動。詔遣教坊回。

其十二

駕前雙白鶴。日日候朝回。自送鑾輿去。經年更不來。

其十三

陡覺文書靜。相將立夕陽。傷心寧福位。無復夜薰香。

其十四

二后睢陽去。潛身泣到明。卻回誰敢問。校似有心情。

其十五

爲道圍城久。妝奩鬪犒軍。入春渾斷絕。飢苦不堪聞。

其十六

監國推梁邸。初頭靜不知。但疑牆外笑。人有看宮時。

其十七

別殿弓刀響。倉黃接鄭王。尙愁宮正怒。含淚強添妝。

其十八

一向傳宣喚。誰知不復還。來時舊鉞線。記得在窗間。

其十九

北去遷沙漠。誠心畏從行。不如當日死。頭白若爲生。

酬昭君怨

玉貌辭金闕。貂裘擁繡鞍。將軍休出戰。塞上雪偏寒。

春日

游絲困無力。欲起重悠揚。芳草落花滿。相思春晝長。

石鼎聯句圖

玩世如一鼎。姓名誰得聞。仙翁應自笑。知我有鄰訢。

楊 奐

劉 因

劉 因

螻蛄

後利前還澀。陰陽體段分。不須觀兔尾。卽此見義文。

薔薇

色染女眞黃。露凝天水碧。花間日月長。朝暮閱兩國。

采薇圖

服藥求長年。孰與孤竹子。一食西山薇。萬古猶不死。

題張尹書巢

食息不離書。令尹非蠹魚。騰身出巢外。編簡不如吾。

又

醜雞甕裏天。露蟬殼外身。此巢何處著。六合一微塵。

題江州庾樓

宿鳥歸天盡。浮雲薄暮開。淮山青數點。不肯過江來。

錢選宮人圖

露冷月華白。悠悠方寸心。夫君渺何許。悵望碧雲深。

市莊

市莊主人踏門徵詩。短歌六章。用塞雅命。其卒章之亂。聊示莞爾之諠云。躬畊之暇。擊壤緩歌。抱膝微吟。

劉因

劉因

盧摯

吳激

賀復孫

安熙

王結



亦足以超然於天壤間也。

其一

烏府振弘規。鳳閣司宛畫。退食休別墅。逍遙古樂國。

其二

沃若成都桑。爛斑青門瓜。隱顯亮殊途。高致惟一家。

其三

晨鍾趨朝班。日旰遊市莊。兩兒帶經鋤。奕世流芬芳。

其四

若人孔氏徒。臺閣揚清風。休日植杖耘。高揖荷蓀翁。

其五

城居匪湫隘。桑果連畛畦。吾廬有高興。何必空山棲。

其六

老我縛塵纓。山林渺遐想。羨君市有莊。取魚兼熊掌。

節婦黃氏

白日松臺闕。青山石椁沉。十年哭夫淚。下入九泉深。

過李陵臺

馬祖常

馬祖常

歸林聞野祭。漢室議門誅。辛苦樓蘭將。淒涼太史書。

### 七言絕句

讀汝南遺事

楊奐

軹道牽羊事已非。更堪行酒著青衣。裹頭婢子那知此。爭逐君王烈焰歸。六朝江水故依然。隔斷中原又百年。長笑桓温無遠略。竟留王猛佐苻堅。

明皇擊梧桐圖

李俊民

不使梨園弟子知。太平音在鳳凰枝。一朝野鹿銜花去。長恨秋風葉落時。

過陳司諫墓

劉祁

鸞坡烏府舊遊空。三尺孤墳野寺中。猶有憂時心不死。墓門昨夜起秋風。

瀟湘夜雨

李冶

遠寺孤舟墮渺茫。雨聲一夜滿瀟湘。黃陵渡口風波暗。多少征人說故鄉。

墨海棠

李冶

漢宮愁絕冷繡絨。一醮劉郎兩鬢絲。甲帳夜寒銀燭短。六銖雲帔獨來時。

征南口號

杜瑛

春早雲南麥已黃。瀘江蒸霧水如湯。馬蹄半帶陰山雪。變作人間六月涼。

春日雜詠

東風簾幕半塵埃。歌舞臺空晝不開。試問雙飛新燕子。今年社日爲誰來。

登北邙山

干戈叢裏過壬辰。原上纍纍冢墓新。寒食清明幾家哭。問來都是陣亡人。魏家池館姚家宅。佳卉而今採作薪。水北水南二三月。舊時多少看花人。

村居

草堂有燕賀新成。沙渚無鷗續舊盟。滿徑落紅風掃靜。一渠春碧雨添平。春波淡淡捲寒漪。長日蕭蕭靜竹扉。村舍蠶催桑葉大。山田鹿食麥苗稀。

峴山秋晚圖

江水江花遶大堤。太平歌舞習家池。而今風景那堪畫。落日空城烏雀悲。

太真教鸚鵡圖

溫泉賜浴意融怡。猶念寧王玉笛吹。卻怕能言泄幽事。丁寧慎勿語人知。

覃懷春日

江南江北半浮生。蹤跡居然水上萍。竹雞啼罷山雨黑。蠶子生時桑柘青。

春晴

江柳長天草色齊。新晴何物不芳菲。無因化作千蝴蝶。西蜀東吳款款歸。

徒單公履

楊果

楊果

楊果

馮謂

趙復

劉辰翁

新燕池塘綠雨肥。初晴未暖日光微。角巾猶帶花梢溼。纔倚闌干見絮飛。  
春浦帆歸圖

涵空水色碧於苔。照眼山光翠作堆。疑是桃花源上客。輕舟天外得春來。

杭州聞角

聽徹哀吟獨倚樓。碧天無際思悠悠。誰知盡是中原恨。吹到江南第一州。  
有懷

雨過幽庭長綠苔。東風時爲掃塵埃。無人曾見春來處。門外桃花只自開。  
風雨圖

南山已見霧昏昏。便合潛身不出門。直到半途風雨梗。倉惶何處覓前村。  
風雨迴舟

風雨來時撥棹迴。濟川心事有誰知。停舟且做江湖夢。浪靜風恬未是遲。  
水仙花

海上三山璧月明。人間誰識許飛瓊。秋風吹上青鸞背。來散天香與素英。  
明月珠衣翡翠裳。冰肌玉骨自清涼。不隨王母瑤池去。來侍維摩病几傍。

書事

當年一線魏瓠穿。直到橫流破國年。草滿金陵誰種下。天津橋畔聽啼鶯。

孟攀麟

梁棟

劉秉忠

許衡

張孔孫

商挺

劉因

臥榻而今又屬誰。江南回首見旌旗。路人遙指降王道。好似周家七歲兒。朱張遺學有經綸。不是清談誤世人。白首歸來會同館。儒冠爭看宋師臣。風節南朝若不伸。泝流直要到崑崙。世宗一死千年欠。此是黃河最上源。唱徹芙蓉花正開。新聲又聽采茶哀。秋風葉落踏歌起。已覺江南席卷來。

山寺早起

松窗一夜遠潮生。斷送幽人睡失明。夢覺不知春已去。半簾紅雨落無聲。

讀史評

紀錄紛紛已失真。語言輕重在詞臣。若將字字論心術。恐有無邊受屈人。

山行

西嶠人家竹暎溪。山深雨暗到來遲。行窮谷口水才見。流盡巖花春不知。

山家

馬蹄踏水亂明霞。醉袖迎風受落花。怪見溪童出門望。鵲聲先我到山家。

寫真詩卷

龍祠嶽廟盡冠巾。雨露何關土木身。不是二程窮物理。誰從一髮辨天真。

己巳春往均州

武當卻立翠屏新。碧玉溶溶漢水奔。如畫江山千古在。城闌幾度戰塵昏。

劉因

劉因

劉因

劉因

劉因

宋銜

觀出獵

金鉞染血犬銜毛。倒臂蒼鷹掣錦條。紅日下山秋塞闊。齊歌野樂陣雲高。平原馬首鷹行齊。狡兔深藏鳥不飛。環立傳觴人半醉。斜欹貂帽雪中歸。

壽陽梅妝圖錢選畫

一聲白鴈渡江潮。便覺金陵王氣銷。畫史不知亡國恨。猶將鉛粉記前朝。

昭君出塞圖

黃沙堆雪暗龍庭。馬上琵琶掩淚聽。漢室禦戎無上策。錯教紅粉怨丹青。

汾亭古意圖

漢家宮闕白雲秋。魏國川原過鴈愁。萬古松風一茅舍。不隨華屋變山丘。

關山風雨圖

山氣凝寒雨不開。江濤拍岸雪成堆。漁翁慣識風波惡。天際孤舟已早迴。

絕句四首

春寒惻惻掩重門。金鴨香殘火尚溫。燕子不來花又落。一庭風雨自黃昏。  
湘簾細織浪紋稀。白苧新裁暑氣微。庭院日長賓客退。滿池芳草燕交飛。  
搖落山川草樹稀。白雲時逐鴈南飛。苦無綠酒酬佳日。猶有黃花媚夕暉。  
梅花半落雪飄零。楊柳青青江水生。一夜東風吹鴈過。江南江北總多情。

宋 銜

王思廉

王思廉

張 礎

張 礎

趙孟頫

錢選畫花

霽翁夙號老詞客，亂後卻工花寫生。寓意豈求顏色似，錢塘風物記昇平。

題道院

綠陰無際壓蒼苔，爲愛幽深手自栽。風月早知煩耳目，不教春筍過牆來。草色琅玕遍兩楹，蚤陰纔過午陰清。斜陽又送西軒影，一就移牀待月生。

無錫山中留題

山深自昔無車馬，道在何曾畏虎狼。祗恐閒人來看竹，淋漓醉墨污新牆。

卽事

古木陰中生白煙，忽從石上見流泉。閒隨屈曲尋源去，直到人家竹塢邊。

過弋陽

雷聲驅雨過山西，山腹雲根似削齊。日暮牧兒歸不得，料應白水漲前溪。

過信州

二千里地佳山水，無數海棠官道傍。風送落紅攙馬過，春光更比路人忙。

過京口

北來朋友不如鴻，幾個西飛幾個東。多少登臨舊臺觀，闌干閒在夕陽中。

寄王總管

元文類 卷八

陳儼

高克恭

高克恭

高克恭

高克恭

高克恭

高克恭

李昶

華陽東下古梁州。五馬旌旗擁上游。腸斷寒江衣帶水。令人空望鎮南樓。

過故縣埧

李昶

憲宗皇帝射臺高。氣壓蠻江萬丈濤。玉輦不歸巖樹冷。白雲何處醉蟠桃。

杏花始開小酌

安熙

生紅和露滴胭脂。又到芳春寂寞時。便擬提壺花下醉。卻愁羞殺背陰枝。杖藜吟遶去還來。收拾春光入酒盃。自是風花要題品。等閑蜂蝶莫相猜。

和郭安道治書韻

周馳

西風吹起白蘋波。半夜扁舟掠岸過。不向長橋酤一醉。滿天明月奈秋何。君醉淋漓我浩歌。古人爲恨復如何。秋來幾日渾無賴。已有新霜著芰荷。江間小艇數能乘。活計今加船子僧。近喜老妻能斫脰。欲令稚子學扳罾。久客思歸歸未能。題書附與遠遊僧。吳松江上鱸魚美。何處人家不下罾。

遼陽高節婦

王結

天東長白近蓬瀛。縹緲仙人玉雪清。鳳去紫簫聲已絕。青鸞獨跨上瑤京。

秋懷

曹元用

沙磧秋高宛馬肥。哀笳一曲塞雲飛。南都兒輩應相念。過盡征鴻猶未歸。

贈李祕監

張養浩

至治間曾  
董御容



封章曾拜殿庭間。凜凜丰儀肅九關。回首橋山淚成血。逢君不忍問龍顏。

青山白雲圖

虞集

獨向山中訪隱君。行窮千澗水沄沄。仙家更在空青外。只許人間禮白雲。

水芙蓉

虞集

長洲宮沼醉西施。蕩漾蘭舟不自持。願奉君王千歲樂。一盤清露玉淋漓。

木芙蓉

虞集

九月襄王燕渚宮。霓旌翠羽度雲中。滿汀山雨衣裳溼。宋玉愁多賦未工。

春雲

虞集

春雲冉冉度宮城。樓雪初融水半生。行過御溝成久立。舉頭枝上有啼鶯。  
雨裏輕塵道半乾。朝迴隨處借花看。牆東半樹垂楊柳。飛絮時來近馬鞍。

聽雨

虞集

屏風圍暖鬢。麝絳蠟搖光照暮酣。京國多年情盡改。忽聽春雨憶江南。  
何處它年寄此生。山中江上總關情。無端繞屋長松樹。盡把風聲作雨聲。

庚午廷試次韻

虞集

待漏宮門聽鑰開。袖中進卷總賢才。奏名殿裏千花合。傳勅階前好雨來。  
千花覆檻柳垂絲。晝刻傳呼淑景移。聖主自觀新進策。侍臣簪筆立多時。

曹將軍馬

虞集

高秋風起玉關西。踣鐵歸朝十萬蹄。貌得當年第一匹。昭陵風雨夜閒嘶。

寄家書

馬祖常

春雲閣雨花泥少。池上波平飛白鳥。薊中河外盡天涯。蓮葉圓時身到家。

題柳道傳詩卷

馬祖常

九曲珠穿蟻度絲。雙環鏡透月輪虧。人間自有鸚鵡侶。早奏簫韶見鳳儀。

宮詞

馬祖常

華清水殿繡芙蓉。金鴨香銷寶帳重。竹葉羊車來別院。何人空聽景陽鍾。  
銀牀井冷露溥溥。半臂薰衣釧辟寒。不恨長門冬夜永。小奴休報鞦韆單。  
長門月轉漏聲催。自熨寒衣減帶圍。休怕官家嫌體弱。細腰曾是楚王妃。  
合宮舟泛濯龍池。端午爭懸百綵絲。新賜承恩脂粉磴。上陽不敢妬蛾眉。  
繭館纈絲溼翠翹。夫人纖指織龍綃。羅襦雙佩清晨響。只恐君王有晏朝。  
八姨粉翠錫千緡。脂盞新妝百寶勻。白髮上陽宮女老。補衣重拆繡麒麟。  
卯酒微微解宿醒。催花羯鼓報新聲。君王好錫承恩宴。辛苦邊頭百將營。  
露蘭研粉壽陽妝。奩內新燒百刻香。圓舌教成鸚鵡語。偷將玉笛送寧王。  
銀河七夕渡雙星。桐樹逢秋葉未零。萬歲君王當宁坐。妾身不願命如萍。

花氣蒸霞淑景明。望他樓上看彈鷓。李暮吹笛宮牆外。學得梨園第一聲。  
孟光舉案圖

王執謙

白髮梁鴻與世乖。賴逢光也配其才。五噓歌罷愁無奈。不覺春從案上來。

題甄氏訪山亭

陳觀

水流花落石生雲。日靜風喧草欲薰。老去風流猶未減。一丘一壑要平分。  
雨後西山翡翠堆。結亭直欲近巖隈。從今記取溪頭路。一日須來一百迴。

清明日遊太傅林亭

辛文房

隔水園林丞相宅。路人猶記種花時。可憐總被風吹盡。不許遊人折一枝。

玉簪

張淳

開軒俯瞰碧雲衢。白筆含香半吐鬚。帶露折來何處可。膽瓶秋水澹如無。

過郝參政墓林

鮑仲華

茂林喬梓上千雲。葉葉曾沾雨露恩。萬古西山青不斷。鳥啼花落幾黃昏。



# 元文類卷之九

## 詔赦

卽位詔庚申年  
四月

王鶚

朕惟祖宗肇造區宇。奄有四方。武功迭興。文治多闕。五十餘年於此矣。蓋時有先後。事有緩急。天下大業。非一聖一朝所能兼備也。先皇帝卽位之初。風飛雷厲。將大有爲。憂國愛民之心。雖切於己。尊賢使能之道。未得其人。方董夔門之師。遽遺鼎湖之泣。豈期餘恨。竟弗克終。肆予冲人。渡江之後。蓋將深入焉。乃聞國中。重以僉軍之擾。黎庶驚駭。若不能一朝居者。予爲此懼。駟騎馳歸。目前之急。雖紓。境外之兵。未戢。乃會羣議。以集良規。不意宗盟。輒先推戴。左右萬里。名王巨僚。不召而來者有之。不謀而同者皆是。咸謂國家之大統。不可久曠。神人之重寄。不可暫虛。求之今日。太祖嫡孫中。先皇母弟之列。以賢以長。止予一人。雖在征伐之間。每存仁愛之念。博施濟衆。實可爲天下主。天道助順。人謨與能。祖訓傳國大典。於是乎在。孰敢不從。朕峻辭固讓。至于再三。祈懇益堅。誓以死請。於是俯循輿情。勉登大寶。自惟寡昧。屬時多艱。若涉淵冰。罔知攸濟。爰當臨御之始。宜新弘遠之規。祖述變通。正在今日。務施實德。不尙虛文。雖承平未易。遽臻而飢渴所當先務。略舉其切時便民者。條列於后。嗚呼。歷數攸歸。欽應上天之命。勳親斯託。敢忘烈祖之規。建極體元。與民更始。朕所不逮。更賴我遠近宗族。中外文武。同心協力。獻可替否之助也。誕告多

方體予至意。

中統建元詔

王鶚

祖宗以神武定四方。淳德御羣下。朝廷草創。未遑潤色之文。政事變通。漸有綱維之目。朕獲續舊服。載膺丕圖。稽列聖之洪規。講前代之定制。建元表歲。示人君萬世之傳。紀時書王。見天下一家之義。法春秋之正始。體大易之乾元。炳煥皇猷。權輿治道。可自庚申年五月十九日。建號爲中統元年。惟卽位體元之始。必立經陳紀爲先。故內立都省。以總權綱。外設總司。以平庶政。仍以興利除害之事。補偏拯弊之方。隨詔以頒。申畫于后。於戲。秉籙握樞。必因時而建號。施仁發政。期與物以更新。敷宣懇惻之辭。表著憂勞之意。凡在臣庶。體予至懷。

中統元年五月赦

王鶚

我國家烈祖肇基。先皇繼統。惟圖日關於疆宇。未免歲耀於兵威。事有當爲。時難遽已。朕獲承丕祚。已降德音。念士卒暴露者久之。而人民離散者多矣。干戈載戢。田里俾安。不期同氣之中。俄有鬩牆之侮。顧其冲幼。敢啓茲謀。皆被姦譏。相濟以惡。彼既階於禍亂。此當應以師徒。朕惟父母兄弟之親。宗廟社稷之重。遣使敦諭。至于再三。亂紀執迷。曾無少革。以致宗族共怒。戈甲乃興。重念兵方弭而復徵。民甫休而再擾。危疑未釋。反側不安。詿誤者至。及於無辜。拘囚者或生於不測。非朕本意。豈然傷心。宜推曠蕩之恩。普示哀矜之意。於戲。悛心或啓。忍加管蔡之刑。內難既平。迓續成康之治。

賜高麗國王曆日詔

中統五年正月

王鶚

諫高麗國王植獻歲發春式遵三陽之會對時育物宜同一視之仁瞻爾外邦忠於內附肇因正旦庸展賀儀方使介之還歸須筴書之播告今賜卿中統五年曆日一道卿其若稽古典敬授民時勸彼東嶠之民勤於南畝之事茂迎和氣迄用康年時乃之休惟朕以懌

至元改元赦

中統五年八月

王鶚

應天者惟以至誠拯民者莫如實惠朕以菲德獲承慶基內難未戡外兵弗戢夫豈一日于今五年賴天地之界矜暨祖宗之垂裕凡我同氣會于上都雖此日之小康敢朕心之少肆比者星芒示儆雨澤愆常皆闕政之所繇顧斯民其何罪宣布惟新之令溥施在宥之仁於戲否往泰來迓續亨嘉之會鼎新革故正資輔弼之良

建國號詔

至元八年十一月

徒單公履

誕膺景命奄四海以宅尊必有美名紹百王而紀統肇從隆古匪獨我家且唐之爲言蕩也堯以之而著稱虞之爲言樂也舜因之而作號馴至禹興而湯造互名夏大以殷中世降以還事殊非古雖乘時而有國不以義而制稱爲秦爲漢者蓋從初起之地名曰隋曰唐者又卽始封之爵邑是皆徇百姓見聞之狃習要一時經制之權宜概以至公得無少貶我太祖聖武皇帝握乾符而起朔土以神武而膺帝圖四振天聲大恢土宇輿圖之廣歷古所無頃者耆宿詣庭奏章伸請謂旣成於大業宜早定於鴻名在古制以當然於朕心乎何有可建國號曰大元蓋取易經乾元之義茲大治流形於庶品孰名資始之功予一人

底寧於萬邦。尤切體仁之要。事從因革。道協天人。於戲。稱義而名。故匪爲之溢美。孚休惟永。尙不負於投艱。嘉與敷天。共隆大號。

頒授時曆詔

至元十七年六月

李謙

自古有國牧民之君。必以欽天授時爲立治之本。黃帝堯舜。以至三代。莫不皆然。爲日官者。皆世守其業。隨時考驗。以與天合。故曆法無數更之弊。及秦滅先聖之術。每置閏於歲終。古法蓋殫廢矣。由兩漢而下。立積年日法。以爲推步之準。因仍沿襲。以迄于今。夫天運流行不息。而欲以一定之法拘之。未有不差之理。差而必改。其勢有不得不然者。今命太史院作靈臺制儀象日測月驗。以考其度數之真。積年日法。皆所不取。庶幾脗合天運。而永終無弊。乃者新曆告成。賜名曰授時曆。自至元十八年正月一日頒行。布告遐邇。咸使聞知。

清冗職詔

至元二十三年七月

李謙

惟我祖宗。肇造區夏。雖中書已嘗建立。而官制未暇舉行。迨予圖大以宅中。思欲繼志而述事。集儒臣之公議。法前代之彛章。爰立省部院臺。以正朝廷綱紀。自疆土極照臨之遠。而省臺有內外之分。日益月增。官冗人濫。嘗勅有司而澄汰。意能舊制之遵承。比聞近侍之言。謂益曩時之弊。彼不勝重任。有壅上聞。苟尙蹈匪彝。時惟予咎。其清冗職。用復前規。於戲。官不必備。惟其人。朕恪守已成之憲。爾尙克勤于乃事。卿永肩圖報之心。



加封五嶽四瀆四海詔

至元二十八年二月

閻復

朕惟名山大川國之秩祀。今嶽瀆四海皆在封宇之內。民物阜康。時惟神休。而封號未加。無以昭答靈贖。可加上東嶽爲天齊大生仁聖帝。南嶽司天大化昭聖帝。西嶽金天大利順聖帝。北嶽安天大貞玄聖帝。中嶽中天大寧崇聖帝。加封江瀆爲廣源順濟王。河瀆靈源弘濟王。淮瀆長源溥濟王。濟瀆清源善濟王。東海爲廣德靈會王。南海廣利靈孚王。西海廣潤靈通王。北海廣澤靈祐王。仍各遣官詣祠致告。以稱朕敬恭神明之意。

興師征江南諭行省官軍詔

王構

爰自太祖皇帝以來。彼宋與我。使介交通。殆非一次。彼此曲直之事。亦所共知。不必歷舉。迨我憲宗之世。朕以藩職奉命南伐。師次鄂渚。彼賈似道遣宋京詣我近臣博都歡。前河南路經略使趙璧請罷兵。息民願奉歲幣于我。朕以國之大事。宗親在上。必須入計。用報而還。卽位之始。追憶是言。乃命翰林侍講學士郝經等奉書往聘。蓋爲生靈之計也。古者兵交。使在其間。惟和與戰。宜嗣報音。其何與於使哉。而乃執之。卒不復命。至如留此一二行李。於此何損。於彼何益。以致師出連年。邊境之間。死傷相籍。係累相屬。皆彼宋自禍其民也。襄陽被圍五年。旅拒王師。義當不貸。朕先有成命。果能出降。許以不死。是旣降附之後。朕不食言。悉全其命。冀宋悔過。或啓合圖。而乃迷執。罔有悛心。所以問罪之師。有不能已者。今遣爾等水陸並進。爾等當布告遐邇。夫以天下爲事。爰及干戈。自古有之。無辜之民。初無與焉。若彼界軍民官吏人等。去逆效順。與衆來降。或別立奇功者。驗等第官資遷擢。其所附軍民。宜嚴勅將士。毋得妄行殺掠。父母妻

擊家口。毋致分散。仍加賑給。令得存濟。其或固拒弗從。及迎敵者。俘戮何疑。

即位詔 至元三十一年四月

王構

朕惟太祖聖武皇帝。受天明命。肇造區夏。聖聖上承。光熙前緒。迨我先皇帝。體元居正以來。然後典章文物大備。臨御三十五年。薄海內外。罔不臣屬。宏規遠略。厚澤深仁。有以衍皇元萬世無疆之祚。我昭考早正儲位。德盛功隆。天不假年。四海缺望。願惟眇質。仰荷先皇帝殊眷。往歲之夏。親授皇太子寶。付以撫軍之任。今春宮車遠馭。奄棄臣民。乃有宗藩昆弟之賢。咸曉官僚之舊。謂祖訓不可以違。神器不可以曠。體承先皇帝夙昔付託之意。合辭推戴。誠切意堅。朕勉徇所請。於四月十四日。即皇帝位。尚念先朝庶政。悉有成規。惟慎奉行。罔敢失墜。更賴宗親勳戚。左右忠良。各盡乃誠。以輔台德。

五鎮山加封詔 大德三年

王構

朕惟九州之有鎮山。三代以爲常祀。嶽瀆四海。加封爰自于先朝。疆理羣方。同饗宜遵於舊制。乃眷粹靈之懿。其增號秩之華。今加上東鎮沂山。曰元德。東安王。南鎮會稽山。曰昭德。順應王。西鎮吳山。曰成德。永靖王。北鎮盤巫閭山。曰貞德。廣寧王。中鎮霍山。曰崇德。應靈王。地德恆安。功協成于奄奠。民生咸阜。治浸格于隆平。仍命所在有司。以時致祭。務盡精嚴。尙冀歆承。益孚嘉貺。

建儲詔 大德九年六月

閻復

惟我太祖聖武皇帝。世祖聖德神功文武皇帝。規模宏遠。預建儲嗣。式與古合。朕恪遵祖宗成憲。允協昆

弟僉言立嫡子德壽爲皇子。茲有日矣。比者遠近宗親復以爲請。又中書百司及諸老臣請授冊寶。昭示中外。朕俯從衆願。於今月五日授以皇太子寶。所有冊禮其如常制。屬茲盛舉。宣布新恩。於戲慶衍無疆。既正名於國本。仁同一視。尙均福於黎元。

卽位詔 大德十一年五月

閻復

昔我太祖皇帝以武功定天下。世祖皇帝以文德洽海內。列聖相承。丕衍無疆之祚。朕自先朝肅將天威。撫軍朔方。殆將十年。親御甲冑。力戰卻敵者屢矣。方諸蕃內附。邊事以寧。遽聞宮車晏駕。乃有宗室諸王。貴戚元勳。相與定策於和林。咸以朕爲世祖曾孫之嫡。裕皇正派之傳。以功以賢。宜膺大寶。朕謙讓未遑。至于再三。還至上都。宗親大臣復請於朕。聞者姦臣乘隙。謀爲不軌。賴祖宗之靈。母弟愛育。黎拔力八達。稟命太后。恭行天罰。內難旣平。神器不可久虛。宗祧不可乏祀。合辭勸進。誠意益堅。朕勉徇輿情。於五月二十一日卽皇帝位。任大守重。若涉淵冰。屬嗣服之云初。其與民而更始於戲。丕承丕顯。敢忘持守之心。于蕃于宣。勉效忠勤之力。共毗新政。聿底隆平。

行銅錢詔 至大二年十月

姚燧

錢幣之法。其來遠矣。三代以降。沿革不常。世祖皇帝建元之初。頒行交鈔。以權民用。已有錢幣兼行之意。蓋錢以權物。鈔以權錢。子母相資。信而有證。今鈔法一新。期於公私兩利。重惟經久之計。必復鼓鑄之規。至大三年十月赦

姚燧

朕自嗣守不基。致孝太室。奉上玉册寶。加諡太祖爲法天啓運聖武皇帝。光獻翼聖皇后。睿宗仁孝景襄皇帝。顯懿莊聖皇后。世祖聖德神功文武皇帝。昭睿順聖皇后。裕宗文惠明孝皇帝。徽仁裕聖皇后。順宗昭聖衍孝皇帝。成宗欽明廣孝皇帝。貞慈靜懿皇后。于斯之時。宜降德音。誕告天下。猶恐數赦。或賊良民。今因西北叛王。不受正朔五十餘年。其子察八而蓋愆前人。盡率部衆。歸命闕庭。及闕闕出。謀爲非覲。未忍置理。刑以輕典。與夫崇建大利。上爲列聖報德冥冥。下爲生民禱福昭昭者。亦旣成功。皆我聖母之德之致。已於此月五日。奉玉册玉寶。上尊號曰。儀天興聖慈仁昭懿壽元皇太后。屬大慶禮成。宜敷渙號。以新民聽於戲。凡在有司。一乃心力。以輔予治。期底隆平。

卽位詔 至大四年三月

姚燧

惟昔先帝事皇太后。撫朕眇躬。孝友天至。由朕同託順考遺體。重以母弟之嫡。加有削平內難之功。於其踐阼。曾未踰月。授以皇太子寶。領中書令樞密使。百揆機務。聽所總裁。于今五年。先帝奄棄天下。勳戚元老。咸謂大寶之繩。既有成命。非與前聖賓天而始徵集宗親。議所宜立者比。當稽周漢晉唐故事。卽正宸極。朕以國恤方新。誠有未忍。是用經時。今則上奉皇太后。勉進之命。下徇諸王。勸戴之勤。三月十八日。於大都大明殿。卽皇帝位。凡尙書省。誤國之臣。先已伏誅。同惡之徒。亦已放殛。百司庶政。悉歸中書。命丞相鐵木迭兒。平章政事完澤。李道復等。從新拯治。其可爲今法程。拯民急者。具如左方。於戲。凡爾有官君子。皆古所謂治天職。食天祿者。宜一心力。欽乃攸司。無替朕命。

行科舉詔 皇慶二年

程鉅夫

惟我祖宗以神武定天下。世祖皇帝設官分職。徵用儒雅。崇學校爲育才之地。議科舉爲取士之方。規模宏遠矣。朕以眇躬。獲承丕祚。繼志述事。祖訓是式。若稽三代以來。取士各有科目。要其本末。舉人宜以德行爲首。試藝則以經術爲先。詞章次之。浮華過實。朕所不取。爰命中書。參酌古今。定其條制。其以皇慶三年八月。天下郡縣舉其賢者。能者充賦。有司次年二月。會試京師。中選者。朕將親策焉。於戲。經明行脩。庶得真儒之用。風移俗易。益臻至治之隆。

卽位詔

延祐七年三月

張士觀

洪惟太祖皇帝。膺期撫運。肇開帝業。世祖皇帝。神機睿略。統一四海。以聖繼聖。迨我先皇帝。至仁厚德。涵濡羣生。君臨萬國。十年于茲。以社稷之遠圖。定天下之大本。協謀宗親。授予冊寶。方春宮之與政。遽昭考之賓天。諸王貴屬。元勳傾輔。咸謂朕宜體先皇帝付託之重。皇太后擁佑之慈。既深繫於人心。詎可虛於神器。合辭勸進。誠意交孚。乃於三月十一日。卽皇帝位於大明殿。誕受維新之命。庸推在宥之恩。尙念祖宗不緒。持守維艱。萬幾之繁。罔敢暇逸。更賴遠近勳戚。左右臣鄰。咸一乃心。以輔予治。

至治改元詔

元明善

朕祇遙詒謀。獲承丕緒。念付託之惟重。顧繼述之敢忘。爰以延祐七年十二月初二日。被服袞冕。恭詣于太廟。旣大禮之告成。宜普天之均慶。屬茲逾歲。用易紀元。予以導天地之至和。予以法春秋之謹始。可改延祐八年爲至治元年。於戲。奉先思孝。式昭報本之誠。發政施仁。聿廣錫民之福。

命拜住爲右丞相詔

至治二年十二月

袁桷

帝王之職。在論一相。于以表正百司。綱領庶績。朕纘承丕緒。厲精圖治。然而澤有所未洽。政有所未舉。豈委任之道。有遺闕歟。今特命中書左丞相拜住。爲開府儀同三司。上柱國。錄軍國重事。中書右丞相。監脩國史。一新機務。使邪正異途。海寓乂寧。以復中統至元之治。於戲。朝廷旣正。著端本澄源之功。風俗斯醇。廣摩義漸仁之化。

諭安南國詔

曹元用

諭安南國世子陳日曠。我國家誕膺景命。撫綏萬邦。德澤普加。靡間夷夏。乃者先朝奄棄。臣民朕以裕皇嫡孫。爲宗戚大臣之所推戴。爰自太祖皇帝肇基之地。入承天紘。於至治三年九月四日。卽皇帝位。遂以甲子歲。爲泰定元年。今遣亞中大夫吏部尙書馬合謀。奉議大夫禮部郎中楊宗瑞。賚詔往諭爾國。賜爾授時曆一帙。惟乃祖乃父。修貢內附。有年矣。我國家遇卿甚厚。以占城守臣上表。稱卿之邊吏累發兵相侵。朕爲之惻然于中。不知卿何爲至是。豈信然耶。朕君臨天下。視遠猶邇。務輯寧其民。俾各得其所。卿其體予至懷。戒飭士衆。慎保乂民。俾毋忘爾累世忠順之意。

卽位改元詔

虞集

洪惟我太祖皇帝肇造區夏。世祖皇帝混一海宇。爰立定制。以一統緒。宗親各授分地。勿敢妄生覬覦。此不易之成規。萬世所共守者也。世祖皇帝之後。成宗皇帝。武宗皇帝。仁宗皇帝。英宗皇帝。以公天下之心。以次相傳。宗王貴戚。咸遵祖訓。至於晉邸。具有盟書。願守藩服。而與賊臣帖失也先帖木兒等。潛通陰謀。冒干寶位。使英皇不幸。罹于大故。朕兄弟播越南北。備歷艱險。臨御之事。豈獲與聞。朕以叔父之故。順承

惟謹于今六年。災異迭見。權臣倒刺沙烏伯都刺等。專擅自用。疏遠勸舊。廢棄忠良。變亂祖宗法度。空府庫以私其黨類。大行上賓。利於立幼。顯握國柄。用成其姦。宗王大臣。以宗社之重。統緒之正。協謀推戴。屬于眇躬。朕以菲德。宜俟大兄。固讓再三。宗戚將相。百僚耆老。以爲神器不可以久虛。天下不可以無主。周王遼隔朔漠。民庶遑遑。已及三月。誠懇迫切。朕姑從其請。謹俟大兄之至。以遂朕固讓之心。已於致和元年九月十三日。卽皇帝位於大明殿。其以致和元年爲天曆元年。可大赦天下。於戲。朕豈有意於天下哉。重念祖宗開創之艱。恐墮大業。是以勉徇輿情。尙賴爾中外文武臣僚。協心相予。輯寧億兆。以成治功。

卽位詔 天曆二年八月十五日

虞集

惟昔上天啓我太祖皇帝。肇造帝業。列聖相承。世祖皇帝。旣大一統。卽建儲貳。而我裕皇。天不假年。成宗入繼。才十餘載。我皇考武宗皇帝。歸膺大寶。克享天心。志存不私。以仁廟居東宮。遂嗣宸極。甫及英皇。降割我家。晉邸違盟。構逆據有神器。天示譴告。竟隕厥身。於是宗戚舊臣。協謀以舉義。正名以討罪。揆諸統緒。屬在眇躬。朕興念大兄。播遷朔漠。以賢以長。曆數宜歸。力拒羣言。至于再四。乃曰。艱難之際。天位久虛。則衆志弗固。恐墮大業。朕雖從請。而臨御秉初志之不移。是以固讓之詔始頒。奉迎之使已遣。尋命阿納忒納失里燕帖木兒。奉皇帝寶璽。遠迓于途。受寶卽位之日。卽遣使授朕皇太子寶。朕幸釋重負。實獲素心。乃率臣民。北迎大駕。而先皇帝跋涉山川。蒙犯霜雪。道里遼遠。自春徂秋。懷艱阻於歷年。望都邑而增慨。徒御弗慎。屢爽節宣。信使往來。相望於道路。彼此思見。交切於衷懷。八月一日。大駕次王忽察都。朕欣瞻對之有期。獨兼程而先進。相見之頃。悲喜交集。何數日之間。而宮車弗駕。國家多難。遽至於斯。念之痛

心以夜繼旦。諸王大臣以爲祖宗基業之隆。先帝付託之重。天命所在。誠不可違。請卽正位。以安九有。朕以先皇帝奄棄。方新。摧怛何忍。銜哀辭對。固請彌堅。執誼伏闕者三日。皆宗社大計。乃以八月十五日。卽皇帝位于上都。可大赦天下。於戲。戡定之餘。莫急乎與民休息。丕變之道。莫大乎使民知義。亦惟爾中外大小之臣。各究乃心。以稱朕意。

親祀南郊赦

至順元年十二月

虞集

朕膺昊天之成命。承聖祖之貽謀。祇續丕基于今三載。統萬幾之兢業。思兆姓之雍熙。式舉禮文。聿嚴報祀。爰以今年十月初四日。躬服袞冕。致明禋于南郊。尊我太祖法天啓運聖武皇帝。配享上帝。方至誠之孚格。嘉景貺之旋臻。宜施曠蕩之恩。用洽溥天之慶。於戲。永言配命。克肩昭事之心。一視同仁。益廣鴻寧之福。

卽位詔

虞集

洪惟太祖皇帝。啓闢疆宇。世祖皇帝。統壹萬方。列聖相承。法度明著。我曲律皇帝。入纂大統。修舉庶政。動合成法。授大寶位于普顏篤皇帝。以及格堅皇帝。曆數之歸。實當在我忽都篤皇帝。扎牙篤皇帝。而各播越遼遠。時則有若燕帖木兒。建義效忠。戡平內難。以定邦國。協恭推戴。扎牙篤皇帝。登位之始。卽以讓兄之詔。明告天下。隨奉璽紱。遠迓忽都篤皇帝。朔方言旋。奄棄臣庶。扎牙篤皇帝。荐正宸極。仁義之至。視民如傷。恩澤霽滂。無間遠邇。顧育眇躬。尤篤慈愛。賓天之日。皇后傳扎牙篤皇帝。顧命於太師太平王右丞相答刺罕燕帖木兒。太保浚寧王知樞密院事伯顏等。謂聖體彌留。益推固讓之初志。以宗社之重。屬諸



大兄忽都篤皇帝之世嫡。乃遣使召諸王宗親。以十月一日來會大都。與宗王大臣同奉遺詔。揆諸成憲。宜御神器。以至順三年十月初四日。卽皇帝位于大明殿。可大赦天下。於戲。肆予沖人。託于天下。臣民之上。任大守重。若涉淵冰。尙賴宗王大臣百司庶府。交脩乃職。思盡厥忠。嘉與億兆之民。共保隆平之治。



# 元文類卷之十

## 冊文

### 皇后冊文

王 磐

維至元十年歲次癸酉三月甲寅朔十三日丙寅皇帝若曰天地合德故能覆載萬物而不遺日月並明所以照臨六合而無外至哉夫婦之大義實配陰陽之兩儀咨爾皇后弘吉烈氏戚里名家元勳貴族備儀率禮令德來嬪自朕奉藩之初至于踐阼之日明識遠慮裨益宏多雖褱翟正位于長秋而典冊未光于大禮茲者文臣敷奏實應朕心今遣攝太尉中書右丞相安童持節授爾玉冊寶章備物充庭式遵古典於戲恭順接下九族形雍睦之風儉素相高萬世衍靈長之福服茲寵命益懋徽猷

### 皇太子冊文

徒單公履

皇帝若曰咨爾皇太子

裕宗廟諱

仰惟太祖聖武皇帝遺訓嫡子中有克嗣服繼統者預選定之是用立太宗

英文皇帝以紹隆丕構自時厥後不爲顯立冢嫡遂啓爭端朕上承祖宗弘遠之規下協昆弟僉同之議乃從燕邸立爾爲皇太子積有日矣比者儒臣敷奏國家定立儲嗣宜有冊命此典禮也今遣攝太尉中書左丞相伯顏持節授爾玉冊金寶於戲聖武燕謀爾其奉承昆弟宗親爾其和協使仁孝顯於躬行可謂不負所託矣尙其戒哉式勿替朕命

太祖皇帝加上尊號册文

王構

維至大二年歲次己酉某月某日。孝曾孫嗣皇帝臣某。謹再拜稽首言。伏以恢皇綱。廓帝紘。建萬世無疆之業。鋪宏休揚偉績。遵累朝已定之規。式當繼統之元。盡有稱天之誅。孝弗忘于率履。制庸謹于加崇。欽惟太祖聖武皇帝陛下。淵量聖姿。睿謀雄斷。沛仁恩而濟屯厄。振羈策以馭豪英。惟解衣推食于初年。見君國子民之大略。玄符顛握。諸部悉平。黃鉞載麾。百城隨下。裔土兼收。于夏孽。餘波克殄。于金源。蕩蕩乎無能名迹。遠追于湯武。灑灑爾其爲訓。道允協于唐虞。根深峻嶽。而維者四焉。囊括殊封。而統之一也。肆予小子。承此丕基。兩祗見於太宮。恆優臨于端扆。祚垂鴻兮。錫裕尙期。昭報之申。牒鏤玉以增輝。敢緩彌文之舉。謹遣某官某。奉玉册玉寶。加上尊諡。曰法天啓運聖武皇帝。廟號太祖。伏惟威靈昭假。景貺潛臻。闡繹吾元。與天並久。

世祖皇帝諡册文

王構

維至元三十一年歲次甲午。五月庚戌朔。越九日戊午。孝孫嗣皇帝臣某。再拜稽首言。臣聞繼志述事。非盡孝無以致其誠。表行誅功。非定諡無以稱其實。肆邦彝之具舉。維天道之協從。欽惟先皇帝。膺錄受圖。體元立統。蚤從藩邸。茂著徽稱。爲治之基有常。經國之略則遠。役用衆智。獨斷于衷。總攬萬機。如指諸掌。內朝廷。外侯牧。等威迭降。罔不適中。先教化。後刑名。本末相循。亦皆有序。在御迨踰於三紀。推尊合冠於百王。若夫惠及困窮。恩加降附。慎終如始。每存好仁之心。保小以仁。特示包荒之量。擴盛猷之鴻鬯。沛膏澤之醇醲。方其泰運漸亨。戢濟多難。雖綱復綴。混一四方。傳檄而氛祲開。渙號而方維定。乾旋坤轉。不足

以喻其機。雷厲風飛。不足以比其捷。至於嘉言博采。惟典謨訓誥。是師。諸藝畢延。盡陰陽圖緯之學。考音律以創字畫。參古今以制禮儀。振耀威靈。肅陳兵衛。白旄黃鉞。時則親巡。犀甲雕弧。止於不用。其聖德弗可及已。神功蔑以尙焉。蓋文之所加者深。武之所服者大。是用升崇吉祔。揆卜剛辰。謹遣攝太尉臣兀都。帶奉冊寶。上尊諡曰。聖德神功文武皇帝。廟號世祖。伏惟睿靈。俯垂昭鑒。思皇多祐。錫羨無疆。

### 皇太后冊文

陳儼

維至元三十一年。歲在甲午。十一月丁未朔。皇帝臣某。謹稽首再拜言曰。臣聞自家而國。治道必有所先。立愛惟親。君德莫加於孝。況恩深於鞠我。而禮重於正名。歷代以來。令儀可考。人子之職所在。天下之母。宜尊恭惟聖母。聖善本乎天資。靜專法乎地道。上以奉宗祏之重。下以敘倫紀之常。助我前人。守卷耳憂勤之志。保予冲子。成思齊離肅之風。肆神器之有歸。知孫謀之素定。畀付雖由於曆數。規模一出於庭闈。是用率籲衆心。章明鉅慶。不勝拳拳大願。謹奉冊寶。上尊稱曰。皇太后。伏惟長信穆穆。周宗綿綿。備洛書之錫福。粲慈極之儀天。瑤圖寶運。于萬斯年。誠歡誠忭。稽首再拜。

### 睿宗皇帝加上尊諡冊文

劉廣

伏以詣泰壇而請命。有稱天以誅之文。薦清廟而致嚴。蓋若昔相承之典。剛辰爰卜。遺美載揚。欽惟睿宗。景襄皇帝。孝友溫恭。聰明濬哲。屬我家肇造于朔土。佐聖祖邁征于四方。逮天討之奉行。致皇威之遠暢。金源假兩河之息。天水渝通好之盟。遂移秦隴之師。爰有褒斜之舉。既平南鄭。順流而東。再涉襄江。自上而下。乃眷三峯之捷。實開萬世之基。曆既亡而齒亦寒。虢可伐而虞不臘。適英文之遠豫。圖中夏之底寧。

毋作神羞。請以身代。爰俟金滕之啓。已知寶祚之歸。迪我後人。紹茲明命。徽稱顯號。雖已擬諸形容。玉檢金泥。尙未遑於潤色。奉玉冊玉寶。加上尊諡。曰仁聖景襄皇帝。廟號睿宗。伏惟端臨辰座。誕受鴻名。億萬斯年。永錫繁祉。

順宗皇帝諡冊文

程鉅夫

孝子嗣皇帝臣某謹再拜稽首言曰。臣聞顯親所以爲子。追遠所以厚民。矧必百世祀而位弗隆。爲天子父而養弗逮。是宜稱秩。以達純誠。欽惟皇考皇帝。淵穆有容。神明莫測。文孫文子。鍾至愛於兩宮。宜君宜王。膺具瞻於四海。當璧之祥未卜。棄蹤之迹已遙。興言欲報之恩。昊天罔極。對越有成之命。夙夜惟寅。昭哉玄德之升聖矣。生知之異。衍莫衍於昌後嗣。而有天下。孝莫孝於配前烈。而茂本支。念茲繼體之初。益切中心之慕。謹遣攝太尉某官某。奉玉冊玉寶。上尊諡曰。昭聖衍孝皇帝。廟號順宗。伏惟明明降鑒。序于祖宗。攸躋攸寧。永錫祚胤。

皇后冊文

程鉅夫

維皇慶二年歲次癸丑。三月辛卯朔。越十有六日丙午。皇帝若曰。朕荷天地祖宗之祐。皇太后之訓。嗣大歷服。思底于治。必立元配。表正六宮。咨爾弘吉刺氏。實我家世戚。嫡嗣所自出。積德流慶。肆啓爾來嬪于朕。淑慎孝恭。令譽昭聞。承命慈闈。爰正爾位。今遣攝太尉中書右丞相禿忽魯。授爾玉冊玉寶。命爾爲皇后。惟天地定位。萬物以生。日月並照。萬國以明。君后合德。萬化以成。上以事上帝。奉宗廟。下以親九族。正萬邦。爲朕內助。惟爾之賢。其永念厥德。履中體順。俾聖母暨予一人。以寧。豈惟爾嘉。天亦永相念爾。共享

有國欽哉。

皇帝尊號玉冊文

姚燧

維至大二年正月乙酉朔越七日辛卯。皇太子中書令樞密使臣某謹率中外文武百僚頓首頓首謹言。昔我世祖既平炎趙質之於書。幅員廣長。振古無倫。覆燾之下。八紘萬國。莫敢不庭。何獨一王西北岸然。憑道阻修。方命正朔。德綏之而不摯。威董之而不響。夫豈不能聲罪致罰。突入其地。終以聖仁親其宗親。包荒有年。成宗繼序。憤久驚頑。天鑒昭明。於裕皇孫。獨異陛下。授以太祖皇帝信寶。撫軍漠北。是固以張足付神器之本。時未及冠。承命卽行。其視萬里莽園。寒冽之鄉。不遠不難。如堂適庭。至則獎歷諸軍。修明法志。簡拔果毅。均苦分勞。解衣燠寒。推食飫飢。洗洗汙汙。士氣日作。睿算伐謀。待寇歲至。奪人以先。身踐戎行。靈馳電擊。大北其羣。虛己不矜。日慎一日。始終十年。不狃屢勝。狂狡不懲。悉銳來加。當以選鋒。伺間出奇。盡襲輜重。彷彿無歸。度不能軍。耄倪纍纍。降口百萬。致茲救寧。平四十年未靖之梗。成兩祖宗未究之志。天下之人。聞其風聲。思覩天光者。願顒顒翹翹。九圍一心。握是乾符。歸正宸極。弛武事之夙習。洽新化以文治。立愛自親。曾未旬浹。上尊太后。問安以時。下建儲宮。庶政是先。又舉列聖未遑之典。欽崇元祀。玉瓚黃流。薦裸太室。還蹕龍興。徘徊太祖。龍旂九旂。勳金于斯。肇基帝業。爲城中都。又以孔子垂範百王。將二千年而顯諡未稱。加大成於至聖。文宣王上立勞于軍。與凡庭臣。悉大賚之。間歲不登。旣賑旣恤。虞施未博。民罹罪罟。再肆大宥。至德難名。赫赫巍巍。惟天爲大。掛一漏萬。井觀如斯。求可盡臣下歸美報上者。惟是徽稱。謹奉玉冊玉寶。上尊號曰。統天繼聖欽文英武大章孝皇帝。欽惟陛下立心天地。立極生民。茂

對鴻名于億萬年。

皇太后尊號玉冊文

姚燧

維至大三年歲次庚戌冬十月甲辰朔越五日戊申嗣皇帝臣某臣伏思顯考順宗未臨海寓眇眇小子託其遺體顧踐丕基惟事聖母養以天下何無不有何欲不臻而隆名盛典辭未見俞非臣所以表微忱酬大德也欽惟皇太后陛下貞順而齊肅淵哲而剛明居常處變愛威異施臣在先朝受詔漠北往撫諸軍可謂遠役以義割恩從臾其行迨輒河陽永懷彌切親至五臺禱于佛乘尚憑陰隲早遂振旅殿閣是崇靈貺用昭旋聞國恤併日馳赴邪謀方興授冊儲皇曾不再日掃清宮掖待臣以來畀付神器自非睿斷安敢內訂往歲鑾輅再轡五臺淨供大修以畢夙願極心爲臣天燾地持日居月諸其大其明非言所喻詩之言曰母氏劬勞推之眇末咻仁煦慈百倍爲艱圖以報塞惟崇顯號者強而名之庶幾聖德昭明天下是用類于上帝禋于太室奉玉冊玉寶上尊號曰儀天興聖慈仁昭懿壽元皇太后欽惟皇太后陛下慶躋莫上之尊福衍無疆之曆菲躬是保慈訓是承

皇太子冊文

閻復

皇帝若曰祖宗聖緒恭承丕顯之謨兄弟懿親宜正元良之號立天下之大本示天下以至公咨爾皇太子仁廟德器淵深英姿玉粹武奮清宮之偉績文參定策之殊勳豈特華尊交輝之情式相好矣其在臆

御名

驚守成之治須汝贊之故於連枝同氣之間付以監國撫軍之任茲上承於母意蓋允出於朕心已於六月朔旦面授爾皇太子金寶今復遣攝太尉丞相塔思不花持節授爾玉冊維寵命之荐膺尚謙恭而自



牧。益盡事親之孝。益勤事上之忠。以敦九族內睦之風。以衍億祀無疆之慶。

### 成宗皇帝諡冊文

張士觀

嗣皇帝臣某謹再拜稽首言曰。臣聞稱天以誅。表名實之至公。法日而名。庶形容之可擬。維帝王之有諡。蓋今古之彝章。欽惟大行皇帝。稟上聖之資。撫重熙之運。當裕考龍升之後。承世皇燕翼之謀。武威肅鎮於遐荒。文德誕敷於華夏。業業謹盈成之戒。愉愉盡孝敬之誠。罷勤遠之兵。邊釁弭而苗頑格。遣直指之使。皇澤宣而民瘼除。九族形敦睦之風。萬國洽隆平之治。爰酌奉常之儀。用昭告祔之文。謹遣攝太尉某官某奉冊寶上尊諡曰。欽文廣孝皇帝。廟號成宗。伏惟睿靈在天。孚鑒逮下。茂膺典冊。錫羨邦家。

### 仁宗皇帝諡冊文

張士觀

維延祐七年歲次庚申八月丁未朔粵十日丙辰。孝子嗣皇帝臣某謹再拜稽首言。臣聞觀其諡而知其行。著王者之不稱。禋于廟而誅于郊。實邦家之彝典。雖天地之大。莫能擬議。而臣子之情。宜極形容。爰體至公。式揚景鑠。欽惟大行皇帝。聰明冠古。勇智自天。初大德之陟遐。生內覲於不測。乃從潛邸。獨運聖謨。正神器於幾危。定乾維而重構。豐功盛烈。奮立一時。偉望英聲。揚溢四海。尋被武皇之歷試。納于大麓。以弗迷。由母弟之懿親。膺元良之重寄。取法裕廟。主鬯之道隆。奉養東朝。因心之孝至。及嗣歷服。益見猷爲。月恆日升。廓昭代文明之治。海涵春煦。推聖人博愛之仁。至於敦勸農桑。不嗜田獵。每覆奏於庶獄。必惻怛於宸衷。肇設制科。以待天下之士。特旌死節。以勵天下之忠。臨御十年。始終一德。身衛斯文而不倦。人由其道而莫知。克謹持盈。諒多遺美。屬升崇於吉祔。用祇薦於鴻名。上以慰在天之靈。下以協造庭之請。

是誨剛日備舉緝儀謹遣攝太尉某官某奉玉冊玉寶上尊諡曰聖文欽孝皇帝廟號仁宗伏冀睿靈俯垂歆鑒流光有永錫羨無疆

英宗皇帝諡冊文

袁桷

伏以瑤圖續緒神已御於鼎湖玉冊揚休禮宜陞于太室悼降年之不永儼立政以如新爰述徽猷以傳信史欽惟大行皇帝文明天縱剛健日嚴辨奸邪於嗣位之初彤庭祗畏廣儀注於熙朝之際清廟肅雝絕封勅以杜儉人申憲章以勵多士罰茲無赦令必惟行君臨三載而有成知周萬物而莫隱豈運逢艱否大命靡終然號謹追崇尊名是著謹遣攝太尉某官某奉玉冊玉寶上尊號曰睿聖文孝皇帝廟號英宗伏惟炳靈有赫歆格無違耐于新宮以妥以宜

皇后冊文

袁桷

皇帝若曰在昔正始之道必先內治于以奉承宗祧化成天下朕嗣大歷服祇循憲章宜資配助用彰位號咨爾皇后竈吉刺氏淑慎柔嘉遵道是行輔佐王邸謙抑自持實生元子國本斯建興龍重鎮介子紹封粵若臨御之初贊畫計慮厥相維多正位中宮天人協祥今遣攝太尉中書右丞相旭邁傑授爾玉冊寶章坤順承天人道攸則表正母儀萬邦是觀維躬儉節用則徽音是嗣惟求賢審官則私謁靡干匡朕德格朕心實爲有賴詩書所稱罔專美于前代噫敬厥初終有慶尙其念哉以膺爾景命

明宗皇帝諡冊文

虞集

臣聞統必有宗生嘗得以致其讓廟必有主歿思所以尊其名稽古考文宜天錫誅欽惟先皇帝夙秉勇

智。惟時元良體傳次之成言。避謳歌而遯出。雖身居絕域。多歷於歲年。而義動遠人。樂爲之先後。德威孔著。未堪大業之艱貞。事變匪常。猶憫生靈而慎動。庶來蘇於篋戴。爰戡定以奉迎。已謹清宮。俄虛黃屋。臣民寡祐。永遺惠澤之敷施。天日有靈。尙想神明之如在。禮嚴升祔。誠備顯揚。謹遣攝太尉某官某。奉玉冊玉寶上尊諡曰翼獻景孝皇帝。廟號明宗。伏冀睿慈俯回敵假。克綏丕祚。垂裕無疆。



# 元文類卷之十一

## 制

加封孔子制

大德十一年九月

閻復

蓋聞先孔子而聖者非孔子無以明。後孔子而聖者非孔子無以法。所謂祖述堯舜。憲章文武。儀範百王。師表萬世者也。朕纂承丕緒。敬仰休風。循治古之良規。舉追封之盛典。加號大成。至聖文宣王。遣使闕里。祀以太牢。於戲。父子之親。君臣之義。永惟聖教之尊。天地之大。日月之明。奚罄明言之教。尙資神化。祚我皇元。

加封孔子父母制

至順元年

謝端

闕里有家。系出神明之胄。尼山請禱。天啓聖人之生。朕聿觀人文。敦求往昔。惟孔氏之有作。集羣聖之大成。原道統則堯授舜。傳之周文王。論世家則契至湯。下逮正考甫。其明德也遠矣。故生知者出焉。有開必先。克昌厥後。如太極之生天地。如鉅海之有本源。雲仍旣襲於上。公之封考妣。宜視夫素王之爵。於戲。君子之道。考而不繆。建而不悖。于以敦典而敘倫。宗廟之禮。愛其所親。敬其所尊。于以報功而崇德。尙篤其慶。以相斯文。齊國公叔梁紇。可加封啓聖王。魯國太夫人顏氏。可封啓聖王夫人。

封宣聖夫人制

虞集

我國家惇典禮以彌文。本閨門以成教。迺瞻素王之廟。尙虛元媿之封。有其舉之。斯爲盛矣。大成至聖文宣王妻亓官氏。來嬪聖室。垂裕世家。籩豆出房。因流風於殷禮。琴瑟在御。存燕樂於魯堂。功言邈若於遺聞。儀範儼乎其合德。作爾禕衣之象。稱其命鼎之銘。噫。秩秩彝倫。吾欲廣闢。雖雀巢之化。皇皇文治。天其興河圖鳳鳥之祥。可特封大成至聖文宣王夫人。

追封孟子父母制

延祐三年十月

張士觀

朕惟繇孔子至於孟子。百有餘歲。而道統之傳。獨得其正。雖命世亞聖之才。亦資父母教養之力也。其父夙喪。母以三遷之教。勵天下後世。推原所自。功莫大焉。稽諸往代。實闕褒崇。夫功大而位不酬。實著而名不正。豈朕所以致懷賢之意哉。肆頒寵命。永賁神休。可追封其父爲邾國公。母爲邾國宣獻夫人。

追封伯夷叔齊制

閻復

蓋聞古者伯夷叔齊。逃孤竹之封。甘首陽之餓。讓爵以明長幼之序。諫伐以嚴君臣之分。可謂行義以達道。殺身以成仁者也。昔居北海之濱。遺廟東山之上。休光垂乎千載。餘澤被於一方。永懷孤峻之風。庸示褒崇之典。於戲。去宗國而辭周粟。曾是列爵之可廢。揚義烈以激清塵。期於世教之有補。可追封伯夷爲昭義清惠公。叔齊崇讓仁惠公。

封周子爲道國公制

霍希賢

蓋聞孟軻既沒。道失其傳。孔子微言。人自爲說。諒斯文其未喪。有真儒之間生。濂溪周惇頤。稟元氣之至精。紹絕學於獨得。圖太極而妙斡萬化。著通書而同歸一誠。俾聖教燦然復明。其休功尙其不泯。朕守成

繼體。貴德尊賢。追念前修。久稽彝典。已從廟庭之祀。盍疏鄉國之封。於戲。霽月光風。想清規之如在。玄衮赤芾。冀寵命之斯承。

楊庸教授三氏子孫制

中統元年九月

楊果

孔氏顏孟之家。皆聖賢之後也。自兵亂以來。往往失學。甘爲庸鄙。朕甚憫焉。今以進士楊庸教授孔氏顏孟子弟。務要嚴加訓誨。精通經術。以繼聖賢之業。

許衡爲懷孟教官制

楊果

咨爾許衡。天資雅厚。經學精專。大凡講論之間。深得聖賢之奧。受罰者恐陳君所短。爲盜者畏王烈之知。所在向風。真堪正俗。可令於懷孟等處。選棟子弟俊秀者。舉歸教育。取作範模。再令董子帷前。有傳授之。弟子重使王通門下。皆經濟之名臣。毋喪斯文。以弼予治。

降封宋主爲瀛國公制

王磐

時逢屯否。嶽瀆分疆。運值休明。乾坤一統。眷靖康之餘裔。擅吳會之奧區。遠隔華夏。久睽鄰好。我國家誕膺景命。奄有多方。炎風朔雪之鄉。盡修職貢。若木虞淵之地。靡不來庭。歷六合而混同。豈一方之獨異。用慰僊蘇之望。爰興問罪之師。戈船飛渡。而天塹無憑。鐵馬長驅。而松關失險。宋主熋乃能察人心之向背。識天道之推移。正大姦誤國之誅。斥羣小浮海之議。決謀宮禁。送款軍門。奉章奏以祈哀。率親族而入覲。是用昭示大信。度越彝章。位諸台輔之尊。爵以上公之貴。可封開府儀同三司。檢校司徒瀛國公。

丞相史天澤贈諡制

劉元

周制以八統詔王。必先敬故。漢官以列爵馭下。亦自報功。古有彝章。朕茲申勸。故開府儀同三司。平章軍國重事。中書左丞相史天澤。性資貞亮。器宇沉雄。自開國以將三軍。妙契淮陰之略。至分茅而推千乘。其高孤竹之風。況結知於累朝。迨總戎於四紀。及朕纂承之始。克膺輔相之良。內秉國均。兼筦機于右府。外清邊陲。幾授鉞于齋壇。可謂威惠之交孚。抑亦忠勤之備至。繼以荆蠻之蠢。重煩汴省之趨。惟時壯猷行策。功而飲至。不圖晚志。遽引年以謝歸。申言齒德之尊。端愈典刑之益。命開府第。協贊廟謀。方就佚于尊疊。復遺憂于邊閫。冀資偉算。用一遐陬。顧上游之濟師。方倚坐籌之勝。愴中途之病革。莫收臥護之勳。弗飾厥終。曷旌迺績。宜表出羣之行。進登符六之階。於戲。國步方新。天不憖遺于一老。閱章加襜。卿其永賁于九原。營魂有知。歆予異渥。可贈開府儀同三司太尉。諡忠武公。

太保劉秉忠贈諡制

李槃

臣以忠孝而事上。貴輸獻納之誠。上以禮義而遇臣。思篤始終之愛。視死之日。猶生之年。故光祿大夫太保。參領中書省事。劉秉忠。學窺天人。識貫今古。遂冲而有守。安靜而無華。昔侍潛藩。稔聞高論。適當三接之際。懇上萬言之書。蓋將舉天下而措諸安。以戒爲人主者。果於毅。朕嗣服而伊始。卿盡力以居多。蓋得卿實契於朕心。而獨朕悉知於卿意。事皆有驗。人匪他求。周旋三十年。不避其難。剴切數百奏。各中其理。共成庶政。方圖任於舊人。誰謂昊天不憖。遺於一老。興言及此。何日忘之。載惟台輔之尊。厥有泉扃之賁。是用錫之綸命。峻一品之華階。襜以袞衣。躡三槐之正位。復加顯號。允答殊勳。惟爾英靈。識予哀寵。可贈儀同三司太傅。諡文貞公。



左丞董文炳贈諡制

李 槃

折衝禦侮。誠社稷之良臣。崇德報功。實國家之令典。途雖殊於生死。禮當極於哀榮。故資德大夫中書左丞。僉書樞密院事。董文炳。王佐之才。將家之子。自出宰於劇縣。嘗入侍於潛藩。山路間關。謁戎輅遠趨於六詔。風濤洶湧。扈龍舟首渡於三江。迨予嗣服之年。委以專征之任。截彼淮浦。至于海邦。招降兩浙之新民。撫定七閩之故地。大小數百戰。奮不顧身。勤勞三十年。厥有成績。往者睢陽城下。父已歿於兵鋒。比來揚子橋邊。男復終於王事。一門忠孝。萬古芳香。及茲幹事而回。方以不次而待。何言中路殲我良人。蓋非卿執佐於朕躬。而獨朕悉知於卿意。弗頒異數。曷慰永懷。其陞一品之榮。以賁九泉之隧。倘其有識。歆此無窮。可贈金紫光祿大夫平章政事。諡忠獻公。

丞相伯顏贈諡制

閻 復

天下大統。不嗜殺則一之。聖主弘功。蓋必資於賢者。昔在至元之際。方隆混一之期。有來命世之奇材。懋建殊常之偉績。故太傅開府儀同三司。錄軍國重事。伯顏。嶮峒孕秀。列象騰精。居政府則不動聲氣。措泰山之安。秉戎律則純乎仁義。猶時雨之降。當其聲鶴浦滄盟之罪。總龍驤飛渡之師。克廣世祖好生之心。允獲宋人誠服之意。衣冠不改。市肆不易。恩威普洽於三吳。車書以混。文軌以同。聲教遂覃於百粵。逮朕纂承之始。益申推戴之誠。永懷社稷之宗臣。宜侈河山之高爵。於戲。曹侍中江南之役。規摹一何小哉。郭汾陽異姓而王。崇報斯亦至矣。可贈宣忠佐命開濟功臣。太師開府儀同三司。追封淮安王。諡忠武。

丞相阿朮贈諡制

閻 復

邊外開邊四達弗庭之域。將門出將。三持分閫之權。緬思百戰之勞。宜用九原之賁。故光祿大夫中書左丞相兼都元帥贈開府儀同三司太尉追封并國公諡武宣阿朮英才閭世勇略邁倫當先皇大理之征佐迺父雲南之役靖蠻荒而平交趾拔襄漢而下江南鷹獠揮戈萬里若衽席之上龍驤飛渡三吳歸掌握之中贊成混一之圖式副元勳之號按禮寺易名之典加王章異等之恩於戲青史屢書諒騰芳之有永黃河如帶尚流慶於無窮可加贈推誠宣力保大功臣太尉開府儀同三司上柱國追封河南郡王諡武定。

丞相線真贈諡制

閻復

蕭曹翊漢素非閥閱之家。房杜匡唐卒乏鈞衡之嗣。眷先朝之碩輔。綿累世之芳猷。永懷弼亮之賢。庸示褒崇之禮。太傅錄軍國重事。開府儀同三司中書右丞相監修國史。完澤之父。故光祿大夫中書右丞相宣徽使線真。稟靈河嶽。著象星辰。應明良千載之期。萃忠孝一門之慶。梯天力競。元戎奠鶉首之郊。扶日功高。突葉應龍飛之運。惟昔中書之草創。歷陳治古之宏規。位望冠於百僚。利澤施於四海。躬承世祖肇隆中統之不圖。子侍裕皇。復贊元貞之初政。方倚具瞻之重。宜昭先德之華。維垣進秩於上台。列爵仍疏於大國。錫號著勳庸之偉。易名申節惠之文。殊恩允出於朕心。卹典非由於汝請。表南宮雲臺之像。旣彰異渥於宗臣。措天下泰山之安。益助貞勤於上宰。尚服休命。永播英聲。可特贈宣忠保德佐理功臣太師開府儀同三司中書右丞相追封秦益國公諡忠獻。

丞相和理霍孫贈諡制

閻復

北方間氣實生命世之材。黃門清風。蓋出登瀛之選。慨英靈之已往。當卹典之崇頌。故光祿大夫中書右丞相和理霍孫。派接元勳。慶鍾金德。早躡鼇峯之首。誕披雲漢之章。開闢賢關。爲司徒而敷五教。更張化。瑟位冢宰以統百官。恢揚累世之洪休。新美至元之大政。掄才如崔祐甫之廣潔。已有張忠定之剛著。績熙朝。旣闡文明之治。疏封列國。宜居禮義之鄉。可贈保德協謀佐理功臣。太師開府儀同三司。追封齊魯國公。諡文忠。

翰林承旨王磐贈官制

王之綱

崇德報功。恩靡忘於先正。易名節惠。禮具載於彝章。故翰林學士承旨。資德大夫。知制誥。兼修國史。領集賢院事。致仕王磐。志大以剛。識明而遠。惟根本培植於內者。確乎不拔。故英粹發越於外者。煥乎有文。出處無愧於心。窮達不易其守。潛知逆黨。星言發青社之謀。明斥權姦。露奏重紫微之柄。出于藩則用蘇民氣。入視草則允契宸衷。贊大議於廟堂。播清芬於簡策。諫止東伐。奮不顧身。請復外臺。凜然抗疏。是以皇祖篤褒嘉之眷。昭考垂飭賜之勤。正有待於乞言。何屢陳於謝事。榮歸梓里。庶衍椿齡。朕方嗣服於丕基。天不憖遺於一老。追惟往行。惕用興懷。俾超進於孤卿。仍具頒於寵數。於戲。千古淵源之學。蔑以踰修。一生忠義之心。諒無愧軾。願二賢已膺於美諡。而兩字宜媿於前休。精爽如存。欽承不昧。可贈榮祿大夫。少保。諡文忠公。

左丞許衡贈官制

姚燧

天非繼聖學之墜緒。則不生命世之大才。國欲與王道以比隆。肆用爲烝民之多覺。何物故之已久。尙人

思之未忘。故資善大夫中書左丞集賢大學士兼國子祭酒教領太史院事許衡玉裕而金相準平而繩直出處則惟義所在言動必以禮自持休休焉有容屬屬乎其敬人能弘道惟朝聞夕死之是期我欲至仁匪晝誦夜思而不得行己似秋霜烈日化人如時雨和風來席下之摳衣滿戶外者列屨達簡在帝心者率多丞弼窮固守師說者不失善良鶴鳴九皋而聲聞于高鳳翔千仞必德輝乃下爰立相以堯君舜民之志所告上皆伊訓說命之言丹扈斥姦少不避雷霆之震擊青臺治曆本於筮日月而送迎繇理窮而智益明隨任使而職斯舉今既亡矣誰其嗣之於戲在爾身有垂沒世之名於朕心有失同時之恨雖成廟納書以命諡固已振木鐸之高風而功臣胙土則未加用申錫彝章於下地光靈如在寵數其承可贈正學垂憲佐運功臣太傅開府儀同三司追封魏國公仍諡文正

元帥烏野而封諡制

姚燧

惟太祖之基命龍遂乘雲有良臣以樹勳魚猶得水展我同姓豈伊異人故金紫光祿大夫北京等路兵馬都元帥烏野而氣鍾光嶽之純全誠貫金石之堅確智足謀國勇則冠軍佐天運之維新憤人心之未定既降復叛必煩以行故自北而徂南首遼尾魏亦攘左而塞右膺齊背秦語其跋履於四方數豈戎衣之百襲爲庸已懋其報宜豐可當非劉氏之不王姑啓若魯侯之大字併申褒典少慰英靈噫佳城之鬱年三千名固已昭乎白日分國於肇州十二澤期不斬於黃河可贈某官追封營國公諡忠勇

元帥紐鄰贈諡制

姚燧

朕聞率土之臣莫如同姓干城之將尤可異恩故遠稽於禮經用厚加乎愍冊具官某其在弱冠嘗爲選

鋒迅與鷹揚號爲萬人之敵。虓如虎視。隱然千里之威。屬鉅寇之及郊。乏總戎之制。闔求可居此。孰有異然。其爲人心所歸。不待君命之至。推使秉鉞。辭拒循牆。卽下令於轅門。已折衝於尊俎。握機旗建。四川之草木知名。開壁鼓行。三峽之星河動影。勇頗牧之非匹。策孫吳之可方。入阨危則膺衆所不先。分賜與則如士之最下。勁騎所蹙。堅城每摧。如斯宣力於兩朝。何止出奇於百戰。嗚呼。降年弗永。爲烈則多。雖狀不及識之。亦心未嘗忘者。置戶以守。何樵牧可侵。馬鬣之墟。故壘卽封。或魂魄猶思蠶叢之國。可贈某官。追封蜀國公。諡忠武。

丞相阿塔哈封諡制

姚燧

臣爲委質。勞於同軌之間。國以念功。恩及襦衣之後。雖飾終其時有所未及。在追恤今日。烏可或遺。爰寵幽褒。用昭異數。故光祿大夫。江西等處行中書省左丞相阿塔哈。力齊嶽負。量與川涵。託開國將種之苞。根挺明堂。工師之大木。受任闔外。賈勇籌邊。爲憲宗入蜀之前鋒。因殘百粵。非世祖投江以尺箠。不返三苗。報效之私。寤寐不置。百其身以奚恤。一迺心之是期。會師征險。順而貞。得夫剛決柔之兆。考版圖之幅裂。乘旄鉞以鼓行。將削尊號於偏方。必使義聲以先路。勢乘破竹。名正包茅。有不待陣風蛇之蟠。而已飛塵星駟之捷。如震如怒。衽金革北方之強。于理于疆。盡江漢南國之紀。羣黎壺漿而崩角。幼主席藁以泥頭。瘁事匪伊。成功能爾。凡十年爲丞于行省。奄一旦違世于先朝。白雲杳歸于青山。清風空遺于黃閣。像未麟臺之貌。服先龍袞之升。旣進師垣。又建王國。俾大書於神路。過者式焉。示絕等於臣鄰。忠斯勸矣。尙膺茂渥。少慰營魂。可贈推忠翊運宣力功臣。開府儀同三司。太師上柱國。追封順昌郡王。諡武敏。

妻札刺而氏封王夫人制

姚燧

大帝立極之十五年。嘗曰。昔我太祖。戡定中夏。日不暇給。由天未厭宋德。故帝制偏方。命將出師。一家天下。今惟其時。曾不三年。墟其廟社。雖曰。睿算萬舉萬全。亦大臣奉辭宣力。死職忘身。有以致茲。厥功茂哉。用是追崇。故光祿大夫。江西等處行中書省左丞相。阿塔哈。爲推忠翊運宣力功臣。開府儀同三司。太師。上柱國。順昌郡武敏王。其故妻札刺而氏。在父母家。幽閒而禮。其移天也。淑慎有聞。所可靈傷。在不壽考。以語媿德。不及見夫丞相建希世之功。以語娠賢。不得食子大夫糾官邪之祿。非賁玄壤。曷慰貞魂。可封順昌郡王夫人。

丞相塔刺哈追封淇陽王制

姚燧

出入帷幄。在人十能。而已則千。訐謀廟堂。爲相一年。而疾居半。竟邦家之殄瘁。宜王禮以追崇。故開府儀同三司。中書右丞相。監修國史。太保。太子太師。知樞密院。徽政使。中政使。宣徽使。左都威衛指揮使。塔刺哈。維昔開國之遺苗。乃今太師之元嗣。由爾世胄。爲我親臣。事世祖至今也。凡三朝。職食官而久者。非一日。灼其廉明而忠亮。與夫恭遜而溫文。眷茲中書。出庶政之原。居以右相。絕百僚之席。使加中政。機總六軍。善調護而長宮師。監纂修以成國史。如此重責。皆所裕爲。一德可以寬鄙夫。片言奚止簡繁務。思過榮之可懼。視侍利以不貪。同綰銀艾者十人。爾先辭免其太尉。均受錫田以萬畝。爾獨還致於司空。觀父子之並相一門。求聖賢與尙友千古。改爲改作。緇衣何賴乎武桓。拜後拜前。赤烏未慙於周魯。方歌功於清廟。倏委魄於玄閭。豈意少者沒而老者存。益信神難明而理難測。憐乃公獨傷於漠北。誓爾後均胙乎淇。

陽。嗚呼。何但上下牀。盡餘子可束之高閣。如失左右手。慨正人不作於下泉。咨爾靈明。歆朕休命。可特贈封諡。爲懷忠昭德佐治功臣。開府儀同三司。太師上柱國。淇陽惠穆王。

妻啜思蠻公主封王夫人制

姚燧

朕自踐阼于今三年。洪惟天地祖宗之佑。陰陽和平。星緯咸若。民物豐阜。邊鄙不聳。朕是用大賚于羣工。凡嘗執政柄理者。必追錫及于三世。而伉儷之賢。亦與嘉娶於戲。是曠代之典也。具官塔刺哈妻某。毓秀朱邸。作配相門。少習儀訓。閑於婦道。貞順著稱。垂範閭閻。相厥夫子。爲世英宰。而芳蘭早萎。不終榮顯。懿彼宗戚。失此女師。開吉壤於淇陽。正邦家之顯位。服我新寵。安爾幽靈。

耶律鈞贈官制

姚燧

臣克厥艱。而始民敏其德。子焉能仕。皆由父教之忠。眷予問義之人師。實漢僕射之位長。固求還笏。難斷抗章。是用追崇莫先。庶以垂裕乃後。昭文館大學士中奉大夫。國子祭酒。耶律有尙之考。提領東平路工匠所長官鈞。中書猶子。丞相從兄。宗承遼室之遺苗。禰死金源而全節。尙論其世。孰踰爾家。而又誨嗣續善詩禮之敦。於以見平生夏紈袴之習。自夫共工之謝。晏然同俗之安。爭饋肆乎五漿。振衣岡於千仞。奉先惟孝。雖耆耄於禰祠也。親焉。接下以恭。其臧獲之久。故者民耳。匪直入官而知止。抑展在家而必聞。惜棄世於九齡。負爲國之三老。於戲。神遊安往。定徘徊乎故鄉。袞寵卽封。用昭章於疑墓。嘉誅以副。殊渥罔遺。可特贈昭文館大學士。資德大夫。追封漆水郡公。諡莊愼。

高麗國王封曾祖父母父母制

姚燧

昔我太祖皇帝之奮舉漠北也。東旌西旆。分甸南服。昭德示威。所向臣妾。惟時三韓。境壤相聯。天戈一臨。開府儀同三司。太子太師上柱國駙馬都尉瀋陽王。征東行尚書省右丞相高麗國王王璋之曾祖。故高麗王王暉。深察機運。舉國內嚮。事會之來。間不容髮。自非秉志端慤。明識遠慮。疇克如是哉。又屬遼民餘孽。僭竊島嶼。狂肆弄兵。陸梁假息。重煩命將致討。于時冰雪。沍寒。饋餉不通。而暉乃能供侍。轉輸師皆宿飽。軍興器仗。資助無闕。復濟師徒。往殄殘寇。其於肇造開基。立勳王室。保民興邦。莫之與比。故得守土享年。殆將四紀。澤及後昆。流慶斯永。傳子若孫。與國連戚。不其踴歟。是宜追崇上爵。仍易嘉名。魂而有知。歆茲異數。可贈敦信明義保節貞亮濟美翊順功臣。太師開府儀同三司。尚書右丞相。上柱國高麗國王。諡忠憲。

崇德報功。法舉追榮之典。分邦列爵。恩頒及內之章。酬我舊勳。同茲顯號。具官高麗國王王璋。曾祖母柳氏。傳芳合族。作配高門。屬皇祚之興隆。偕名藩而臣附。明賢所化。貞信無頗。傳子至孫。極富與貴。三韓保國。位同異姓之侯。王五等。疏封名亞。寡君之宗室。聿新殊渥。庸慰淑靈。可追封高麗王妃。

朕觀今天下有民社而王者。惟是三韓。及祖宗而臣之。殆將百載。厥父菑而子復肯播。曰我舅則吾謂之甥。既勳以親。宜貴與富。禮克先於事大。典可後於追崇。具官高麗國王王璋之考。純誠守正。推忠宣力。定遠保節功臣。太尉開府儀同三司。征東行中書省右丞相。上柱國駙馬高麗國王王暉。移孝爲忠。易威以惠。禮樂刑政之修者。典章文物皆粲然。惟大猷之是經。與小心之以翼。初由世子已帝女之降。釐旋俾嗣王。非公孫之復始。遂罷時貢其方物。願同歲賜於宗親。責秉鈞以東征。期奠枕於南面。追叛王挺身於遼。



水出選兵壓卵以泰山戰踵未旋逆首已授雖居位未周於三紀而享年實過乎七旬中壽共言今代希有矧其子式穀之是似則斯人沒世爲不忘自官階而進之至師垣而極矣夫旣封玄菟之墓表滄渤以爲襟何必刑白馬以盟誓黃河之如帶尙期貞魄庸服恤章可贈純誠守正推忠宣力定遠保節寅亮弘化奉慶功臣太師開府儀同三司尙書右丞相上柱國駙馬高麗國王諡忠烈

三韓爲國五季已王雖居東溟之濱實享南面之樂由其先有功於太祖許帝室以連姻故季女鍾愛於世皇卽公宮而命醮方穠青軒之桃李俄淒白露於兼葭眷懷懿親用隆恤典具官高麗國王王璋之妣皇姑安平公主高麗王妃發祥坤掖分派天潢以舜妃癸比之霄明爲古公亶父之姜女善於媿德車服不矜其夫家樂有娠賢茅土已纘其父服可謂全妻道之終始苟不因湯沐之安平原進大封曷彰尊屬於戲最他邦之道里距北闕以五千移近甸之河山盡東秦而十二明靈可作殊報是膺可追封皇姑齊國大長公主高麗王妃



# 元文類卷之十二

制

高麗國王封贈祖父母制

王構

洪惟我祖天錫勇智正萬邦。迺眷爾家世篤忠貞有成績。蓋本深而未茂。其德厚者流光。開府儀同三司。太子太師上柱國駙馬都尉瀋陽王征東行尚書省右丞相高麗國王王璋之祖。故高麗王王植祇訓。向方。飭躬迪吉。佩服儒雅。奮勵材猷。初父命之親承。以土宜而入貢。會桓肅西巡於川徼。而世皇南撫於江。壖亟期行李之通。寧恤歲華之易。途屯以永。內訌仍遷於家。艱號渙其申。還納旋膺於晝。接中統之風雲。載啓三韓之疆宇。重臨從容必中於事機。造次弗忘於禮憲。首遣明廷之質。有來冢嗣之良。釐降展親。示渥特殊於他姓。服勤尊主。輸誠益拱於中天。不諛是征。屢爲先導。奉朝斯謹。罔失常期。孫繼尙於皇姬。國允資於碩輔。有爲有守。昔戡濟之功多。言盛言恭。茲弼諧之望著。盍旌舊哲。庸賁嘉稱。太師維垣。爵以馭其貴。君子如祉。制以象其賢。庶幾往訓之遵。亦曰徽彝之舉。於戲匪報也。永爲好也。恩隨鸞檢。以疊疏。惟有之。是以似之。系與鴨江而並遠。可贈端誠奉化保慶亮節康濟佐理功臣。太師開府儀同三司。尚書右丞相上柱國高麗國王諡忠敬。

昭令德於前人。爵已隆於三世。受介福於王母。恩特侈於再傳。具官高麗國王王璋。祖母金氏淑慎。其儀。

柔嘉維則。東藩作儷。北闕聯嫺。不墜簪圭。功有武公之父子。親承盟饋。禮如王氏之舅姑。一則彰夙夜之勤。一則示閭門之肅。嗣爲貴冢。況有賢孫。諄襲請疏之來聞。赫奕徽彝之並舉。鳳綈鸞檢。翟蒲魚軒。於戲。重莫重於傳家。有懿含飴之訓。榮莫榮於錫號。往歆加襪之章。可追封高麗王妃。

趙與芮降封平原郡公制

王構

我國家法天立統。稽古象賢。武定方維。暨聲猷之益廣。恩加降附。宜寵數之兼隆。迺瞻耆英。其敷制冊。趙與芮身端而行治。識遠而量夷。曩在南邦。屬爲近戚。儼若典型之舊。歸然位望之尊。阻鄰好以弗修。知天心之厭楚。棄官榮而高蹈。偉王子之去殷。幾年退處於鄉閭。庶事靡聞於朝著。執吾信使。惟彼權姦。爰興問罪之師。用慰僊蘇之望。江左之連城不守。始奉表以請降。浙東之遺老雖存。亦挈族而來覲。然制有上下等威之別。而情無親疎遠近之殊。分土惟三。爵已崇於而主。降級以兩名。未正於爾躬。是用晉以文階。賁之華綬。天秩亞上公之貴。月卿躋太府之班。於戲。辨宗伯之九儀。王者所以示綏懷之禮。兼洪範之五福。人臣所以全安養之榮。茂對寵光。往堅素履。可授金紫光祿大夫。檢校大司農。平原郡公。

丞相阿里海牙贈諡制

王構

朕惟不世之主。膺不世之遇。非常之人。立非常之功。方一統之宏開。有六師之分董。鄂漢順流而下。勢甚建瓴。荆湖堅壁者多。事猶掣肘。儻弗資其雄略。其何奠於遐方。故光祿大夫湖廣行中書省左丞相阿里海牙。端慤而疏通。聰明而果銳。禁廷久侍。簡眷良深。朝政參知。弼諧有賴。遭明時。建長策。機決於十年之先。殄餘孽。芟羣凶。威行於萬里之外。下江陵以爲之根本。破長沙以潰其腹心。外梗咸除。率虎旅平吞於

桂海降旌隨豎。故龍驤直抵於錢塘。猗惟馘衰之加。煥若雲章之諭。錫賚榮多於貴近。勞還位亞於侯王。忠於國。惠於民。靡不用其至也。報爾功。崇爾德。孰能與於此哉。雖當年左揆之特升。顧今日彝章之未舉。佇遂圖形之制。彌深撫髀之思。爵首冠於臺司。封乃疏於舊國。曰武以旌其戰伐。曰定以著其和平。名則易之。期百千世。禮之同者。惟一二臣於戲。周宋爲鐔。石城爲鋒。朕仰繼皇王之大武。黃河如帶。泰山如礪。卿允爲宗社之元勳。尙冀英靈永言歆格。可特贈佐平南紀宣力功臣。開府儀同三司。太師上柱國。追封楚國公。諡武定。

丞相答刺罕贈諡制

王構

予欲宣力四方。所賴人才之叶助。天不憖遺一老。其何治化之成能。故中書右丞相哈刺孫答刺罕。嶽瀆英靈。乾坤間氣。執德弘而信道篤。視身正而格物深。判宗寺兼示恩威。奠藩封於磐石之固。坐廟堂不動聲色。措天下於泰山之安。位不以內外爲重輕。事不以險夷爲去就。廓神明之蘊。有室皆通。推惻隱之心。靡冤不釋。惟獎善疾邪之太甚。故積憂成恙。以相仍。言仁義如魏文貞。寧恤儉徒之巧沮。佩安危若韓忠獻。詎容神器之他攘。刃游於批大郤之餘。器別於遇盤根之際。離網未綴。一誠堅抗。羣囂泰運重開。百慮竟如素策。顧嗣基之伊始。其佐命者惟卿。載續武功。上膺邊瑣。駟介不煩於屢駕。袞衣佇俟於來歸。云胡馳訃之聞。遽爾輟朝之慟。雖卿之所守。匪生而存。匪死而亡。然政有或疑。奚究而問。奚取而決。詢之輿議。揆以舊章。眞王超異。姓之封顯。秩冠上公之貴。治典教典。並以褒崇。東平廣平。罔俾專美。嗚呼。國家之講制度。一二臣式克似之。天理之在人心。百千世不能易也。永言孚格。以啓方來。可贈推誠履正佐運功

臣太師開府儀同三司上柱國追封順德王諡忠獻。

平章史弼封鄂國公制

王構

嗣德罔不在初。粵彞章之具舉。舊人不克遠省。疇偉績之特書。榮祿大夫平章政事議樞密院事提調諸衛屯田事史弼器博而用周。志剛而行敏。早繇禁籟。出總戎行。英明兼本乎天資。方略悉合於古法。視長江如履平地。居然獲跳盪之功。撫疲黎猶保稚嬰。允矣著綏懷之效。始自淮襄之百戰。迄於嶺海之同風。顧宣力之獨多。其推誠則弗替。終始三朝之眷。賜環屢壓於宸班。優游六藝之文。緩帶雅稱於儒將。是宜資之華綬。衍以真封。以酬既往之勞。以示惟新之渥。於戲。功臣圖象。秩盍冠於褒公。元老壯猷。忠尙資於方叔。益圖報稱。祇服訓言。可特加銀青光祿大夫封鄂國公。

翰林承旨姚樞贈諡制

王構

昔有先正蚤事聖皇。惟夙夜單厥心。而終始典於學。如伯益之贊夏禹。暨尹躬之佐成湯。行乎仁義之途。任其社稷之重。計於廟堂之上。明夫事幾之先。蓋精神志意之相孚。故啓沃都兪之靡間。制難拘於一例。恩特侈於屢書。故翰林學士承旨中奉大夫詳定禮儀使贈榮祿大夫少師文獻公姚樞。以淵識弘謨。爲國耆蔡。以清彝素檢。爲時楷儀。曉萬事安異同。式羣工壹統略。周旋必禮。溫溫維德之恭。敷納以言。蹇蹇匪躬之故。止殺允符於宸慮。宣澤不應乎天功。以故終和且平。近者親遠者附。不賞而勸。大臣法小臣廉。國家之表裏可觀。風俗之樞機隨轉。績已成而弗有。身愈退而彌尊。顧當時耆壽其誰歟。致今日隆平者公也。正事正言正道。親傳文祖之燕謀。有德有功有能。首被先朝之鴻訓。肆朕纂承之始。於公簡旌之深。

槐序延登。衣仍袞黼。棠陰未徙。祚迺龜蒙。因諡以正其名。崇章以介其祉。於戲。得天下賢材。斯足矣。方圖政化之新。有朝廷大議。則就之。慨想儀刑之舊。往欽茲命。以永其傳。可加贈嘉猷程世舊學功臣太師開府儀同三司。追封魯國公。仍諡文獻。

翰林承旨姚燧父楨贈官制

王構

朕尊祖敬宗。升崇嚴諡。推恩錫類。孚告明廷。鴻文鉅冊之參修。緝典彝儀之詢考。叶成熙事。允賴耆儒。迹先德之繇來。盍惠術之同衍。翰林學士承旨榮祿大夫知制誥兼修國史姚燧。父楨。名門甲姓。偉望通才。初與長公聯芳於西洛。繼爲虜使。持節於南壩。以拯濟生靈爲心。以搜揚茂異爲任。芟艱危而靡恤。期德澤之丕揚。所全活者幾千人。若昔鄧公之河役。其往依者五百室。非惟李氏之義門。奚我生之弗辰。竟以死而勤事。風雨憂時之略。有鬱於中。菑畬名世之規。以貽於後。匯之深流。培之厚發。之弘嚴潔。雄深文獨高於衆作。光明正大。學載侈於宗傳。況密旨之親承。時洪謨之叶贊。成吾孝治。繫爾義方。旣因其親。以及人之親。故尊所教。俾掌邦之教。而先兄弟。弟繼文以忠。以章節惠之文。以示遺經之報。於戲。貞風千古。歸然不廢。魯靈光。太史一家。嗣者無慙。漢司馬。永言介止。式克歆茲。可贈銀青榮祿大夫。大司徒。追封魯國公。諡忠獻。

留守段貞贈諡制

王構

蕭司留務。漢高隆端本之規。夔作共工。虞舜迪有邦之訓。昔聖皇之在御。稽往古以建官。惟時亮功。朕其疏渥。通奉大夫大都武衛親軍都指揮使司達魯花赤提調大都屯田事大都留守兼少府監段國幹故

父銀青光祿大夫司徒武衛親軍都指揮使司達魯花赤大都屯田事提調大都留守司少府監事貞際享隆之運效乃所長襲通敏之休善於其職端莊恪慎周密疏通心休休焉如有容器渾渾兮靡可限卜澗漚食惟洛議首定於遷都象天漢揆之宮勳屢書於考室應叢機則曲當奮奇略以無前審勢度材六司之事異矣攻金刮玉一器而工聚焉歷華貫凡十七階翼皇基於億萬載慨生存之莫復宜褒諡之兼崇以衍封腴以疇勤濟於戲紫微丹闕非徒示壯麗之威鯁論直言無復見典刑之舊尙其英爽式克欽承可特贈效忠宣力功臣太傅開府儀同三司上柱國追封安國公諡武宣

播州楊邦憲贈諡制

王構

朕惟牂牁重鎮介巴渝之間世其守者曰楊氏自唐涉宋代不乏人嚮者邦憲審於去就挈版圖內附世祖皇帝實寵嘉之逮朕纂服嗣子漢英率先羣牧述職來庭以父歿未諡乞褒贈夫爵以馭其貴諡以成其美治古之道也況先朝屏翰之臣邈在一方而能綏輯其民不失常業餉兵增戍屢效忠勤如邦憲者不以易名可乎於戲據德論功惟彝章之具舉有子承考尙奕世之彌光可贈某官諡敏惠

平章廉希憲贈諡制

元明善

惟我世祖皇帝肇自藩服受鉞專征天寶良弼爲之左右一家四海傳次在予名爵之崇顧斯實靳故榮祿大夫中書平章政事贈清忠粹德功臣太傅開府儀同三司追封魏國公諡文正廉希憲清忠粹德文武元臣蚤以門閥之賢入膺寄託之重非詩書不陳於上前非仁義不行於天下憂國忘家愛民如己西靖秦蜀東極青齊北清遼碣南鎮荆湖在中書者曾幾何年而能立大法銷大患進大儒摧大姦恥身弗



及伊周。恥君未邁堯舜。言昔賢之所難。爲人臣之不敢。巍然三代之佐。蓋將師表百世者矣。天不愍遺。哲人先萎。雖諸子列官省臺。於朕心猶懷舊德。是用進以極官。加之上爵。於戲。表賢能所以尊朝廷也。假名器所以報忠貞也。稽若王章。得茲二美。凜乎生氣。天地猶存。服此殊榮。尙開爾後。可加贈推忠佐理翊運功臣。太師。開府儀同三司。上柱國。恆陽王。仍諡文正。

參政商挺贈諡制

元明善

若稽世祖。聖神廣運。徵聘英賢。疆理天下。時則有若正奉大夫。中書參知政事商挺。以王佐之才。濟經世之學。越自侯服。召列潛藩。迨臨寶祚。蔚爲謀臣。四鎮秦蜀。而銷急變。靖大亂。武文迭效。再入中書樞密。而弘帝業。固邦本。啓沃采深。凡中統名臣。率備飾終之典。矧爾斷國十有七謨。遺勅在耳。朕曷敢私。是用製勳號。定美諡。躋之極官。胙之吉壤。於戲。道積於躬。君子之美利也。賞延於世。帝王之大寶也。服茲丕顯。休命爾後。人與有榮耀焉。可贈推誠協謀佐運功臣。太師。開府儀同三司。上柱國。追封魯國公。諡文定。

樞密趙良弼贈諡制

元明善

昔聖祖歸自武昌。啓皇元始於中統。天人胥贊。宗戚叶從。無何僭逆之餘。輒作陸梁之態。誰其將指。先二使以遣征事。則從權果羣凶之畢殄。興言及此。軫念久之。資善大夫。陝西等處行中書省參知政事趙訓父。僉書樞密院事良弼。才周庶務。而洞察其幾。學貫三才。而不滯於用。旣輸誠於佐陝。亦盡瘁於行東。撤蓬戍之藩籬。淨纖氛於雲棧。易卉裳而冠帶。渺一介於滄溟。凡危衝和煦之突來。必大義純誠而自處。故平生之偉績。恆簡在於宸衷。宥密八年。險夷一致。謙謙素履。具見於典刑。婉婉良籌。每資於匡翼。賜第之

留未久。引年之請彌堅。雖房喬不忘秦府之游。而李泌雅志嵩陽之隱。在今日孰堪倚重。顧舊臣寧復如卿。特示崇褒。盍由異渥。於戲。迪世以章平之訓。有蔚其華。疏封於趙魏之才。所憑者厚。朕將示勸。卿其欽承。可特贈推忠翊運功臣。太保。儀同三司。追封韓國公。諡文正。

平章董士選贈三代制

元明善

大裘無文。可用致饗。良玉韞璞。孰窺至珍。緬懷遺逸之民。邁種渾圓之德。克昌厥後。不在其身。榮祿大夫。陝西等處行中書省平章政事董士選。曾祖父昕。猷畝怡愉。里閭退讓。開田種秫。深期蔽日之輪。困如山出雲。莫測爲霖之變化。子能擇主。孫亦象賢。一門萬石之家聲。四世五公之譜牒。於戲。慎終追遠。分茅宣會。矩之光。崇德報功。推本叶孫枝之願。賈茲異渥。寵爾營魂。可贈光祿大夫。大司徒。追封趙國公。諡宣懿。駿命握乾。誕啓中天之運。豹韜宣武。叶成上國之光。想風雲之會。匪常。慨日月之流。如駛。爰加顯號。以慰故臣。具官董士選。祖父贈翊運効節功臣太傅。開府儀同三司。上柱國。追封壽國公。諡忠烈。俊被褐潛珍。棄書學劍。戎馬折衝之未愆。志已出塵。雲龍胥會之有開。身先就日。獨立中山於艱晚之際。兩復真定於攸攘之間。釋兵爲農。所活者衆。延師教子。其訓益深。馬革裹尸。實可憫生前之語。虎頭食肉。終有期沒後之榮。德之厚者。嗣必昌。功之著者。禮必報。肆朕嗣服。念爾疇庸。斯廣重封。式彰異數。於戲。修祖廟。陳宗器。在予君臣之交孚。光王室。迪天休。惟爾子孫之無斃。精爽不昧。寵渥其承。可加贈推忠効節翊運功臣。依前開府儀同三司。上柱國。改封趙國公。仍諡忠烈。

君臣相資。莫喻同心之美。忠孝兩立。斯爲佐命之殊。謂竹帛曷能以旣其勳。維坐席猶足以優其禮。惟祖

有訓。非朕敢私。具官董士選。父資德大夫。中書左丞。僉書樞密院事。贈金紫光祿大夫。平章政事。諡忠獻。文炳正大。剛方明允。篤實起家。試邑棄官。羞墨綬之卑。杖策從軍。絕食望翠華之遠。刑輕典以安反側。釋降人以靖流離。白日揮戈。埤堦益張其羽翼。長風破浪。蒙衝直擣其腹心。政在養民。市不易肆。辟國可方於姬奭。活人何減於曹彬。嶺嶠宣威。南人不復反矣。塞庭請討。周公方且膺之。恂恂持儒者之風。諤諤挺大臣之節。靖念不圖之建。采深喬木之思。格於皇天。雖儼若帝庭之陟降。渙其大號。必有加玄宅之褒崇。錫以嘉名。胙之列國。掌武襲建牙之舊。開司增立載之榮。九原如生。終古永譽。於戲。英才間出。足爲邦家之立基。盛德無瑕。宜爾子孫之逢吉。載頌明制。尙慰靈魂。可加贈宣忠開濟佐運功臣。太尉。開府儀同三司。上柱國。追封趙國公。仍諡忠獻。

中丞于璋贈諡制

元明善

善人天地之紀。德莫有加。君子邦家之基。歿猶不朽。瞻懷遺直。追錫殊封。故資德大夫。江南諸道行御史臺中丞于璋。志蘊忠貞。運逢熙洽。慶雲甘露。氣和而動植。自宜威鳳祥麟。瑞應而猛鷲咸伏。結深知於世祖。參大政於武皇。澄清每振於憲綱。動靜允維於國體。逮朕嗣服。召卿來廷。賜以繡衣。執法應仲端之象。專茲白簡。行軺寬南顧之憂。遽何馳訃之聞。盍有崇褻之渥。於戲。劉寬長厚。允宜居鼎鼐之司。胡廣中庸。謂當久臺閣之任。事乖往古。恩慰九原。咨爾營魂。服我休命。可贈推誠肅政功臣。光祿大夫。平章政事。上柱國。追封薊國公。諡文簡。

中丞崔彧贈諡制

張士觀

獻可替否。治獲佐於明時。崇德報功。禮宜加於卹典。故榮祿大夫。平章政事。御史中丞。領侍儀司事。崔咳。山川間氣。簪紱名家。俾司綿蕝之儀。繼被瀛洲之選。靡繇一介之助。自結九重之知。遂擢置於秋卿。俄紀綱於柏寺。奏請宮嬪之議。罷征日本之師。章疏可方之古人。摺紳無出其右者。擅生殺之柄。忍容義甫之姦。抑聚斂之臣。力止延齡之相。兩過文昌之府。嘗僉宥密之司。於琴瑟更張之初。贊七鬯主器之決。屬元貞方大有爲之日。適先帝重中執法之官。視左右何以易趙堯。在朝廷不可無汲黯。薦耆儒而備顧問。崇名教以渙絲綸。活人命於頃刻之間。回天威於雷霆之下。以去留繫憲臺之輕重。辨邪正公天下之是非。凡可以尊主而庇民。曾不避犯顏而直諫。慨話言之尙在。想風采之如存。永孚于休。以昌厥後。可贈推誠履正功臣。太保。開府儀同三司。追封鄭國公。諡忠肅。

平章李庭贈諡制

張士觀

混一之期。有開於眞主。恢攘之寄。允賴於忠臣。其器博則用迺周。其才全則效斯著。顧奏捷獨多於羣帥。而疇庸豈限於彝章。故榮祿大夫。平章政事。議樞密院事。提調諸衛屯田事。兼後衛親軍都指揮使。李庭。宣力襄樊。振威嶺海。甫師干之歷試。俄斧鉞之升崇。劍敵萬人。縱橫制變。衝當一面。出入如神。納之牛腹。而獲生。載賈登陴之勇。蔽以馬羈。而捷驚。疇爭執訊之能。其韜鈴動合於昔賢。故聲烈特聞於今日。至於扈聖祖東除僭孽。所向無前。翼先朝西奠遐陬。其猶克壯。決策於未然。而策無遺者。審幾之先見。而幾則灼然。緬懷熊豹之姿。忍聽鼓鼙之奏。生也加封之弗逮。名焉節惠以爲宜。於戲。黼冕桓圭。昭其文。昭其度。玉符麟節。傳之子。傳之孫。精爽如存。寵光無斁。可特贈推忠翊衛功臣。儀同三司。太保。上柱國。追封益國。

公諡武毅。

丞相卜憐吉台封河南王制

程鉅夫

撫帝業之艱難。爰思將帥。啓功臣之盟誓。宜及子孫。咨爾在廷。聽予作誥。開府儀同三司。河南江北等處。行中書省。左丞相卜憐吉台。智明識遠。心廣氣和。勳名克篤於前人。藩翰久勤於外服。昔將平於內難。朕大投艱。方深計於中途。卿獨決進。志存弼亮。身佩安危。所謂社稷之臣。蓋享尊榮之報。乃復煩於機務。非示寵於忠良。是用命汝。襲諸侯王。以長守於富貴。歸丞相印。以自養於壽齡。既不遠於京師。可以時而朝覲。允資重望。坐鎮一方。於戲。表河之南。念茲乃祖。乃父爲國之屏。敬哉有土有民。永建厥家。毋棄朕命。

高麗國王詎加恩制

張士觀

咨爾高麗國王王詎。秉心直諒。賦質貞純。早克嗣於先猷。久服勞於王室。身惟國壻。寅居賓日之方。男卽皇甥。復預乘龍之選。築館荷兩朝之眷。分茅襲百祀之傳。肆陞右揆之階。光應上台之象。茲荐頒於寵數。其益勵於忠勤。動惟一德之懷。居必正人是與。祖宗世稱漢藩。輔保樂土於三韓。父子並爲周司徒。播清風於萬古。可特加純誠守正推忠宣力定遠保節功臣。開府儀同三司。太尉。征東行中書省右丞相。上柱國。高麗國王。尙服渥命。以介福祺。

安南國王陳益稷加恩制

程鉅夫

委質歸朝。旣去逆而效順。以爵馭貴。宜崇德而報功。誕播明綸。用孚衆聽。銀青榮祿大夫。安南國王。遙授湖廣等處行中書省平章政事。陳益稷。知畏天者事大。期保境以全民。慕帝王之有真。見幾而作。懼祖宗

之不祀。自拔而來。以忠孝之誠。而受知世皇。蒙天地之德。而賜封故國。始者周王之赫怒。伐罪弔民。終焉舜帝之誕敷。班師振旅。彼迷不復。爾守彌堅。拯溺救焚。從王師。凡一再舉。適館受粢。留湖右。幾三十年。身歷事於四朝。志不渝於初節。肆朕卽阼。亟其來庭。是用加新秩。以示恩。仍舊封而授職。於戲。內寧外撫。朕不忘銅柱之南。近悅遠來。爾益拱辰星之北。對揚休命。永肩一心。可加金紫光祿大夫。安南國王。依前遙授湖廣等處行中書省平章政事。

平章張珪封蔡國公制

吳澂

天地之間有正人。國家恃以爲元氣。卿之忠藎。朕所眷知。比因疾以祈閑。爰加恩而優老。榮祿大夫。中書平章政事。張珪。彝常世閥。廊廟宗工。早總戎旂。已作禮樂詩書之帥。晚司化軸。遂稱文學政事之臣。左右六朝。出入三府。險夷不易其守。鯁亮以如其初。太清罹薄食之昏。前期致沐浴之請。越予新服。嘉乃舊勳。謬謬之節。詎肯詭隨。侃侃而言。類多裨益。黯雖謁告。爽尙勉留。俾辭鞅掌之勞。專馨格心之學。緬惟先正。嘗平金壘。以立功。宜得後昆。復就蔡封。而襲爵。所謂故國。庸建上公。思竭爾忱。廣敷陳於經幄。欽承時命。永翊贊於皇猷。可封蔡國公。提調經筵事。

許衡妻敬氏封魏國夫人制

鄧文原

魯國有真儒。實弘宣於道統。周南得淑女。必肇正於人倫。肆予社稷之臣。夙有閨門之化。爰旌令則。特示崇褒。具官許衡妻敬氏。性靜以貞。行恭而順。自職居主饋。孝克奉於旨甘。逮貴被展衣。儉猶親於澣濯。惟我宗工。盡贊襄之道。由爾內助。秉柔正之儀。雖善慶之報方來。而哀榮之典未稱。庸視茅封而進秩。式頒

芝檢以疏恩於戲。夫婦相敬如賓。亦既追榮於偕老。公侯必復其始。尙其啓迪於後人。

丞相拜住贈諡制

袁 橫

八柱承天。棟橈萌於巨構。六龍御日。輻說見於中街。愍死難以成仁。攷生榮而錫命。故中書右丞相拜住。鼎彝王社。閎閱相門。自結主知。應雲龍之異遇。獨持國是。炳著蔡之先幾。陳於上者不足言。見於事者爲可則斥。聚斂之臣以靖四表。誅黷貨之徒以正庶官。庫無餘財。拔葵之訓靡替。門絕私謁。懸衡之鑿益公。天下望其治平。朝廷以之模楷。然盡言招過。檢謀愈深。選賢與能。奸黨滋懼。變成肘腋。禍起股肱。山嶽動搖。日月昏翳。雖元兇正罰。足明朕心。在貞惠易名。姑慰卿意。分茅故壤。增爵維垣。噫。未明入朝。竟墮承宗之計。盛服假寐。孰爲鉏麀之賢。念此靈傷。恩斯優渥。可贈清忠一德佐運功臣。太師。開府儀同三司。上柱國。追封東平王。諡忠獻。

平章不忽木贈諡制

盧 亘

朕凝命穆清。式觀天造。將啓靖邦之嘉運。必生名世之大賢。挺出類拔萃之資。行尊主庇民之學。使之君臣同德。夙夜盡心。協贊璣衡。融景化於瞬息之頃。深謀廊廟。致太平於期月之間。禮樂以之而興隆。陰陽由之而順序。昔聞其語。今見其人。故昭文館大學士。榮祿大夫。平章軍國重事。行御史中丞。不忽木。明允篤誠。溫文廉讓。研精聖道。得先儒淵祕之傳。藻勵忠規。承世皇簡注之渥。荐膺器使。徧歷清華。殫物洽聞。而守以正。經德迪慮。而不近名。屬熙朝更化之初。開明堂垂拱而治。升居台鉉。俾罄訏謨。一澄苛弊之源。大洗姦諛之迹。事至立斷。言爲天下之公。知無不爲。才實王者之佐。攬羣材而並進。理萬變而不疑。弘沃

聖衷誕孚辰告。翊先帝履尊之際。輟元臣分陝之行。再入秉鈞。遽聞辭疾。彌綸軍國。閱勞機務之煩。提挈憲綱。坐見朝廷之肅。條號隆福之僊馭。旋驚梁壞而山摧。寧不百年遂亡一鑑。備觀規摹之盛。可謂社稷之臣。肆予撫軍言還。懷茲懿德。當宁而歎。恨不同時。圖高密於雲臺。丹青罔旣。詠裴度於丘禱。柱石徒衰。是用寵以帝傅之崇。賜以周公之履。庸起具臣之勸。允爲儒者之光。繫爾英靈。歆茲明命。可特贈純誠佐理功臣。開府儀同三司。太傅。上柱國。追封魯國公。諡文貞。

思州田晃忽而不花封二代制

馬祖常

國家外建藩屏。以靖遠人。責其宣布懷柔之惠。能使恩威並流。而一方清謐者。稽於國典。可不賞勞乎。具官某父某官某。尚膺朝寵。勤庸服官。戮力小心。不聞有過。乃教忠於嗣息。得襲慶於世家。茲朕所不忘者。也。故命追襲異數。階秩一品。有靈在幽。尙迪爾後。

比屬有司。考禮於卹典矣。而婦人之貴。嘗視其夫子焉。況有鵲巢汝墳之懿。能行於其閨門。衽席之間者乎。具官某母某氏。女儀柔婉。來嬪辨族。相其宗事。珩璜有節。又能篤生令子。服予疆場撫綏之勞。湯沐衍封。胙以列國。其尙歆承休寵。利爾後昆。以延饋祀之無已哉。

朕以孝治天下。凡人臣之親。悉命因其班列之次。功庸之等。以爲寵數之異焉。具官祖父某官某。昔備官使。輯綏邊氓。頗著惠懷。有譽南服。夫天之施仁。於物無間。朕敢不法天已哉。宥密之司。階品爲貴。啓爾後人。保茲終吉。

先王制禮。婦人之義。飲食衣服祭祀而已。非有與於外事也。然或婦道母德。可以表率宗族。而成其夫子。



者。願宜有以顯賁之也。具官祖母某氏。早躬組紉。克遵女戒。作配令族。柔閑有儀。惟時聞孫。扞我邊圉。膺被爵祿。光寵於時。而爾可不疏封鄉國。以廣彤管之訓乎。贊書在門。其告泉壤。

太史令王恂贈諡制

王士熙

洪惟世祖。致治三代之隆。總攬羣英。得人一時之盛。碩儒既往。卹制宜加。故嘉議大夫。太史令王恂。雅德端方。醇資淵懿。學邃天人之祕。運親神聖之逢。嘉謀嘉猷。有則入告於后。先知先覺。又將下被於民。參儲闡調護之勤。聞政府機密之奏。望重漢廷之園綺。職專堯典之義和。改曆授時。日月星辰之順軌。崇術造士。詩書禮樂以移風。太平立邦家之基。正節折姦邪之氣。朕承景命。爾不同朝。比觀嗣子之陳。采切思賢之感。章披雲漢。識裕皇舊學之初。誓指山河。啓昭代新封於後。華躋公袞。諡易佳名。於戲。元氣所憑。不存亡於生死。九原可作。尙哀榮於始終。罔味其承。以昌厥續。可贈推誠守正功臣。光祿大夫。大司徒。上柱國。追封定國公。諡文肅。

御史觀音寶贈諡制

李端

見危授命。乃臣子之至忠。崇德報功。實國家之令典。表茲奇節。沛以新恩。故監察御史觀音寶。以才大夫。爲真御史。蚤給事於宿衛。每供職於諫言。殫輸向日之誠。益厲飛霜之烈。實封奏疏。欲竭力以回天。密邇姦人。竟交讒而蠹國。互激雷霆之怒。誤罹斧鉞之誅。廩雖死以猶生。諒無善之不報。於戲。紫垣垂象。正執法於星辰。青簡流芳。永爭光於日月。尙期貞魄。服我寵章。可贈資德大夫。御史中丞。上護軍。追封漁陽郡公。諡貞愍。

丞相伯顏祖考封諡制

宋本

元宰立功懋贊千年之運。大廷敷號。紹開奕世之封。滂流窮源。積善必慶。故中書右丞相伯顏祖考。故千夫長阿刺。沉毅而彊力。忠勤而小心。從役忽禪。奮蛇矛而深入。扈征蜀道。裹馬革以長終。賢勞宿著於生平。陰隲益隆於身後。天開神聖。闢中土而大同。地隔江淮。獨東南之未下。迺生孫子。一我寰區。肆加命數之隆。用極褒崇之典。位既登於師傅。秩並進於階勳。胙土分茅。易名節惠。於以舉公朝之憲度。於以嚴私室之烝嘗。於戲。王父抱孫。事業誕敷於闕閱。天子建德。恩光永賁於幽潛。尙其有靈。服之無斃。可贈推誠佐理翊運功臣。太傅。開府儀同三司。上柱國。追封淮安王。諡武康。

御史大夫相嘉碩利封諡制

謝端

列爵之等。以馭貴。孰加於諸侯。王元勳之胄。而象賁。宜膺於三錫。命云胡殄瘁之蚤。重予靈傷之懷。故榮祿大夫。江南諸道行御史臺。御史大夫相嘉碩利。鍾純美之資。負經濟之略。粵若迺祖。相我世皇。始成混一之功。未受顧託之命。襲其善慶。惟時聞孫。不階父師之訓。而忠孝夙成。篤於君臣之誼。而夷險一致。居給舍。則伏蒲而抗論。司宥密。則彊本以折衝。河汴交流。分廟堂之重寄。東南都會。長端憲之崇班。皆能綏輯士民。肅清綱紀。甘棠之愛。遺澤猶新。喬木之家。清風未愆。夫既世濟厥美。而不天假之年。緊淮陽之故圻。爾先世之胙土。迺啓封而陞秩。仍節行而易名。具之贊書。賁於幽壤。於戲。霖雨舟楫之用。雖不究於當時。河山帶礪之盟。尙益昌於爾後。英爽來遠。服茲寵靈。可。

# 元文類卷之十三

## 奏議

時務五事 至元三年

許衡

臣衡誠惶誠恐謹奏。呈時務五事。伏念臣性識愚陋。學術荒疎。不期虛名。偶塵聖聽。陛下好賢樂善。舍短取長。雖以臣之不才。亦叨寵遇。自甲寅至今。十有三年。凡八被詔旨。中懷自念。何以報塞。又日者。面奉德音。叮嚀懇至。中書大務。容臣盡言。臣雖昏愚。荷陛下知待。如此其厚。敢不罄竭所有。思益萬分。但迂拙之學。本非求仕。言論鄙直。不能回互。矯趨時好。孟子以責難於君。陳善閉邪。迺爲恭敬。孔子謂以道事君。不可則止。臣之所守者。其大意蓋如此也。伏望陛下寬其不佞。察其至懷。則區區之愚。亦或有少補云。

## 立國規摹一

爲天下國家。有大規摹。規摹既定。循其序而行之。使無過焉。無不及焉。則治功可期。否則心疑目眩。變易紛更。日計有餘。而歲計不足。未見其可也。昔子產處衰周之列國。孔明用西蜀之一隅。且有定論。而終身由之。況堂堂天下。可無一定之論。而妄爲之哉。古今立國規摹。雖各不同。然其大要在得天下心。得天下心。無他。愛與公而已矣。愛則民心順。公則民心服。既順且服。於爲治也何有。然開創之始。重臣挾功而難制。有以害吾公。小民雜屬而未一。有以梗吾愛。於此爲計。其亦難矣。自非英睿之君。賢良之佐。未易處也。

勢雖難制。必求其所以制。衆雖未一。必求其所以一。前慮卻顧。因時順理。予之奪之。進之退之。內主甚堅。外行甚易。日夏月摩。周旋曲折。必使吾之愛。吾之公。達於天下而後已。至是則紀綱法度。施行有地。天下雖大。可不勞而理也。然其先後之序。緩急之宜。蚤有定則。可以意會。而不可以言傳也。是之謂規摹。國朝土宇曠遠。諸民相雜。俗既不同。論難遽定。考之前代。北方奄有中夏。必行漢法。可以長久。故後魏遼金歷年最多。其他不能實用漢法。皆亂亡相繼。史冊具載。昭昭可見也。

後魏拓拔氏改姓元。都雲中。遷洛十六帝。一百七十七年。

遼耶律改劉氏。都臨潢。徙無常處。九帝。二百一十八年。

金完顏氏。都上京。遷燕。九帝。一百一十八年。

前趙劉元海。據平陽。三主。二十五年。

後趙石勒。都襄國。六主。三十二年。

前燕慕容皝。都薊。遷鄴。三主。三十四年。

前秦苻堅。都長安。五主。四十四年。

後秦姚萇。都長安。三主。三十四年。

南燕慕容德。據廣固。二主。十二年。

南涼秃髮烏姑。據廣固。三主。十八年。

西秦乞伏國仁。據金城。四主。四十七年。

後燕慕容垂據中山。鄴。四主。二十五年。

夏赫連勃勃據朔方。三主。二十五年。

國家仍處遠漠。無事論此。必如今日形勢。非用漢法不宜也。陸行資車。水行資舟。反之則必不能行。幽燕以北。服食宜涼。蜀漢以南。服食宜熱。反之則必有變異。以是論之。國家當行漢法無疑也。然萬世國俗。累朝勳貴。一旦驅之下。從臣僕之謀。改就亡國之俗。其勢有甚難者。苟非聰悟特達。曉知中原。實歷代帝王爲治之地。則必咨嗟怨憤。誼譁其不可也。竊嘗思之。寒之與暑。固爲不同。然寒之變暑也。始於微溫。溫而熱。熱而暑。積百有八十二日。而寒氣始盡。暑之變寒。其勢亦然。山水之根。力可破石。是亦積之之驗也。苟能漸之靡之。待以歲月。心堅而確。事易而常。未有不可變者。然事有大小。時有久近。期小事於遠。則遷延虛曠而無功。期大事於近。則急迫倉惶而不達。此創業垂統也。以北方之俗。改用中國之法也。非三十年不可成功。在昔金國初亡。便當議此。此而不務。孰爲可務。顧乃宴安逸豫。垂三十年。養成尾大之勢。祖宗失其機於前。陛下繼其難於後。外事征伐。內撫瘡痍。雖曰守成。實如創業。規摹之定。又難於嚮時矣。然尾大之勢。計聖謀神算。已有處之之道。非臣區區所能及也。此外唯當齊一吾民之富實。興學練兵。隨時損益。稍爲定制。如臣輩者。皆能論此。在陛下篤信而堅守之。不雜小人。不營小利。不責近效。不恤浮言。則天下之心。庶幾可得。而致治之功。庶幾可成也。

### 中書大要二

中書管天下之務。固不勝其煩也。然其大要在用人立法。二者而已。近而譬之。髮之在頭。不以手理。而以

櫛理。又譬之食之在器。不以手取。而以匕取。手雖不能自爲。而能用夫櫛與匕焉。是卽手之爲也。上之用人。何以異此。不先有司。直欲躬役庶務。將見日勤日苦。而日愈不暇矣。古人謂得士者昌。自用則小。意正如此。夫賢者識治之體。知事之要。與庸人相懸。蓋十百而千萬也。布之周行。百職具舉。宰職總其要。而臨之不煩不勞。此所謂省也。然人之賢否。未能灼知其詳。固不敢用。或已知其孰爲君子。孰爲小人。復畏首畏尾。患得患失。坐視其弊。而不敢進退之。徒曰知人。而實不能用人。亦何益哉。人莫不飲食也。獨膳夫爲能致氣味之美。莫不睹日月也。獨術者爲能步虧食之數。得法與不得法。固難一律論。有馬不能習。必借人乘之。有玉不能治。必求玉人雕琢之。小物尙爾。況堂堂天下神器。可使不得法者爲耶。古人謂爲山必因丘陵。爲下必因川澤。意正如此。夫治人者法也。守法者人也。人法相維。上安下順。而宰職優游廊廟之上。不煩不勞。此所謂省也。里巷之談。動以古爲詬戲。不知今日口之所食。身之所衣。皆古人遺法。而不可違者。豈天下之大。國家之重。而古成法反可違邪。其亦弗思甚矣。用人立法。今雖未能遽如古昔。然已仕者。便當頒降俸給。使可養廉。未仕者。且當寬立條格。俾就敍用。則失職之怨。少可舒矣。外設監司。糾察汚濫。內專吏部。考定資歷。則非分之求。漸可息矣。再任三任。抑高舉下。則人才爵位。略可平矣。舍此則堆積壅塞。參差謬戾。苟延歲月。莫知所期。俸給之數。敍用之格。監司之條例。先當擬定。至於貴家世襲。品官任子。驅良鈔數之便宜。續當議之。亦不可緩也。此其大凡。要須深探古人所以用人立法之意。推而衍之。則何難見之有。若夫得行與不得行。在上之委任者何如。而能行與不能行。又在執政者得人不得爾。此非臣之所能及也。

爲君難三

踐言 防欺 任賢 去邪  
得民心 順天道

生民有欲。無主乃亂。上天眷命。作之君師。必與之聰明剛斷之資。重厚包容之量。使首出庶物。而表正萬邦。此蓋天以至難任之。非予之可安之地。而娛之也。堯舜以來。聖帝明王。莫不兢兢業業。小心畏慎。日中不暇。未明求衣。誠知天之所畀。至難之任。初不可以易心處。知其爲難。而以難處。則難或可易。不知爲難。而以易處。則他日之難。有不可爲者矣。孔子謂人之言曰。爲君難。爲臣不易。則其說所由來遠矣。爲臣不易。臣已告之安童。至爲君之難。尤陛下所當專意者。臣請舉其切而要者。款陳於後。

踐言

人君不患出言之難。而患踐言之難。知踐言之難。則其出言不容不慎矣。昔劉安世見司馬溫公。問盡心行己之要。可以終身行之者。公曰。其誠乎。劉公問行之何先。公曰。自不妄語始。劉公初甚易之。及退而自躡括日之所行。與凡所言。自相掣肘矛盾者多矣。力行七年而後成。自此言行一致。表裏相應。遇事坦然而常有餘裕。臣按劉安世一士人也。所交者一家之親也。一鄉之衆也。同列之臣。不過數十百人而止耳。然以言行相較。猶有自相掣肘矛盾者。況天下之大。兆民之衆。事有萬變。日有萬機。而人君以一身一心。酬酢之。欲言無失。豈易能哉。故有昔之所言。而今日不記者。今之所命。而後日自違者。可否異同。紛更變易。紀綱不得布。而法度不得立。臣下雖欲黽勉。而竟無所持循。徒汨沒於瑣碎之中。卒於無補。況因之爲弊者。又日新月盛。而不可遏。在下之人。疑惑驚眩。且議其無法無信。一至於此也。此無他。至難之地。不以難處。而以易處之故也。苟從古者大學之道。以修身爲本。凡一事之來。一言之發。必求其所以然。與其所當

然不牽於愛。不蔽於憎。不因於喜。不激於怒。虛心端意。熟思而審處之。雖有不中者。蓋鮮矣。奈何爲人上者。多樂舒肆。爲人臣者。多事容悅。容悅本爲私也。私心盛則不畏人矣。舒肆本爲欲也。欲心熾則不畏天矣。以不畏天之心。與不畏人之心。感合無間。則其所務。若皆快心事耳。快心則口欲言而言。身欲動而動。又豈肯兢兢業業。以修身爲本。一言一事。熟思而審處之乎。此人君踐言之難。所以又難於天下之人也。

防欺

人之情僞。有易有險。險者難知。易者易知。易知者。雖談笑之頃。几席之間。可得其底蘊。難知者。雖同居共事。閱月窮年。猶莫測其意之所向。雖然。此特繫夫人之險易者然也。又有衆寡之辨焉。寡則易知。衆則難知。難知非不智也。用智分也。易知非多智也。合小智而成大智也。故在上之人。難於知下。而在下之人。易於知上。其勢然也。處難知之地。御難知之人。欲其不見欺也。蓋難矣。昔包孝肅剛嚴峭直。號爲明察。有編民犯法。當杖脊。吏受財。與之約曰。今見尹。必付我責狀。汝第呼號自辯。我與汝分此罪。汝決杖。我亦決杖。旣而包引囚問畢。果付吏責狀。囚如吏言。分辯不已。吏人厲聲訶之曰。但受脊杖出去。何用多言。包謂其特權。粹吏於庭。杖之十七。特寬囚罪。止從杖坐。以沮吏勢。不知乃爲所賣。卒如素約。臣謂此一京尹耳。其見欺於人。不過誤一事。害一人而已。人君處億兆之上。所操者。予奪進退賞罰生殺之權。不幸見欺。以非爲是。以是爲非。其害可勝旣耶。人君唯無喜怒也。有喜怒。則贊其喜。以市恩。鼓其怒。以張勢。人君惟無愛憎也。有愛憎。則假其愛。以濟私。藉其憎。以復怨。甚至本無喜也。誑之使喜。本無怒也。激之使怒。本不足愛也。強譽之使愛。本無可憎也。強短之使憎。若是則進者未必爲君子。退者未必爲小人。予者或無功。而奪



者或有功也。以至賞之。罰之。生之。殺之。鮮有得其正者。人君不悟。日在欺中。方仗若曹。撻發細隱。以防天下之欺。欺而至此。欺尙可防耶。大抵人君以知人爲貴。以用人爲急。用得其人。則無事於防矣。旣不出此。則所近者。爭進之人耳。好利之人耳。無恥之人耳。彼挾詐用術。千蹊萬逕。以蠱君心。於此欲防其欺。雖堯舜不能也。

### 任賢

賢者以公爲心。以愛爲心。不爲利回。不爲勢屈。眞之周行。則庶事得其正。天下被其澤。賢者之於人國。其重固如此也。然或遭時不偶。務自韜晦。有舉一世而人不知者。雖或知之。而當路之人。未有同類。不見汲引。獨人君有不知者。人君雖或知之。召之。命之。況如廝養。而賢者有不屑就者。雖或接之以貌。待之以禮。而其所言不見信用。有超然引去者。雖或信用。復使小人參於其間。責小利。期近效。有用賢之名。無用賢之實。賢者亦豈肯尸位素餐。徒費廩祿。取譏誚於天下也。雖然。此特論難進者言也。又有難合者焉。人君位處崇高。日受容悅。大抵樂聞人之過。而不樂聞己之過。務快己之心。而不務快民之心。賢者必欲匡而正之。扶而安之。使如堯舜之正。堯舜之安。而後已。故其勢難合。況姦邪佞倖。醜正惡直。肆爲詆毀。多方以陷之。將見罪戾之不免。又可望庶事得其正。天下被其澤耶。自古及今。端人雅士。所以重於進。而輕於退者。蓋以此爾。大禹聖人。聞善卽拜。益戒之曰。任賢勿貳。去邪勿疑。貳之一言。在大禹猶當警省。後世人主。宜如何哉。此任賢之難也。

### 去邪

姦邪之人。其爲心險。其用術巧。惟險也。故千態萬狀。而人莫能知。如以甘言卑辭誘人於過失。然後發之之類。惟巧也。故千蹊萬逕。

而人莫能禦。如勢在近習。則誘近習。勢在宮闈。則諂宮闈之類。

人君不察。以諂爲恭。以訐爲公。以欺爲可信。以佞爲可近。喜怒愛惡。人

主固不能無。然有可者。有不可者。而姦邪之人。一於迎合。竊其勢。以立己之威。濟其欲。以結主之愛。愛隆於上。威擅於下。大臣不敢議。近親不敢言。毒被天下。而上莫之知。此前人所謂城狐也。所謂社鼠也。至是而求去之。不已難乎。雖然。此由人主不悟。誤至於此。猶有說焉。如宇文士及之佞。太宗灼見其情。而竟不能斥。李林甫妬賢嫉能。明皇洞見其姦。而卒不能退。邪之惑人。有如此者。可不畏哉。

得民心

上以誠愛下。下以忠報上。有感必應。理固宜然。然考之往昔。有不可以常情論者。禹抑洪水以救天下。其功大矣。啓賢能。敬承繼禹之道。其澤深矣。然一傳而太康才畋於洛。萬姓遽仇而去之。吁。可怪也。漢高帝起布衣。天下之士雲合景從。其困滎陽也。紀信至捐生以赴急。人心之歸可見矣。及天下已定。而相聚沙中有謀反者。此又何邪。竊嘗思之。民之戴君。本於天命。初無不順之心也。特由使之失望。使之不平。然後怨望生焉。禹啓愛下。既如赤子矣。民之奉上。亦如父母矣。今太康尸位。以逸豫滅厥德。非所以爲父母也。是以失望。秦楚殘暴。故天下叛之。漢政寬仁。故天下歸之。今高帝用愛。愴行誅賞。非所以爲寬仁也。是以不平。推是二者。參較古今。凡有恩澤於民。而民怨且怒者。莫不類乎此也。大抵人君卽位之始。多發美言。詔告天下。天下悅之。冀其有實。既而實不能副。遂怨心生焉。一類同等。無大相遠。人君特以己之私好。獨

厚一人則其不厚者已有疾之之意。況厚其有罪而薄其有功。豈得不怒於心邪。失望之怨。不平之怒。鬱而不解。雖曰愛之。惡在其爲愛之也。必如古者大學之道。以修身爲本。凡一言也。一動也。舉可以爲天下法。一賞也。一罰也。舉可以合天下公。則億兆之心。將不求而自得。又豈有失望不平之累哉。奈何此道不明。爲人君者。不喜聞過。爲人臣者。不敢盡言。合二者之心。以求天下之心。則其難得也固宜。

### 順天道

三代而下。稱盛治者。無若漢之文景。然考之當時。天象數變。如日食地震。山崩水潰。長星彗星孛星之類。未易遽數。前此後此。凡若是者。小則有水旱之應。大則有亂亡之應。未有徒然而已者。獨文景克承天心。消弭變異。使四十年間。海內殷富。黎庶樂業。移告訐之風。爲醇厚之俗。且建立漢家四百年不拔之業。猗歟偉哉。未見其比也。秦之苦天下久矣。加以楚漢之戰。生民糜滅。戶不過萬。文帝承諸呂變故之餘。入繼正統。專以養民爲務。其憂也不以己之憂爲憂。而以天下之憂爲憂。其樂也不以己之樂爲樂。而以天下之樂爲樂。今年下詔勸農桑也。恐民生之不遂。明年下詔減租稅也。慮民用之或乏。懇愛如此。宜其民心得而和氣應也。臣竊見前年秋。李出西方。彗出東方。去年冬。彗見東方。復見西方。議者咸謂當除舊布新。以應天變。臣謂與其妄意揣度。曷若直法文景之恭儉愛民。爲理明義正而可信也。天之樹君。本爲下民。故孟子謂民爲重。君爲輕。書亦曰。天視自我民視。天聽自我民聽。以是論之。則天之道。恆在於下。恆在於下。不足也。君人者。不求之下。而求之高。不求之不足。而求之有餘。斯其所以召天變也。變已生矣。象已著矣。乖戾之幾已萌。而不可遏矣。猶且因仍故習。抑其下而損其不足。謂之順天。不亦難乎。右六者。難之目也。

舉其要。則脩德。用賢。愛民。三者而已。此謂治本。治本立。則紀綱可布。法度可行。治功可必。否則愛惡相攻。善惡交病。生民不免於水火。以是爲治。萬不能也。

農桑學校四

語古之聖君。必曰堯舜。語古之賢臣。必曰稷契。蓋堯舜能知天道。而順承之。稷契又知堯舜之心。而輔贊之。此所以爲法於天下。而可傳於後世也。天之道好生而不私。堯與舜亦好生而不私。若克明峻德。至黎民於變。敬授人時。至庶績咸熙。此順承天道之實也。稷播百穀。以厚民生。契敷五教。以善民心。此輔贊堯舜之實也。是義也。出書之首篇。曰堯典。曰舜典。臣自十七八時。已能誦說。爾後溫之復之。推之衍之。思之又思之。苦心極力。至年五十。始大曉悟。以是參諸往古。而往古聖賢之言。無不同驗。之歷代。而歷代治亂之迹。無不合。自此胸中廓然。無有凝滯。斷知此說實自古聖君賢相。平天下之要道。旣幸得之。常以語人。而人之聞者。忽焉泛焉。莫以爲意。察其所至。正如臣在十七八時。蓋無臣許多思慮。許多工夫。其不能領解。理固宜然。然間與一二知者。相與講論。心融意會。雖終日竟夕。不知其有倦且怠也。蓋此道之行。民可使富。兵可使彊。人才由之以多。國勢由之以重。臣夙夜念之至熟也。今國家徒知斂財之巧。不知生財之由。不惟不知生財。而斂財之酷。又害於生財也。徒欲防人之欺。不欲養人之善。所以防者爲欺也。不欺則無事於防矣。欲其不欺。非衣食以厚其生。禮義以養其心。則不能也。徒患法令之難

行。不患法令無可行之地。

上多賢才。皆知爲公。下多富民。皆知自愛。則令自行。禁自止。

誠能自今以始。優重農民。勿使擾害。盡毆游惰之人。歸

之南畝。歲課種樹。懇諭而督行之。十年以後。當倉盈庫積。非今日比矣。自上郡中都。下及司縣。皆設學校。

使皇子以下。至於庶人之子弟。皆從事於學。日明父子君臣之大倫。自灑掃應對。至於平天下之要道。十年已後。上知所以御下。下知所以事上。上下和睦。又非今日比矣。能是二者。則萬目皆舉。不能是二者。它皆不可期也。是道也。堯舜之道也。堯舜之道。好生而不私。唯能行此。乃可好生而不私也。孟子曰。我非堯舜之道。不敢陳於王前。臣愚區區。竊亦願學。

慎微五

定民志 崇退讓

慎喜怒 守信

定民志

夫天下所以定者。民志定也。民志定。則士安於士。農安於農。工商安於爲工商。則在上一人。有可安之理。民不安於白屋。必求祿仕。仕不安於卑位。必求尊榮。四方萬里。輻輳並進。各懷無厭無恥之心。在上之人。可不爲寒心哉。

崇退讓

臣聞取天下者。尙勇敢。守天下者。崇退讓。不尙勇敢。則無以取天下。不崇退讓。則無以守天下。取也。守也。各有其宜。君人者。不可以不審也。

慎喜怒

審而後發。發無不中。否則觸事遽喜。喜之色見於貌。喜之言出於口。人皆知之。徐考其故。知無可喜者。則必悔其喜之失。無可怒者。則必悔其怒之失。甚至先喜後怒。先怒後喜。先喜是。則後之怒非也。先怒是。則後之喜非也。號令數變。無他也。喜怒不節之故。是以先王潛心恭默。不易喜怒。其未發也。雖至近莫能知。

其發也。雖至親莫能移。故號令簡而無悔。無悔則自不中變也。人之揣君。必於喜怒。知君之喜怒者。莫如近愛。是以在下希進之人。求託近愛。近愛不察。乃與之爲地。甚至無喜生喜。無怒生怒。在上獨以喜之怒之爲當理。而不知天下四方。譏笑怨謗。正以爲不當理也。最宜深念。失於不守大體。易於喜怒也。

守信

數變已不可。數失信尤不可。周幽王無道。不畏天。不愛民。酒荒色荒。故不恤。方今無此。何苦使人不信。

班師議

郝經

易文言傳。謂亢之爲言也。知進而不知退。知存而不知亡。知得而不知喪。知進退存亡。而不失其正者。其惟聖人乎。蓋乾之龍德。體天行健。六位時成。時乘六龍。以御天時者。何當其可之謂也。故可以潛則潛。可以見則見。可以惕則惕。可以躍則躍。可以飛則飛。五位者。皆當其可。聖王之德也。至於上九。則惟知進與存。不知退與亡。不當其可。而違其時。是以此極而有悔。弗逮乎五位者。而猶謂之亢。龍德於是乎衰。不足以爲聖王矣。故古之聖王。莫不以時進退。握乾知幾。舜自耕稼陶漁。以至爲帝。知進也。以天下與人。不私其子。而以與禹。知退也。文王三分天下有其二。以服事殷。知退也。武王遂伐殷。而有天下。知進也。漢高帝不與項羽校。蠖屈漢中。知退也。還定三秦。以討羽。知進也。光武爲更始殺其兄。齊武王而不校。展轉河朔。知退也。一旦自立。中興漢室。知進也。故上世稱聖王者。以舜爲首。其次則稱文武。後世之稱聖王者。以高帝爲首。其次則稱光武。皆知進退存亡之理。時乘御天。卒以龍德而位天位者也。至於魏孝文。雖不逮於文武高光。遷都洛陽。總干問罪。辭順而返。齊人侵較。報之以兵。聞喪而還。進退以禮。不隕師徒。卒全龍

德爲用夏變夷之賢主。亦其次也。彼馮威恃力以逞無疆之欲。皆亢龍之師也。秦苻堅。金海陵。亢而不悔者也。漢武帝。唐太宗。亢而有悔者也。雖皆亢龍。悔而知退。又其次也。大舜不可及已。文武高光。魏孝文。漢武帝。唐太宗。後王進退有餘師矣。其惟大王殿下。聰明睿智。足以有臨。發強剛毅。足以有斷。進退存亡之正。知之久矣。嚮在沙陀。命經曰。時未可也。又曰。時之一字。最當整理。又曰。可行之時。爾自知之。大哉。王言。時乘六龍之道。知之久矣。自出師以來。進而不退。經有所未解者。故言於真定。於曹濮。於唐鄧。亟言不已。未賜開允。乃今事亟。故復進狂言。國家自平金以來。皆亢龍之師也。惟務進取。不遵養時晦。老師費財。卒無成功。三十年矣。先皇帝立政當安靜。以圖寧謐。忽無故大舉。進而不退。畀王東師。則不當亦進也。而遽進以爲有命。不敢自逸。至於汝南。旣聞凶訃。卽當遣使。遍告諸師。各以次還。修好於宋。歸定大事。不可復進也。而遽進。以有師期。會於江濱。遣使喻宋。息兵安民。振旅而歸。不當復進也。而又進。旣不宜渡淮。又豈宜渡江。旣不宜妄進。又豈宜攻城。若以幾不可失。敵不可縱。亦旣渡江。不能中止。便當乘虛取鄂。分兵四出。直造臨安。疾雷不及掩耳。則宋亦可圖。如其不可。知難而退。不失爲金兀朮也。師不當進而進。江不當渡而渡。城不當攻而攻。當速退而不退。當速進而不進。遷延盤桓。江渚情見。勢屈。舉天下兵力。不能取一城。則我竭彼盈。又何俟乎。且諸軍疾疫已十四五。又延引月日。冬春之交。疫必大作。恐欲還不能。彼旣上流無虞。呂文德已并兵拒守。知我國疵。鬪氣自倍。兩淮之兵。盡集白鷺。江西之兵。盡集龍興。嶺廣之兵。盡集長沙。閩越沿海。巨舶大艦。比次而至。伺隙而進。如遏截於江黃津渡。邀遮於大城關口。塞漢東之石門。限郢復之湖灤。則我將安歸。無已。則突入江浙。擣其心腹。聞臨安海門已具龍舟。則亦徒往還抵金山。并

命求出。豈無韓世忠之儔乎。且鄂與漢陽分據大別。中挾巨浸。號爲活城。肉薄骨并而拔之。則彼委破壁空城而去。汭流而上。則入洞庭。保荆襄。順流而下。精兵健櫓。突過澠黃。未易遏也。則亦徒費人命。我安所得哉。區區一城。勝之不武。不勝則大損威望。復何俟乎。雖然。以王本心。不欲渡江。旣渡江。不欲攻城。旣攻城。不欲并命。不焚廬舍。不傷人民。不易其衣冠。不毀其墳墓。三百里外。不使侵掠。或勸徑趣臨安。曰。其民人稠夥。若往。雖不殺戮。亦被踐蹂。吾所不忍。若天與我。不必殺人。若天弗與。殺人何益。而竟不往。諸將歸罪士人。謂不可用。以不殺人。故不得城。曰。彼守城者。祇一士人賈制置。汝千萬衆不能勝。殺人數月不能拔。汝輩之罪也。豈士人之罪乎。益禁殺人。歸然一仁。上通於天。久有歸志。不能遂行。爾然今日事急。不可不斷也。宋人方懼大敵。自救之師。雖則畢集。未暇謀我。第吾國內空虛。塔察國王與李行省。肱髀相依。在於背脅。西域諸胡。窺覘關隴。隔絕旭烈大王病民諸姦。各持兩端。觀望所立。莫不覬覦神器。染指垂涎。一有狡焉。或啓戎心。先人舉事。腹背受敵。大事去矣。且阿里不哥已行赦令。令脫里赤爲斷事官。行尙書省。據燕都。按圖籍。號令諸道。行皇帝事矣。雖大王素有人望。且握重兵。獨不見金世宗海陵之事乎。若彼果決。稱受遺詔。便正位號。下詔中原。行赦江上。欲歸得乎。昨奉命與張仲一觀新月城。自西南隅抵東北隅。萬人敵上。可並行大軍。排檉弗樓。締構重複。必不可攻。祇有許和而歸爾。復何俟乎。願殿下以祖宗爲念。以社稷爲念。以天下生靈爲念。奮發乾剛。不爲需下。斷然班師。亟定大計。銷禍於未然。先命勁兵。把截江面。與宋議和。許割淮南。漢上。梓夔兩路。定疆界。歲幣置輜重。以輕騎歸。渡淮乘驛直造都。則從天而下。彼之姦謀。僭志。冰釋瓦解。遣一軍逆大行皇帝靈輿。遣使召旭烈阿里不哥。摩哥及諸王駙馬會。



喪和林。差官於汴京、京兆、成都、西涼、東平、西京、北京、撫慰安輯。召太子鎮燕都。示以形勢。則大寶有歸。而社稷安。失之東隅。收之桑榆。以退爲進。以亡爲存。飛龍在天。利見大人。無亢龍之悔矣。十一月二日。臣經昧死上進。

